

光緒永嘉縣志

永嘉縣志卷三十二

藝文志八

文內編

奏議

宋

周行己論察朋比壅隔劄子

歷代奏議

臣竊謂人臣之私莫大於朋比而天下之患莫深於壅隔古之人君所以操獨斷而任賢使能廣羣聽而達聰明目蓋防此也恭惟陛下臨御以來總攬權綱勵精政事官無大小事無巨細皆出宸斷親御翰墨臣庶奔走而聽命海內歡欣而蒙德二十年閒法全而令具治定而功成天下既已無事矣臣愚過慮竊意萬機之繁久勤宵旰臣願陛下下儲精淵默游意太清小職細務責之三省百司而獨操其要者在於察股肱之任必出於公使無朋比之欺擇耳

目之官咸竭其忠使無壅隔之患如此則職何小而不舉
事何細而不聞不待悉煩聖慮而天下之理得矣臣愚不
勝區區螻蟻之誠

論戒飭守令監司奉行詔令劄子

臣久居田里僻在海濱竊見陛下每降手詔幽遐之民歡
欣爭聽至於感泣皆知聖主愛民之深然而四方萬里之
遠州縣官吏之衆豈能悉如詔旨奉行不違聞者累行申
命使監司使者歲行舉時頒檢察違戾丁盜訓飭亦已至
矣而積習弛不肖之吏尙多廢格臣愚欲望陛下出自
宸慮更定守令監使之選使承流而責以布宣增置御史
之員使分部而察其勤惰如是則上澤必行下情無壅遠
近同仁臻極治矣

劉安上論蔡密

劉給諫文集

臣近累論前給事中蔡密罪惡顯著伏蒙聖慈開納罷密
職任俾領宮祠然猶帶提舉叨綴從班士論喧然未以爲
允臣職當糾彈宜思報補不敢默默臣竊惟延閣之職本
以旌寵才學文行之士琳宮之任本以優假勤勞王家建

立事功之人密市井賈販之徒未嘗學問字多不識每上
章疏取笑縉紳則何嘗有學交結豪民以規厚利干求進
用形於簡牘無異於登龍斷而鑽穴隙者則何嘗有行起
自布衣驟躋禁途從容瑣闥倖冒寵祿則何嘗有勞居論
思之地曾無小補惟以道家吐納爲說則何嘗有功臣以
謂延閣華資真祠逸任皆非密所宜處陛下雖優容而公
議未厭何可得也況密妄自尊大上輕君父侍立瞑目不
恭之罪莫大於此義難寬貸若尙留京師臣恐招權怙勢
陰計邪謀密侵國論有害治體此有識者之所深憂陛下
所宜留神詳察者也伏望睿斷降出前後章奏證密之罪
重行黜責以協公議

林季仲論軍費劄子

南宋文範

竊以天下之勢猶一身病在四支不足憂病在心腹爲可
畏天變見於上坤載震於下水旱不時兵戎相維此四支
之病也爵賞及於無功府藏困於冗食賦歛仍數人民怨
咨此心腹之病也邇者國運中否禍亂頻承二聖六宮遠
征沙漠兩河之地淪於異域生靈瘡痍迄今未廖斯病也
亦云劇矣然而陛下入承大統海內之民悲喜若更生無

懷二心以他適者繇祖宗以來除煩解澆輕徭薄賦涵養
垂二百年深仁厚澤有以結其心爾臣以是知天下之病
在四支不在心腹也然國以民爲本民以財爲命取之過
多予者亦怨官曰和買買者初不和也民曰樂輸輸者初
不樂也錙銖之求不能給億萬之費涓滴之積不能實尾
閭之泄日削月朘寢以大窮禍有不可知者或曰兵貴精
不貴多太祖削平僭僞不過十萬所得蜀兵擇其精者止
留一百二十人餘悉遣之則嶺南諸國之兵所留者可知
矣今列戍相望穴食尙衆盍亦擇勇銳而汰老弱給以閒
田使耕鑿於其中可乎或又曰惟器與名不可以假人曹
彬平江南太祖不與使相但賜錢數十萬其他隨以平難
者皆厚賞之終惜名器不肯輕予今邊陲有警全軍轉官
有功者侮無功者怠非所以示懲勸也盍亦告戒諸帥覆
實奏功斬獲顯著方許第賞至於給厯乃朝廷之異恩宜
留以待立奇於淮北者其餘碌碌從軍止以金帛犒之可
乎不然軍費口滋民力愈屈今年月支一百萬明年月支
二百萬又明年月支三百萬地未恢復卽前日之民也民
未蕃庶卽前日之民也坐以自困事窮變生臣恐天下之
病不在四支而在心腹矣惟
陛下蚤圖之幸甚取進止

張闡條闕政劄子

比年災異數見去春溫台颶風壞廬舍以萬計二浙飛蝗蔽野今歲夏秋雨淫水溢米值翔湧太陽薄蝕星緯復爾當思應以實不以文乃者言路輕易出令不謹君子未進小人未退給札條弊政而無所更革臧否監司守令而無所升黜文具如此致變固宜至如近則荆襄江淮守禦缺然遠則蜀道連歲出師凋瘵已甚陛下方馳騁羣馬日引狼子野心之人周旋禁籙垂象安得不再三示警耶

論罷荆襄屯田

宋史食貨志

今日荆襄屯田之害以其無耕田之民而課之游民游民不足而強之百姓於是百姓舍已熟田而耕官生田或遠數百里徵呼以來或名雙丁而役其疆壯老稚無養一方騷然罷之誠是也然自去歲以來置耕牛農器修長木二渠費已十餘萬一旦舉而棄之則荆襄之地終不可耕也比見兩淮歸正之民動以萬計官不能續食則老弱餓死彊者轉而之他若使之就耕荆襄之田非惟可免流離抑使中原之民聞之知朝廷有以處我率皆襁負而至矣異

時墾闢既廣取其餘

以輸官實為兩便

弭災禦盜劄子宋

和議以來歲有聘幣民不堪命臣願陛下毋以金人困中
國可乎歸正人時有遣還之命怨聲聞道路臣願陛下毋
使金人得以甘心可乎州縣吏職卑地遠漁奪之禍被於
編籍臣願陛下嚴賊吏之誅可乎蠲租之令已赦復征寬
夫之澤例為文具臣願陛下申詔令之禁可乎是數者能
次第行之則足以動天地召和氣災異盜賊不足慮也

薛季宣議徒流從軍劄子 歷代奏議

臣聞牧馬者在鞭其後馭羊者去其亂羣施之於民其則
不遠先王制徒流之法所以折服其心用示戒懲於赤籍所以
繩其悍戾困之居作所以折服其心用示戒懲於赤籍所以
於善而除俗之蠹也近自軍法之壞紀律無存配流之徒
知不得與善人齒於是留則肆其頑惡逃則流為奸盜惟
埋屠販習以為常向之所以繩其悍戾折服其心者曾不
復見為民之害莫甚於此竊見大軍招刺強仕絕為難得
給賞例物其費不貲強刺良民不勝其擾每念小人罪至

徒流以上非勇悍則奸賊也收之於軍則使貪使詐之法
可得而用漢世募弛刑徒徙塞下周世宗收天下奸人亡
命以肅禁旅治以軍法皆有成效臣謂先王徒役之流隸
於赤籍此其意也軍律以繩之師役以折服之使遷善嚮
功不復混於民伍而為善人蠹鞭其後去亂羣者不幾是
乎願詔天下州軍凡罪至配流年五十五歲以下非疋羸
無疾患者並送大軍收管情理輕者特免刺面其徒罪以
上願從軍者許從原收仍免重役如此一歲之內大軍所
得將不啻數千人無非悍戾之夫比之招刺而來居然異
矣軍收其用民去其頑善有所遷人除其害而法出寬厚
亦當今善計也

奏事劄子

臣聞人主之為天下莫大於天下不可得而欺夫使天下
皆不可得而欺則欲無不遂為無不成自昔號有志之君
其所欲為非不甚盛甚美然卒有齟齬之嘆蓋欺之者多
耳夫欺者之情狀天下皆知之而人主獨不知之是豈人
主不欲察之而甘於受之耶近者為之地則遠者有盤錯
之堅大者為之助則小者有彰露之援其察之豈曰甚易

乎守令之所臨治不過一郡一邑之閒且暮坐廳事中豪
家巨俗敢於欺侮而不懼者恃有胥吏爲之囊橐也人主
萃天下之責而以一身臨之爵祿勢利足以動人小人而
不爲欺何以有僥竊富貴之望而罪之根本則在於左右
之囊橐致使人主無從而察之也夫左右之爲欺甚於天
下彼其伺候辭色之工窺見意向之密婢閭逢迎殆難以
狀其巧也故有托正以行其邪假廉以濟其貪僞直以售
其佞薦退人才不於有所陞黜之時而游揚中傷於平居無
事之日一旦陞黜之際雖人主自以爲出於獨斷而喜怒
氣燄已歸於囊橐者之門矣然則左右之爲欺人主又何
從而察之耶亦曰兼聽無我收骨鯁棄軟熟而已且可以
利來可以使懼有見而不敢言或言而不敢盡皆軟熟之
人也骨鯁之士惟胸中耿耿不能與世推移急危存亡之
秋乃可望以仗節死義平時軟熟自爲身謀而欲望以急
難非所聞也借使舉朝之士無非軟熟之人其爲墨墨大
矣於人主何利焉若乃骨鯁之士世多以好名疑之夫名
天地之美物不易以與人而亦天下之公論不易以冒得
舉事進言果出於爲君上爲社稷也然後可以得名不然
將誹謗隨之矣故在臣子自爲學問之計不可存好名之
心人主爲社稷計惟恐不得好名之士人人皆好名畏義

則人主所欲爲者無不濟矣故欲絕天下之欺惟在於收骨鯁收骨鯁在於兼聽兼聽莫難於無我入者先主縱有他說不能復入何以鑒擇其是否乎骨鯁之言非無我則誠難於受之也忠言逆耳利於行良藥苦口利於病此漢初之謀臣所以事英畧大度之主而使屈羣策之用者其言如此齊威之霸其機不在乎阿卽墨大夫之誅賞而繫乎毀譽者之刑毀譽不公則刑賞不行欺者殆無以禁之矣恢復之功獨可日月冀乎此臣所以冒昧而獻兼聽無我之說也陛下靜觀而熟察之倘有驗於微臣之言功業成否反掌閒耳

薛叔似論聽言劄子

臣聞聽言之道必以其事觀之則言者莫敢妄言此聽言之要也且人主惟有一心而攻之者甚衆或以欺罔或以諛諛輻輳攻之各求自售而其爲說皆有以文飾之其持之有故其言之成理汙白使黑呼正爲邪或辭同而情異或言此而意彼辯言至於亂正游言欲以自解劉向所謂營惑耳目感移心意不可勝載蓋謂此也然則孰從而察之曰萬事有正理天下有公論質之正理而然採之公論而然則其言爲必可行之言質之正理而不然採之公論

而不然則其言爲妄言繫易所謂慙枝游屈孟子所謂諛淫邪遁蓋舉其大槩而已人藏其心不可測度不知言無以知人乾坤所以知險知阻者舍簡易何以哉雖然是非邪正之不察固害治也是非邪正之兼容尤害治也假如愚者至以千金與之賢者至亦以千金與之則愚者莫不至而賢者日遠矣今日以某人之忠言也聽之明日有欺罔者亦聽之不加罪焉人何憚不爲欺罔今日以某人之抗論也聽之明日有詔諛者亦憚不爲諛焉人何憚不爲詔諛是非兼容久之是必爲非所勝邪正兼容久之正必爲邪所傾唐史所謂引桀跖孔顏相闕於前而以衆寡爲勝負豈不甚可慮哉陛下奉三無私以勞天下中心無爲而守至正凡臣下之進言一經於前無不洞見然優游寬容未免過當故用舍進退或至混淆二十餘年之間治道不振國勢不尊其端蓋出於此伏願陛下廓離炤之明奮乾剛之斷審言者之事理而一揆之公論則宗社幸甚

上殿劄子

臣前月十四日奏對伏蒙聖慈褒答天語從容且於執中用中之說明白詳盡仰見陛下天縱生知有非臣下所能

窺測萬一夫曰執中曰用中曰建中曰建用皇極此皆帝
王相傳之要旨爲治之大原也人君而不知此則用舍好
惡孰爲之機予奪去取孰爲之衡本亂而末治內暗而外
明臣未之前聞然旣曰知之矣而復不能行其所知與不
知何異故必舉十六相必罪鯨鱓兇共工必治洪水必定
貢賦必征三苗而後見堯舜用中之實必官德賞功必兼
弱攻昧必伐夏必旁求俊乂必子惠困窮而後見成湯執
中之實必伐紂必反商政必丕平富必克知三宅必灼見
一俊而後見武王建中之實夫執言其執之不失也用言
其用之不差也建言其建之不悖也皆一也中非他也心
焉已耳至理雖具於心而功業不著於世詩書所稱亦無
其實矣子思氏曰喜怒哀樂之未發謂之中發而皆中節
謂之和未發之中不可以測也發而皆中節則人得見之矣
故其喜樂也必沛然如雨露而天下皆舒其怒哀也必凜
然如霜雪而天下皆肅約己量物卽此而是也如是而執中用
卽此而是也參天地贊化育卽此而是也如是而執中用
中建中之實始著今陛下生帝王千載之後得帝王此心
之同而從欲之效未臻唐虞拯難之功未侔湯武豈功用
猶未究歟豈有得其理而無其功者歟伊尹曰吾豈若於
吾身親見之哉臣不勝拳拳

葉適議治勢疏

欲治天下而不見其勢天下不可治矣昔之論治天下者以爲三代之時其君各有所尙夏之忠商之質周之文數百年而不變其後周之失弱秦之失強故忠質文相代若循環而無窮而或者又曰弱之失在於惠也則莫若濟之以威強之失在於威也則莫若反之以惠惠出於賞威正於刑故賞不至於濫而無所勸刑不至於玩而無所懼蓋其意以爲治天下之勢無出於此矣夫一張一弛者弓也而羿之能不與焉虛而欹滿而覆者器也而錘之巧不與焉故三代非忠質文之尙而周秦無強弱之失治天下者姑舍是乎古之人君若堯舜禹湯文武漢之高祖光武唐之太宗此其人皆能以一身爲天下之勢雖其功德有厚薄治效有淺深而要以其爲天下之勢在己不在物夫在己不在物則天下之事惟其所爲而莫或制其後導水土通山澤作舟車剡兵刃立天地之道而列仁義禮樂刑罰慶賞以紀綱天下之民至於賓餞日月秩序寒暑而禽獸草木之類不能逃於運化之外此皆上世之所未有而聖人自爲者也及其後世天下之勢在物而不在己故其勢之至也湯湯然而莫能遏反舉人君威福之柄以佐其鋒至

其去也不能止而隨之以亡夫不能以一身爲天下之勢
而用區區之刑賞以就天下之勢而求安其身者臣未見
其可也蓋天下之勢有在於外戚者矣呂霍上官非不可
以監也而王氏卒以亡漢有在於權臣者矣漢之曹氏魏
之司馬氏至於江南之齊梁皆親見其篡奪之禍習以其
天下與人而不怪而其甚也宦官之微匹夫之奮呼士卒
之擅命而天下之勢無不在焉若夫五胡之亂西晉之傾
覆此其患特起於公卿子弟里巷書生游談聚論沈湎淫
佚而已而天地爲之分裂者數十世嗚呼勢在天下而人
君以其身求容焉猶豫反側而不能以自定其或在於官
官或在於士卒或舉威福之柄以盡寄之者此甚可嘆也
臣嘗怪唐末五代之衰皆以列校之卑易置人主如反掌
之易而周世宗一日臨大位北威契丹南伏李璟法度修
舉文武並用太祖皇帝踐祚十年之間不耀兵甲俘取僭
僞之君若拾遺而天下爲一身致太平爲子孫萬世之計
向之衰敗圯缺者二百餘年英武之君忠智之臣圖爲收
拾不能什一而孱王幼主俯首服從相顧憤發以至流涕
痛哭莫敢誰何者一朝翕然皆在把握之內何其速也此
無他能以其身爲天下之勢則天下之勢亦環向而從己
其必然而無疑者矣且均是人也而何以相使均是好惡

利欲也而何以相治智者豈不能自謀勇者豈不能自衛
一人刑而天下何以畏一人賞而天下何以慕而刑賞生
殺豈以吾能爲之而足以制天下者雖然鳥高飛於重雲
之上魚深游於潛淵之下而皆不免有鼎俎之憂天下之
人所以奔走後先維附聯絡而不敢自棄者誠以勢之所
在也故夫勢者天下之至神也合則治離則亂張則盛弛
則衰績則存絕則亡臣嘗考之載籍自有天地以來其合
離張弛絕續之變凡幾見矣知其勢而以一身爲之此治
天下之大源也

辨兵部郎官朱熹狀

臣聞告君之言必以實非其實者爲欺臣竊見近日朱熹
除兵部郎官未供職閒而侍郎林栗急劾去之士論怪駭
莫測其故蓋熹素有文學行誼居官所至有績因王淮深
惡之遂不敢仕淮旣罷去陛下趣熹入對用爲郎官無不
稱慶忽爲栗誣奏使去衆議洵洵不平臣始疑之以爲得
非熹果有罪外人不知而栗獨得其實耶暨栗奏文傳布
中外臣得始末參驗然後知其所言熹無一實者也栗雖
貴而近臣雖賤而疎然臣子之大義一也烏有栗以不實

之罪欺罔君父而臣忍不以其實陳於陛下乎栗言熹只欲回就江西提刑已受省劄不肯赴部供職臣聞熹既受除郎省劄即時遣回江西提刑司接人其時朝士皆共見之熹以脚疾發動不任下牀遂申尚書省乞假候痊供職是栗謂熹只欲回就江西提刑司不肯供職非其實也栗言熹四司郎官廳印記不肯收受推出門外令送長貳緣長貳不合管郎官廳印記不肯收受推出門外令送長貳難兼郎官印記難以棄擲在外慮有失去其朱熹堅執不從臣爲卿貳不能率屬致其偃蹇拒違君命實負慚懼所旦臣聞熹未對之前脚疾已作當對之時偶然少止對下之乞給假供職適會歇泊旬休未及將上所有郎官印記止乞給假供職其可受乎熹已申省給假矣雖欲聽栗鑄諭而扶曳供職可乎是栗謂熹不受省印記偃蹇拒違君命非其實也栗又言熹本無學術徒竊張載程頤之緒餘謂之道學所至輒攜門生十數習爲戰國之態妄希孔孟之風繩以治世之法則亂臣之首也臣聞朝廷公教育於上士子私淑艾於下自古而然使熹果無學術何用師之果有

學術其相與從之者非欲強自標目乃所以爲人材計爲
國家計也今栗以諸生不得從熹講學爲熹之罪而又謂
非治世之法宜禁絕之此又非其實也栗又言陛下愛惜
名器館學寺監久次當遷郎官者只令兼權其視郎選亦
不輕矣而熹乃輕之兵部郎官本係大宗正丞計衡兼權
以熹之故移計衡於都官而以兵部處熹所以待熹亦不
薄矣而熹乃薄之臣聞陛下明詔曾任監司知州者始得
除郎其事久矣館學寺監雖久次而未曾監司知州者則
不可兼權豈得謂之當遷郎官哉差除之制那換闕次移
衡用熹熹何德焉是又栗急於誣熹之罪組緝言語以足
其文爾而不自顧其言之非實也栗又言職制者朝廷之
紀綱熹既除兵部在臣合有統攝乞將熹新舊任指揮並
且停罷臣聞唐以左右丞進退郎官矣本朝故事未之或
然惟臺諫彈劾有停斥之請給舍微駁有寢罷之文至於
六部寺監舉劾其屬必曰乞行迴避徵其文婉其義所以
重臺綱而尊國體也今熹得爲栗之屬尚未供職而栗已
望風劾之且兼用給舍臺諫繳劾百官之例何哉栗以職
制紀綱劾熹而先自亂之是職制紀綱之說非其實也凡
栗之辭始末參驗無一實者至於道學一語利害所係不
獨朱熹蓋自昔小人殘害善良率有指名或以爲好名或

以爲立異或以爲植黨近忽創道學之目鄭丙倡之陳賈
和之居要路者密相付授見士大夫有稍務潔修粗能操
守輒以道學之名歸之以爲善爲玷缺以好學爲過愆相
爲鈞距使不獲進於是賢士惴惴中才解體銷聲滅影穢
德垢行以避此名往日王淮表裏臺諫陰廢正人蓋用此
術此於陛下彰善黜惡封植人才以爲子孫無窮之計者
其損不細矣栗爲侍從無以達陛下之德意於下而更襲
陳賈鄭丙密相付授之說以道學爲大罪文致語言逐去
一熹固未嘗害第恐自此讒口橫生善良受禍誠不可不
預防而早辨也臣去冬蒙恩面對論一大事有四難五不
可之條方齋心滌慮以俟陛下反覆詰難庶幾竭盡愚忠
今一即官去留何至謾謾徒溷宸聽哉蓋見大臣以下畏
栗兇燄莫敢辨明積其厲階將害大體伏願陛下正紀綱
之所在絕欺罔於旣形無惟其近惟其賢無惟其官惟其
實摧抑暴橫以扶善類奮發剛斷
以慰公言國家之本孰大於此

戴栩奏事劄子

歷代
奏議

臣仰惟陛下英明冠古聖德緝熙凡在列之臣無不以講
學爲言所謂講學者中庸大學其首也臣不佞以爲陛下

之所講羣臣之所對未免寢流於虛文臣請掇其切於實
用者言之臣聞中庸之學自謹獨入大學之學自致知入
中庸曰喜怒哀樂之未發謂之中發而皆中節謂之和致
中和天地位焉萬物育焉夫能謹於喜怒哀樂即自其謹
獨而得之雖中智無不知戒懼徒以隱顯殊制作輟靡
常惟於不睹不聞者謹之則誠意所積流通無閒今陛下
臨朝若神非不嚴恪恭己南面非不粹淵然退而寒之者
多矣暫御使令慧黠者獲進巧詐者見容燕飲之不節舉
動之少輕宮庭隱微一有過差皆足干陰陽之大和近者
星象違度陰雨彌旬蝱蟥為沴穀價騰踊疢癘洊作流離
日繁陛下反之於躬真足以位天地育萬物乎然後謹獨
之學可驗也大學曰在明明德在新民在止於至善夫能
底於至善即自其致知而得之天下事物無窮莫不有定
理其本末有倫先後有序惟事事物物求其至焉一理既
通觸類自悟今陛下精一之談不絕於口危微之旨日陳
於前然尊所聞行所知者鮮矣處事用人明辨是非者有
幾號令所出朝更而夕變除授所加倏倏而忽賢朝廷設
施一或失宜皆足以召天下之讟侮近者訛言迭興叛孽
閒起某事未作而人疑其無成某人未用而人疑其必敗
陛下反之於躬真足以明明德而新民乎然後致知之學

可驗也臣願陛下取二書而觀之不以廣誦泛說爲能而以切問近思爲貴守之以誠養之以敬講學之功始爲有補矣且中庸大學一理也中庸之九經卽大學所以治國平天下者也大學之母自欺卽中庸之莫見乎隱莫顯乎微者也書二而理一惟當使此誠此敬無一息不存耳昔唐德宗出宮女屏遠玩好淄青將士投兵相謂曰聖主出矣吾屬猶反乎及其情忌一生以推誠爲無益則貞元之弊有甚於肅代陛下於此察之使言而民莫不信行而民莫不敬則主勢日隆獨非今日之急務乎唐憲宗平淮蔡制馭強藩論者謂非朝廷之力直以措置能服其心及其驕侈一萌任用便嬖聚斂之臣則元和之治終愧於二祖之風烈陛下於此加省焉知善則得之不善則失之則天命日永獨非今日之永圖乎夫以陛下耽玩此學之久嗜慕此學之篤又體察此學之詳臣申復其端不以爲贅辨明其實不以爲忤而臣進對之始亦姑論其大畧而未敢徧舉也狂瞽之言罪當萬死惟陛下裁幸

禦邊劄子

臣請言天下之大慮今殘虜不足慮矣近而可慮者淮孽也遠而可慮者鞏人也淮甸之孽雖逆名未彰而逆節已

露我之耕牛則倩客以致之我之戰馬則昂價以誘之我
之材木則資以爲舟筏之具朝廷方計糧而爲之舖廣羅
以應其需稍拂其意則起而殺官吏焚城郭暴骨草莽積
聚爲之蕩然一得其善言則置而不問夫朝廷不先事以
激變誠大體也臣揆之事宜自可並行而不悖陛下與大
臣務爲恩言以存其終始中勅制閹常爲之備俟其有變
而誅之彼之未動則有所忌憚動而欲爲不善則天人共
憤而曲不在我矣鞮人擾我邊陲西起巴蜀中經襄漢東
並淮泗橫亘數千里度其勢未能如郡縣驅其丁壯老弱以
假託名字游魂竊息不然則所過郡縣聽其自爲去來
爲前鋒耳若是者當精閒謀以伺之不可聽其自爲去勝
也然臣謂二者實所當慮而先爲之不可勝以待彼之可勝
則必有措慮之地矣陛下所恃爲攻戰者非吾兵乎所恃
爲保障者非吾民乎今日三衙達於屯駐將帥捨剋日甚
借貸之責償差使之家貲豐餘與夫材力出衆者往往貪忌
券動占虛籍甚者家貲豐餘與夫材力出衆者往往貪忌
百計以善之而陛下之兵怨矣自內郡達於沿邊州縣折
剝尤爲苛峻稅賦之重輸賊討之過倍楮幣貼入自爲折
閭而茗鹽酒麴動致破家甚者和籩城築之類科抑百端
朝廷雖給本費以巨萬計反席卷而藏之而陛下之民怨

矣兵怨民怨陛下不得而知所恃以爲耳目者風憲之職而已聞有背公徇私竊弄威柄尺牘所馳轅門鈴閣無日無之其營求囑託如神校之陞補揀屬之辟薦主將州郡能順適其意則過雖山積且曲爲之地矣奚肯爲陛下言哉唐文宗有言去河北賊易去朝中朋黨難是雖有激而云亦未俗之通患也臣不識忌諱位卑言高何所逃罪惟陛下留意自治之策使可慮者不至於可慮天下幸甚

陳宜中請禁鹽法抑配之害劄子

曩歲淮揚鹽道梗廣鹽益出於江湖南北之境司局之責數餘羨朝延之鈔額頓增比年以來越界有禁鹽之滯者無所泄鈔之增者不復除重以銀價倍徙網解迫促鹽司無以爲策徧追鈔戶多致抑賣繼責諸吏立限倍輸食鹽之戶口不加多日納之錢銀不加少鈔戶殞身蕩產不足填償諸吏剝牀及膚肆行抑配分鄉置局計口敷鹽雜以灰泥減其勛兩沿門強委刻日責償前欠未消後敷踵至不能償者羣數十惡少席捲其家襲釜布衾靡有遺者甚至至搜挾煎熬誣以私販棄抑人家計爲私鬻攔執逼及於溫飽科罰不問其是非民不聊生惟各待死昨者臺臣嘗

以計口食鹽之害爲言弊端紛如未易頓革
欲乞行下監司痛行禁戢實去民間之害也

劾平章賈似道劄子

臣竊見近者叛將挾北透渡已踰兩月上而三宮下而萬
姓皆謂平章賈似道督師江上出一不能報三朝禮遇之
恩必能以一死謝天地涵育之澤而乃提師逗遛不發一
矢今月十二日忽報臣等孫虎臣退師又二十日報臣等
以諸軍已潰初猶有自爲一決之語既而報爲海上迎駕
之言臣見其平日自詭知兵意其有深謀秘計可以救一
脈於垂亡有非腐儒所可測識忽於二月二十八日早有
督府垂行吏歸乃言似道於二十一日夜三更鳴鑼一聲
喝散諸軍竄身而去莫知所之臣聞之血淚迸流欲死無
所因痛念向時丁大全貶竄所之時適際理祖再生之造僥
銀末第似道時適當國臣起身書生叨居要地雖一出於
先帝簡拔之恩不可謂非似道進薦之力臣每見其施行
時有差舛未嘗不隨事納規才彈力乏莫能救正稔禍今
日涕隕何追似道既已喪師竄身上誤宗社臣向在烏臺
既無呂誨之先知今居執政又不能爲魯宗道之力爭罪
何所逃謹亟具自劾以聞欲望聖慈將臣誅竄以謝天下

張孚敬正典禮疏

臣竊惟孝子之至莫大乎尊親尊親之至莫大乎以天下
養伏惟皇上應天順人嗣登大寶卽勅議追尊與獻王以
正其號奉迎聖母以致其養此誠孝子之心有不能自已
者也茲者朝廷議謂皇上入嗣大宗宜稱孝宗皇帝爲皇考
改稱興獻王爲皇叔父與獻大王興獻王妃爲皇叔母與
獻大王妃者然不過拘執漢定陶王宋僕王故事謂爲人
後者爲之妃者不得復顧其私親之說耳伏承聖諭以此禮
重令博求典故務合至當之論臣有以仰見皇上純孝
之心矣此有言者遂謂言者爲當恐未免膠柱鼓瑟而不
通於時黨同伐異而不當於禮臣固未敢以爲然也夫天
下豈有無父母之國哉臣則立清朝發憤痛心不得不爲
皇上明辨其事記曰禮非從天降也非從地出也人情而
已矣故聖人緣人情以制禮所以定親疎決嫌疑別異同
明是非也夫漢之哀帝宋之英宗乃定親疎決嫌疑別異同
時成帝仁宗無子皆預有爲皇嗣而養之於宮中是尙爲
人後者也故師丹司馬光之論施於彼一時猶可今武宗
皇帝已嗣孝宗十有七年比於崩殂而廷臣遵祖訓奉遺
詔迎取皇上入繼大統豈非以天下者祖宗之天下天下

之天下也臣伏讀祖訓曰凡朝廷無皇子必兄終弟及夫
孝宗興獻王兄也興獻王孝宗親弟也皇上有天下真猶高皇帝
也今武宗無嗣以次屬及則皇上之有天子倫序當立初未
親相授受者也故遺詔直曰興獻王長子倫序當立初未
嘗明著為考宗以後比之預立為嗣養之宮中者其公誠不
較然不同矣或與獻王向在嗣位今日恐弟亦無後兄之義
可忘也假使與獻王向在嗣位今日恐弟亦無後兄之義
夫興獻王往矣稱母之以皇叔父鬼神固不能無疑也今聖
母之迎也稱皇叔母當以君臣禮見皇上上一人利天下而為
長子不得為人後況興獻王惟生皇上上一人利天下而為
人後恐子無自絕父母之義故在皇上上一人利天下而為
尊崇其親則可謂嗣孝宗以自絕其親則不可或以大統
而不可絕為說則子立也漢文帝承惠帝之後則以弟繼宣帝
承昭帝之後則以兄孫繼若必強奪此父子之親建彼父
子之號然後謂之繼統則古嘗有稱高祖皇帝伯考者皆
不得謂之統矣或以魏詔謂由諸侯人奉大統則當明為
人後之義殊不知曹叡是時尚未有嗣其詔蓋預為外藩
援立者坊此有為之私非經常之典也可概論乎故曰禮
時為大順次之不時不順則非人情矣非人情則非禮矣

臣竊敢謂今日之禮宜別爲興獻王立廟京師使得隆尊親之孝且使母以子貴尊與父同則興獻王不失其爲父聖母不失其爲母矣夫人必各本於父母而無二議禮者亦惟體之於心而已今者不稽古禮之大經而泥末世之故事不遵祖宗之明訓而率曹魏之舊章此臣之所未解者矣雖然非天子不議禮今皇上虛己宏大疇咨衆言倘以朝議爲禮之當稱號一定不可復易且將使天下後世之人皆知以利爲利而自遺其父母疑非永言孝思孝思維則之謂也臣竊惟此禮乃天經地義萬代瞻仰毫釐之差千里之謬故大臣平章小臣獻納皆分之宜也書曰有言逆於女心必求諸道有言遜於女志必求諸非道夫逆心之言疑於忠而未必皆道也遜志之言疑於諛而未必皆非道也臣愚豈敢導諛君上以自誤於不忠又豈敢昧於自獻以誤君於不孝惟聖明體察而裁決焉

廟議疏

伏惟皇上以大孝之心議尊親之典初因廷臣執論聚訟四年更詔三遍蓋漢宋以來之君所不決之疑至皇上決之所未成之禮至皇上成之真可謂洗千古之陋垂百王之法者也是以新詔傳宣愚氓不應益禮必如此然後台

乎天理之正即乎人心之安也茲光祿寺署丞何淵妄肆
浮言破壞成禮稱獻皇帝爲所自出之帝請立世室列祀
太廟此何言也臣與廷臣抗論之初即曰當別爲興獻王
立廟京師又曰別立廟廟不干正統此非臣一人之議天
下萬世之公議也今何淵以獻皇帝爲所自出之帝比之
今之德祖請立世室比之周文王武王不經甚矣皇上聰
明中正諒已察之茲言也上干九廟之威鑒下駭四海之
人心臣敢不爲皇上言之昔漢哀帝追尊父定陶共王爲
共皇帝立寢廟京師序昭穆儀如孝元帝是爲于紀亂統
人到於今非之今何淵請入獻皇帝主於太廟不知序於
武宗皇帝之上歟序於武宗之上是爲于統無疑武宗之統傳之
武宗序獻皇帝於武宗之上是爲于統無疑武宗之統傳之
之皇上序獻皇帝於武宗之下又於繼統無謂何淵所請
此何言也如謂太廟中不可無禩漢宣帝嗣昭帝後昭爲
宣之叔祖史皇孫嘗別立廟未聞有議漢宗廟無禩者蓋
名必當實不可強爲也如謂獻皇帝廟終當何承臣謂由
皇上以及聖子神孫於太廟當奉以正統之禮於獻皇帝
廟當奉以私親之禮尊尊親親並行不悖者也先儒謂孝
子之心無窮分則有限得爲而不爲與不得爲而爲之均
爲不孝皇上追尊獻皇帝別立廟者禮之得爲者也此臣

所以味死勸皇上爲之也入獻皇帝主於太廟者禮之不得爲者也此臣所以味死勸皇上不爲之也夫成禮則難壞禮則易伏乞皇上念此禮大成原出聖裁匪由人奪奈何忽一日遽爲小人所破壞耶

又議孔子祀典疏

竊惟先師孔子有功德於天下萬世天下祀之萬世祀之其祀典尚有未安者不可不正臣謹采今昔儒臣所議上請聖明垂覽仍行禮部通行集議一洗前代相沿之陋永爲百世可師之典臣無任願望之至一諡號臣謹按漢平帝元年初追諡孔子曰褒成宣尼公至唐開元追諡爲文宣王宋真宗加至聖文宣王元武宗加大成至聖文宣王宋姚燧曰孔子卒哀公誅之子貢以爲非禮至平帝時始封諡褒成宣尼公蓋王莽假善以收譽遂其奸謀也國初大學士吳沈孔子封王辯曰後世之禮有甚似而實非者不可不察也且以追諡夫子爲王言之禮有甚似而實非不得位歿而以南面之禮尊之其說似矣然王君之號也夫子人臣也生非王爵死而諡之可乎哉昔者夫子嘗有言曰必也正名乎又曰名不正則言不順臣而王之于名正乎于言順乎春秋之時列國有僭王稱者麟經之筆削

而黜之蓋名者實之著也無其實有其名謂之淫名夫子
之生也不獲有尺寸之土今而以有天下之號歸之在天
之靈其肯歆之哉嗟夫有德必有位理之常也有其德而
無其位此則夫子之不幸也曾謂以無實之稱而足以爲
聖人榮乎或曰夫子之道王者之道也謂仲尼素王其來
久矣奚至今封之而不可吁謂夫子有王者之道則可謂
夫子有王者之號則不可昔夫子病子路使門人爲臣夫
子責之曰久矣哉由之行詐也無臣而爲有臣夫無臣不
可有臣非王而可稱王乎聖人不敢欺天也人其可欺聖
人乎然則當若之何曰夫子之澤不被於當時而其教實
垂於萬世事之以王之貴曷若事之以師之尊乎書曰天
降下民作之君作之師古者治教之職不分君卽師也師
卽君也二王盡君師之責者也若夫子則不得君而
爲師者也三王盡君師之責者也若夫子則不得君而
子無北面所以尊師也彼以王爵之貴爲隆于稱師者習
俗之見也考之經在當時聖門高弟之稱其師有曰孔子
有曰夫子其孫子思直字之曰仲尼蓋夫子既無爵諡則
稱之者不曰仲尼必曰夫子觀其門人弟子之不敢過號
其師則知以無實之諡加於聖人必非聖人之意也天下
之論每病於徇同惡異而不本乎至公至當之理論夫子

之封王則必相與和之以爲誇大矣謂夫子不當封王則必相與咻之以爲狂怪矣吁此所以行數百年之久而未
有敢議其非者彼之不敢議其非者必曰我畏聖人也畏
天下之罪己也若吾之說則雖得罪於天下不憾也懼得
罪於聖人而已曰請問今將何以尊聖人曰在明其道不
在乎王不王又前布政夏寅作政監曰唐開元旣尊老子
爲元皇帝尊太公爲武成王則追謚孔子以來歷魏晉隋唐各
闕然者也夫自漢時始初追謚孔子以開元二十七年
有加封然釋奠於學校止稱先聖豈可專以開元二十七年
年李林甫不學無術之謬制爲萬世成式乎且宣之一字
於謚法爲輕當時不過以配武成之號豈足以贊孔子大
聖人乎且歷世帝王所以尊孔子者尊其道也道之所在
師之所在也故以天子而尊匹夫不嫌於屈使孔子無其
道雖王天下豈足以當萬代帝王之祀由是而言稱帝稱
王皆未爲當豈若稱先聖先師之合禮乎又前祭酒邱濬
論曰後世尊崇孔子始夫漢平帝之世是時政出王莽姦
僞之徒假崇儒之名以收譽望文奸謀聖人在天之靈其
不受也必矣有若曰自生民以來未有盛於夫子者豈一
言一行之善而可以節惠立謚也哉然則不加以謚號將
何以稱曰千萬世之下惟曰先師孔子以見聖人所以爲

萬世尊崇者在道不在爵位名稱也又曰夫自漢平帝追
諡孔子爲宣尼公後世因謂孔子爲宣父又謂爲宣尼至
開元又加文與宣爲諡然文之爲言諡法有所謂經緯天
地者也孔子亦曰文王既歿文不在茲乎以是諡之固亦
幾矣若夫宣人之爲言諡法之美者不過聖人是諡之前而北
齊高洋李元忠南齊蕭子良隋長孫賢之數人者固先有
此諡矣天生聖人爲萬世道德之宗主稱天以誅之猶恐
未足以輕重哉又曰自古諡號必加以實字未有譬喻之
人之輕重哉又曰自古諡號必加以實字未有譬喻之
語者成之言出於尚書大成之言出於孟子成者樂之一
終也孟子以樂之始終兼聖智之全譬喻孔子成者樂之一
夷伊尹柳下惠之清之任之和而時出之蓋假設之辭非
真實之德也加此二字於至聖文宣王之蓋假設之辭非
所增益也一章服臣謹按唐開元間詔追諡文宣王仍
出王者衮冕之一服以衣之宋真宗祥符間加先聖冕服桓
圭一從上公之禮冕九旒服九章宋徽宗崇寧間始詔用
冕十二旒衮服九章金世宗大定間大成殿聖像冠十二
旒服十二章朱熹語錄曰宣聖本不當設像春秋祭時只
設主祭可也及按洪武年間新創南京大學止用神主不

設塑像今國子監有望像者不過因前元之舊不忍毀擲
以此觀之冕十二旒衣十二章實因前元之舊非聖朝之
制即濬論曰臣按塑像之設中國無之至佛教入中國始
有也三代以前祀神皆以主無有所謂塑像也彼異教用
之無足怪者不知祀吾聖人者何時而始為像云觀唐李
元確言顏子立侍則像在唐前已有矣嗚呼姚燧有言北
史敢有造泥人銅人者門誅則泥人固非中土為主以祀
聖人法也後世莫覺其非化其道而為之郡異縣殊不一
其狀長短豐瘠老少美惡惟其工之巧拙是隨就使盡善
亦豈其生盛德之容甚非神而明之無聲無臭之道也國
初洪武十四年首建太學聖祖毅然之見千古之非自夫
子以下像不土繪祀以神主數百年陋教乃革嗚呼盛哉
夫國學廟貌非但以冕流之尊而臨夫俎豆之地聖人百世
是乎致禮焉夫以冕流之尊而臨夫俎豆之地聖人百世
之師坐而不起猶之可也若夫從祀諸儒皆前代之緒紳
或當代之臣子君拜於下而臣坐於上可乎臣知非獨名
分之乖外而觀瞻之不雅竊恐聖賢在天之靈亦有所不
安也或者若謂既已搏土為之聖賢在天之靈亦有所不
以為泥滓似乎不恭竊觀聖祖詔毀郡邑城隍塑像用其
土泥壁以繪雲山載在令甲可考也矧所塑者特具人形

耳豈真聖賢之遺貌哉程頤論人家祖宗影有一毛不類則非其人彼親見其人而貌之有毫髮不肖似尙非其人況工人隨意信手而爲之者哉臣惟文廟之在南京者固已行聖祖之制今京師國學乃因元人之舊正統中重修廟學借無以此上聞者尙有以間未必不從今天下郡邑恐於勞民無俟改革惟國學乃天子臨視之所乞如聖祖之制以革千古之陋教如儒臣宋訥所云者誠千萬世儒道之幸此其一也

一 邊豆樂舞臣謹按唐開元閒詔祀先聖樂用宮縣舞用六佾宋徽宗大觀閒賜禮器一副內邊十器全豆十蓋國初成化十三年用禮部尙書周安謨議詔增六佾舞爲八佾初成化十三年用禮部尙書周安謨按國學之祭舊有十邊十豆故增爲十二前祭酒章懋論曰子之禮也郡縣之祭惟八邊八豆今增二焉止爲十邊十豆而已而通行天下謂之十二邊豆今增二焉止爲十邊十豆審之又夏寅曰邊豆增爲十二邊豆其說未明行禮者尙詳審之以爲十二邊豆八佾增爲十二邊豆其說未明行禮者尙若十三布政司各府行之則祭禮僭矣蓋天子之禮所以用於太廟郊天古之諸侯唯杞宋王者之後得用先代禮樂雖周公有大功魯用天子禮樂乎臣竊惟夏寅之論所以也況於今各府可用天子禮樂乎臣竊惟夏寅之論所以

橋當時之失其曰天子之禮所以用於太廟郊天誠然矣
 推孔子敬天之心八佾十二籩豆之禮肯安然享之而同
 於天乎至魯用天子之禮樂孔子誠不欲觀之矣然推孔
 子尊君之心八佾十二籩豆又肯安然享之而同於天子
 乎○配享臣謹按自唐以前先聖先師周公南向孔子東
 向坐至開元間始正孔子南向之位顏回唐貞觀間詔配
 享曾參孔伋俱宋咸淳間配享孟軻元豐間配享宋洪邁
 曰自唐以來相傳以孔門高弟顏淵至子夏爲十哲坐祀
 於廟堂上其後升顏子配享則進曾子父點乃在庶下從
 祀之列子處父上神靈有知何以自安所謂子雖齊聖不
 先父食正謂此也又姚燧曰江之左進曾子子思並顏孟
 別躋子張於曾子之舊由孟子而視子思師也由子思而
 視曾子又師也子思孔子孫也弟子於師孫於祖坐而語
 道者有之非可並南面燧知四子已避讓于冥冥中不能
 一日安其身於一堂之上況又祀無繇點鯉於庭其失在
 於崇子而抑父夫爲是學宮將以明人倫於天下而倒施
 錯置於數筵之地如此奚以爲訓又熊禾曰宜別設一室
 以齊國公叔梁紇居中南面顏路曾皙孔鯉孟孫氏侑食
 西向春秋二祀當先聖酌獻之時以齒德尊者爲分獻官
 行禮於齊國之前其配位亦如之如此則亦可以示有尊

而教民孝矣又謝鐸奏云學校之設皆所以明人倫明人倫莫先於父子雖齊聖不先父食奈何仍訛襲故以顏曾思三子配享堂上而其父則皆列祀廡下冠履倒置有是理哉爲今之計莫若別於闕里立廟祀叔紇而配以顏路曾皙孔鯉諸賢如先儒熊去非之論庶幾各全其尊而神靈安妥也又前學士程敏政奏曰自唐宋以來顏子曾子思孟子配享坐堂上而顏子之父顏無繇曾子之父曾點子思之父孔鯉皆坐廡下臣考之禮子雖齊聖不先父食而三代之學皆所以明人倫也夫孔子所以爲教與諸弟子之所以爲學者不過明此而已今乃使子坐於上父坐於下豈禮也哉若以爲此乃論傳道之功則自古及今未有外人倫而言道者縱出於後世之尊崇非諸賢之本意臣恐諸賢於冥冥中必有不安於心而不敢享非禮之祀者臣考之元至順三年嘗封顏無繇爲杞國公孟子別立一祠祀啟聖王以杞國公顏無繇萊國公會點泗水侯孔鯉邾國公孟孫氏配享庶不失以禮尊奉聖賢之意臣竊觀聖學失傳千五百年至程朱出而後孟氏之統始續則程朱之先亦不可缺況程子之父大中大夫封永年伯程珦首識濂溪周子於屬掾之中薦以自代而又使二

子從遊朱子之父韋齋先生追謚獻靖公朱松臨歿之時以朱子託其友籍溪胡氏而得程氏之學珣以不附王安石新法退居於洛松以不附秦檜和議奉祠於閩其歷官行己俱有稱述臣乞將永年伯程珣獻靖公朱松從祀啟矣王使學者知道學之傳有開必先明倫義不為虛文左邱明等二十二從程敏政奏曰唐開元三十一年始以議者無識拘於舊註疏謂釋奠先師如詩有毛公禮有高堂生書有伏生之類遂以專門訓詁之學為得聖道之傳而併及馬融等行之至今誠不可不考其行之得失可否而釐正於大明有道之世也臣考歷代正史馬融初應鄧隲之召為秘書郎歷官南郡太守以貪汙免官髡徙朔方自刺不殊又不拘儒者之節前授生徒後列女樂為梁冀草奏殺忠臣李固作西第頌以美冀為正直所羞即觀之則眾醜備於一身五經為之掃地後世乃以其空言目為經師使侑坐於孔子之庭臣不知其何說也劉向初以獻賦進喜誦神仙方術嘗上言黃金可成鑄作不驗下吏當死其兄陽城侯救之獲免所著洪範五行傳最為舛錯使箕子經世之微言流為陰陽術家之小技賈逵以獻頌為郎不修小節專附會圖讖以致貴顯蓋左道亂政之人

也王弼與何晏倡為清談所註易傳祖老莊而范甯追
晉室之亂以為王何之罪深於桀紂何休註風角等書治
之於孝經論語蓋異端邪說之流也戴聖為九江太守
行多不法懼何武劾之而自免後為博士毀武於朝及子
賓客為盜係獄而武平心決之得為不死則又造謝不慚
儒謂聖禮家之宗而身為賊吏子為賊徒可為世鑒王肅
在魏以女適司馬昭當是時昭篡魏之勢已成肅為世
封蘭陵侯官至中領軍乃坐觀成敗及母邱儉文欽起兵
討賊肅又為司馬師畫策以濟其惡若好人節益無可
之小者杜預所著亦止有左氏經傳集解其大節益無可
稱如守襄陽則數餽遺洛中貴要給人曰懼其為害耳非
以求益也代吳之際因所瘼之譏盡殺江陵之人以吏則
不廉以將則不義凡此諸人其於名教得罪非小而議者
謂能守其遺經轉相授受以待後之學者不為無功臣竊
以為不然夫守其遺經若左邱明公羊高穀梁赤之於禮
秋伏勝孔安國之於書毛萇之於詩高堂生之於儀禮后
蒼之於禮記杜預之於春秋之於周禮可以當之蓋秦火之
易可以卜筮傳存而遺經非此九人則幾乎熄矣此其功
不可泯者以之從祀可也若融等又不過訓詁此九人所
傳者耳況其書行於唐故唐姑以備經師之數祀之乎當

理學大明之後易程朱詩用朱子書用蔡氏春秋用胡氏又何以取於漢魏以來駁雜不正之人使安享天下之祀哉夫所以祀之者非徒使學者誦其詩讀其書亦將識其有補而考其奸諂淫邪貪墨怪妄之迹將自甘於效尤之地曰先賢亦若此哉其禍儒害道將有不可勝言者矣至於鄭衆盧植鄭元服虔范甯五人雖若無過然其所行亦未能以窺聖門所著亦未多臣愚乞將戴聖劉向賈逵馬融何休王肅王弼杜預八人褫爵罷祀鄭衆盧植鄭元服虔范甯五人各祀於其鄉后蒼在漢初說禮數萬言號后氏曲臺記戴聖等皆受其業蓋今禮記之書非后氏則不復傳於世矣乞加封爵與左邱明等一體從祀則僞儒免欺世之名賢者受端門之祀而情文兩得矣又曰孔子弟子當得其實而司馬遷史記所載多蘧瑗林放申枨三人文翁成都廟壁所畫又多蘧瑗林放申枨三人弟子所見增益殆未可據臣考宋邢昺論語註疏申枨從祀申枨封文登侯在東廡申黨封淄川侯在西廡重複無

稽一至於此且公伯寮愬子路以沮孔子乃聖門之蠹賊而孔子稱瑗爲夫子決非及門之士林放雖嘗問禮然家語史記邢昺註疏朱子集註俱不載諸弟子之列秦冉顏何疑亦爲字畫相近之誤如申枨申黨者但不可考耳臣愚以爲申枨申黨位號宜存其一公伯寮秦冉顏何遽林放五人既不載於家語七十子之數宜罷其祀若遽本處鄉賢祠仍其舊爵以見優崇賢者之意亦庶乎名實相符而不舛於禮也又曰洪武二十九年行人司副楊砥建議請黜楊雄進董仲舒太祖高皇帝嘉納其言而行之主張斯道以淑人心可謂大矣然荀況楊雄實相伯仲而況以性爲惡以禮爲僞以子思孟子爲亂天下以子張子夏子游爲賤儒故程子有荀卿過多楊雄過少之說今言者欲並黜況之祀宜也然臣竊以爲漢儒莫如董仲舒唐儒莫如韓愈而尙有可議者一人文中子王通是也通之言行先儒之論已多大約以爲僭經而不得比於董韓云耳臣請斷之以程朱之說程子曰王通隱德君子也論其粹處殆非荀楊所及若續經之類皆非其作然則程子豈私於通哉正因其言之粹者而知其非僭經之人耳朱子曰文中子論治體處高似仲舒而本領不及爽似仲舒

而純不及又曰韓子原道諸篇若非通所及者然終不免
文士之習利達之求若覽觀古今之變措諸事業恐未若
通之精到懇惻而有條理也至於河汾師道之立出於魏
晉佛老之餘迨今人以爲盛則通固豪傑士也今董韓並
列從祀而通不預疑爲缺典臣又按宋儒自周子以下九
人同列從祀而通不預疑爲缺典臣又按宋儒自周子以下九
行先儒之論已詳大約以爲少著述而不得比於濂洛云
耳臣亦請斷以程朱之說程子看詳學制曰宜建尊賢堂
以延天下道德之士如胡瑗張載邵雍使學者得以矜式
朱子小學書亦備載瑗事以爲百世之法臣以爲自秦漢
以來師道之立未有過瑗者矧程子於瑗之生也欲致其
與張邵並居於尊賢之堂其沒也乃不得與張邵並侑於
宣聖之廟其爲闕典甚矣况宋端平二年議增十賢從祀
以瑗爲首若以爲瑗無著述之可偏廢者臣考之禮有
但其身教之懿與瑗相望誠有不可偏廢者臣考之禮有
道有德於教於學者死則爲樂祖祭於瞽宗鄉先生歿則
祭於社若通瑗兩人之師道百世如新得加封爵使與衡
同祀於學官最得禮意謝鐸奏曰孔廟從祀之賢實萬世
瞻仰所係有若龜山先生楊時程門高弟伊洛正傳息邪
放淫以承孟氏不愧南軒所稱繼往開來吾道南矣實衍

晦翁之派雖其晚節一出不克盡從其言而新經之闢誠足以及衛吾道而不預從祀之列臣竊惑焉又若臨川郡公吳澄著述雖不為不多行檢則不無可議生長於淳祐貢舉於咸淳受宋恩者如此之久為國子司業為翰林學士歷元之官者乃如彼其榮忘君親而不恥昔人謂其專務聖賢之學卓然進退之際不識聖賢之於進退果如是否乎如是而猶在從祀之列臣固不能無惑况二人者皆太學之師其於廟祀黜陟之際尤不可不正也舉人杜華議曰嘗讀宋史有蔡元定者史曰朱熹疏釋四書及易詩傳通鑑綱目皆與元定參訂啟蒙一書則元定之橐又曰元定生平學問皆寓朱子書集又曰朱子論易推本圖書往定與元定往復而有發焉然則後朱熹死而生者於朱熹皆受罔極之恩惟元定獨為有功於朱熹死者可作朱熹之志可知也更復考其所著成書有律呂新書皇極指要洪範解大衍詳說等篇昔我太宗編輯性理全書指要新書固已擢錄至於範數雖入其子沈之所著者沈之所受則何自哉觀其命沈之言女宜演吾皇極數而真德秀又謂範數西山獨心得之沈之受於元定蓋不由師傳而自得之也可知矣先王制祀以死勤事者同所宜從祀臣謹詳敏勤斯道而竄死與古以死勤事者同所宜從祀臣謹詳敏

政所奏率多正論可採宏治初曾奉孝宗聖旨著禮部照
例會官議率爲沮格不行及按孝宗實錄云鐸議吳澄不
當從祀尙書傳瀚力詆鐸言爲謬又力稱前人之請爲有
見不可遽易侍郎焦芳曰所謂前人者蓋楊士奇也今天
下方議其當柄用之際雖從祀大事猶能私庇其鄉人可
又襲其非邪瀚竟引禮所謂凡祭有其舉之莫敢廢詩書
所謂率由舊章監於成憲以文其說而於吳澄忘宋事元
之大節畧不及澄遂仍舊從祀而鐸議皆寢論者謂士奇
之以澄欺宣廟非特私其鄉人而措意亦有在瀚不悟此
則唯溺鄉里之私而不顧君臣之大倫正道統之攸係乃
據爲舊章成憲再不可議然則楊時奏黜王安石之配享
當時安石豈無朝命而配享哉特其命雖出自朝廷而事
實由臣下阿私所親以誤朝廷而非天下之公議所以易
之後世竟不以爲過也此豈橫私意於胸中者所能與哉
臣詳杜華之議蔡元定宜列祀典以協衆論之公也臣又
按歐陽修乃有宋一代人物未與從祀嘗觀其所著公論
實有切衛聖道之功蘇軾曰自漢以來道術不出於孔氏
而亂天下者多矣五百餘年而後得韓愈學者以配孟氏
蓋庶幾焉愈之後三百有餘年而後得歐陽子其學推韓
愈孟子以達於孔氏故天下翕然師尊之曰歐陽子今之

韓愈也夫韓愈既已
從祀歐陽豈可闕哉

進大禮要略疏

張文忠
集奏疏

臣仰惟恭穆獻皇帝尊號廟祀典禮成備前者翰林院侍
講學士方獻夫集諸臣奏議禮部尚書席書爲之纂要上
請頒布矣皇上欲重其事復勅館閣儒臣纂爲全書臣愚
俾與有事不能無言焉竊以此禮之失非今日也自漢宋
諸君失之矣此禮之爭焉竊以此禮之失非今日也自漢宋
上之改非改今日也改漢宋諸君也臣等之諍非諍今日
也諍漢宋諸臣也是宜皇上之欲爲全書以昭一代君臣
之行也夫前之集議成於禮部猶從案牘之文有司之書
也今之全書出於史館宜從典則之體天子之書也有司
之書所以行於一時以曉凡愚不可遽廢也天子之書所
以傳於萬世以著令典不可苟爲也伏乞皇上嚴諭館閣
開誠布公必敝史書凡例以年月日爲綱凡於大禮有關
者每事必書每書必實至於諸臣奏議如禮者必采其精
不如禮者亦存其概備載聖斷以裁成之以見非天子不
議禮其權非臣下所得而竊之者也昔唐有開元禮宋有
開寶禮所載多制度儀文而已曾有如今日嘉靖之禮經

綸天下之大經立天下之大本者乎若但因仍案牘之文
未免有失典則之體疑非美則愛則傳焉者也皇上所
定之禮出於漢唐宋之上而所成之書肯出其下乎臣自
建議以來履歷所知無敢自欺輯爲要略誠有不得已焉
者也謹用繕寫成編裝爲二部一備聖覽一付史館采焉
又疏臣等伏承聖諭大禮書成有分毫未全亦宜添入又
伏承召入文華內殿面諭大禮書未備特命纂修傳之萬
世用心纂修臣等學之三長愚無一得夙夜不遑懼無以
彰聖孝答明命也臣曾以履歷所知輯纂述欽此然凡百九條
上乞聖裁已奉欽依送付史館以備纂述三代之隆垂百王
一人聞見而已竊謂斯禮之爲書也舉三代之隆垂百王
之法取之不可不廣擇之不可不精如奉迎皇上升及皇上
初辭藩府宴宴車駕發安陸等儀皆奉迎及從駕諸臣所
知也又如皇上年內閣大臣詳論大禮其節次御批及執奏之
詞召對之語皆內閣大臣所知也又如皇上年內閣大臣詳論大禮其節次御批及執奏之
孝心未遂五年有成兩宮無閒皆內監外廷老成諸臣所
知也是誠皇上至德要道真宜傳之萬世不可不謹書備
錄者也臣續考事實增爲要略凡百三十五條敬謀衆鑒
用代抄謄裝潢成部再乞聖裁候命下之日於凡所宜咨
問諸臣各給一部令以所知限旬月開詳送赴史

館以備采擇庶乎集
衆兒以成全書矣

王健題覆進樂律疏

竊惟聖王治定制禮功成作樂其治辨者其禮明其功大
者其樂備故禮樂者所以整齊上下諧和民物見天地之
序通鬼神之道首命儒臣修大明集禮而樂附焉其見於聖
諭有曰治天下之道禮樂二者而已若通於禮而不通於
樂非所以淑人心而出治道達於樂而不達於禮非所以
淑民而立大中必禮樂並行而後治化醇一此以見聖
智獨遠然遠覽觀昭曠之道察化理之原其所以昭示
考求無盛哉夫昔人謂禮樂百年而後興識者尙竊遲之
以爲不忠不恕之論況今聖代重熙累洽垂二百年則夫
禮樂之具其不在茲乎惟我皇上紹統御極執中恭和德
澤洋溢施於外廷及羣生治功隆赫倫制全盡祀天地
百世之宏規而廟樂固有未備者則經之不傳而教之不
原所謂心達者求知而無師知之者欲敦而無徒故與之
方且難也蓋當莊誦御製圖丘采章仰窺聖心之於樂有

神會焉數年以來德化涵育風聲感召一二臣工稍稍能
言其義當有奏請稽古樂以裨盛典者矣又有請復古樂
以神聖政者矣然而其說猶畧今太常寺典簿文察復奏
前因進古樂筌蹄青宮樂調等書卽所撰述較爲詳密看
得其書生黃鍾術有補解者以文武行列有分屬者以定舞也
九變有推明者以和調也文武行列有分屬者以定舞也
蕭管鐘鐃之屬有圖考者以正器也郊廟之樂倣諸周官
朝之樂倣諸虞宮之樂兼倣虞周而用之皆據經考傳
貫穿載籍法有得於往古論不詭於前賢庶幾能用心
之勤而聞樂之教矣但中閒大報一節欲移於冬至後九
日使符是改厥則置閏交節將至於愆期不改厥則享祀
受賀不容以失序均之未見其可而其他亦或有泥而未
融偏而難舉蓋以樂之義旣爲難知而氣之候亦未易考
固不得以一二之謬而并廢之也所據前項奏進等書請
下太常寺等衙門取其用宜於世者選能歌舞童幼肄習
每季終赴本部按試以別勤惰仍委照前教習使之益殫
心力益宏職業則所以考定中聲章宜和氣
當更有進於此者而禮樂並隆此其會也

王德乞簡輔臣廣錄用疏

臣惟自古帝王致治之盛必資於輔弼之臣而咨詢博采
當慎於任用之始故堯舜禹湯文武之爲君必求臯陶伊
傅周召以爲臣而其致治之隆有以參天地亘古今立極
垂教萬世咸取則焉洪惟太祖高皇帝繼天出治稽古建
官始責成於六卿列聖繼體守成因時立政復委重於館
閣逮我皇上軫念政本益重輔臣簡擇之命屢形詔旨聖
慮淵深思得真才以爲夾輔至真切矣近核大學士嚴嵩
題爲內閣缺人辦事奉旨會推來看臣卽見皇上憂勤惕
厲之心用賢圖治之急是卽堯舜禹湯臣卽見皇上憂勤惕
者也顧安得命世之佐以副側席之求乎選用之精任用
之當正惟其時敢隱衷少備采納竊惟大君者天地之
宗子大臣者宗子之家相陰陽賴之以變理臣工視之以
師法四裔觀之以賓服萬物因之以成德器識宏博以充其
材朝野具瞻以隆其望然後足以盡其德器識宏博以充其
言飾貌而迂疎不適於用強學博辨而執拘不通於時外
飾棄閑而中藏貪詐以濟其私陰懷蠱毒而妨賢而病國
保其祿此天下之大患也有一於此皆足以妨賢而病國
蠹治而殃民稔惡於無窮流禍於後世非特一時一事之
失而已使非辯之於未用之先而悔之於既用之後以致

上孤聖明下叢羣議雖譴斥有加而傷敗已著竟亦何益
於朝廷之萬一哉但知人則哲惟帝其難幾微疑似之間
誠有不容於不真者臣嘗考宋儒朱熹有言曰天地之間
有自然之理凡陽必剛剛必明明則易知凡陰必柔柔必
暗暗則難測故聖人作易遂以陽明則易知陰為小人凡其
光明正大疎暢洞達如青天白日如高山大川磊磊落落
無纖介可疑者必君子也使其依阿澠涇回互隱伏糾結
如蛇蚓瑣細如蟻蝨如鬼蜮狐蠹如盜賊詛咒閃倏狡獪
不可方物者必小人也此固取舍之極則而觀人之法也
簡擇輔弼之方亦豈有踰於此哉惟我皇上精察而慎用
之耳昔唐肅宗用楊綰為相一時大臣聲樂騁從率皆減
撤俄頃轉移中外翕然宋英宗相司馬光而遼人戒飭邊
吏慎勿生事開蒙遠人畏戢甚於誅伐此固得人之證也
夫二君皆中才之主慎用二臣猶足致效况我皇上以大
有為之君憂勤惕勵之心用賢圖治之急如此豈無若人
以應其求者乎此臣所以望皇上精察而慎用之也臣又
聞千金之裘非一狐之腋大厦之構非一木之材故國家
治化必賢才彙征而後可成昔虞周之際百揆庶牧悉賴
忠良先後疏附奔走禦侮罔非吉士用能同心共濟以成
雍熙永清之治仰惟皇上棫樸之化三紀於茲宜乎人才

永嘉縣志

卷三十二

三

輩出比隆前代頃者每遇廷臣員缺輒患得人之難豈生
才有古今之異哉良以進用之途未廣而遺佚之賢尚多
固有志節足以表世而嘉遜自肥才猷足以底績而論議
未及或以一青之徵而遂捐其終身之用或以東隅之失
而難收其桑榆之功又豈皇上愛惜長養曲成造就之心
也哉臣願皇上俯念機務重地簡自聖衷敷求正人以充
任用仍乞勅下吏部將節年薦舉遺佚人材公論共惜者
盡數疏名上請特賜超擢或遇缺填補輔臣不得擅其予
奪銓曹不得專其意見臺諫不得私其親識無使庸流下
品得以乘機濫進如有推舉不公徇情偏執者容臣遵例
糾劾務求允協則股肱惟人而朝無佞位功過並
使而野無遺賢降古之盛有道之長可坐而致矣

王良心請修德業光大考疏

竊聞孝也者治天下之至德要道人君宰制六合統理萬
幾任大責重而化理之原莫先於孝古帝王以孝治天下
始於宮闈而風行海宇者用是道也我皇上沖齡嗣位六
載於茲敬事兩宮孝養彌篤撫綏萬姓仁澤覃敷天下熙
熙然享太平寧謐之福有由然矣頃者皇上嘉禮告成荷
蒙聖母慈諭勸勉皇上修德保身復勅元輔張居正納誨

輔德又戒諭夫人婢子及太監馮保等調護輔導薄海內
外咸舉手加額曰聖訓戒真社稷無疆之休也及輔臣上請
洋聖謨昭法則垂訓戒真社稷無疆之休也及輔臣上請
宣付史館皇上心聖母之心必欲服膺匪懈而尤勉輔臣
以左右匡輔之益雖虞帝大孝曷以加焉臣竊慶遭逢忝
躍無已夫復何言但臣待罪諫垣誼當先事獻納況恭睹
慈旨諄復皆臣子所欲言而未能者陛下大婚肇舉方且
以道御情仰承懿訓臣安能無言以揚聖謨而贊成陛下
之大孝哉臣莊誦慈諭深思遠慮曰向學曰勤政曰聽信
老臣曰戒匪人至於慎起息節飲食尤深致意孟軻氏有
言曰上不欲求事親必以身守身之本也孰不為守身之本也
皇不移於近習而惟賢人君子之是親老成忠告之是聽邇
者皇上勉留元輔正慮學之未成志之未定而倦倦於調
元贊化之計意至殷也故訪始終優禮庶幾任賢勿二而治
功可成至於部院大臣則朝廷之股肱也引見而咨訪之
所以明一體之義臺諫諸臣則朝廷之耳目也言事而優
容之所以作敢言之風民困不可謂不恤矣然東南水災
邊陲地震呻吟憔悴之民可置之度外而莫之省憂邪財

用不可謂不節矣然賞賜饋餉費用不貲當公私困竭之時可以任其濫觴而惟以聖母之訓念茲在茲則心存寅畏而思皆合宜遇燕居則思撙節不以隱微而或忽遇老成則思優禮不以人近而或疎橫經問道雖終日而忘倦恭默思治雖日昃而不遑存之念慮不忘聖母之憂思措之施行儼乎綸音之告誠則德業日新上為天心之所眷下為民心之所歸祿位名壽之全其永保之矣臣又聞古聖王之事親也常朝者三而問衣問膳必安而後色喜今聖母雖還本宮其心必有不能一日釋者臣願皇上定常朝之儀孝養之禮視昔益隆則進見以時可遂天倫之樂而定省不曠益伸孝子之情燕閒之暇聖母亦得以從容諷諭而皇上之日進無疆永有所賴所以慰二祖列聖在天之靈為國家永久之計端在是矣

葉承遇定國是疏

臣聞帝王之道在知人而知人之道在進賢退不肖然衆言淆亂必折衷於聖而後國是可定也大舜明四目達四聰以大智稱矣惟執兩端而用其中此舜智之所以大也恭惟我皇上英明天縱獨攬朝綱撤壅蔽之私去多門之

弊直不世出之主也項因御史譚耀論胡執禮孫應鰲等
 事旨下吏部覆議此皇上好問好察之智也及部議既覆
 奉聖旨孫應鰲起用不出故意遷延明達前旨胡執禮行
 事酷狠俱著致仕員缺另行推補此皇上執中用中之智
 也大舜之智何以加之哉臣覩旨下部議初止於孫應鰲
 胡執禮二臣而已冢宰楊巍併議徐學謨四臣無乃抗明
 旨而排公議乎臣閱邸報科臣鄒元標論大臣難進易退
 事奉聖旨徐學謨著馳驛去張仕佩准致仕科臣徐三畏
 論留臺具臣等事奉聖旨熊汝達前管工誤事如何輒起
 用著冠帶閑往科臣張維新論慈禁興工具臣不堪大任
 事奉聖旨劉志伊著致仕俱吏部知道欽此天語森嚴聞
 者悚慄下之吏部所共知也揚巍獨不聞乎乃於徐學謨
 稱其老練熊汝達稱其古樸張仕佩稱其剛直劉志伊稱
 其清謹且目之爲老成正大而歎其去爲可惜推楊巍之
 心皆以皇上之所擯斥者爲非矣四臣之擯斥繇科臣之
 論劾也科臣之論劾繇羣僚之采訪也皇上何心哉從公
 議耳科臣亦何心哉亦從公議耳楊巍稱其賢而惜其去
 果何見也如稱其賢也則誤事如熊汝達皇上惡之阿附
 如劉志伊皇上知之巍獨不聞乎是非混淆賢否倒置非
 公是矣如惜其去也則朝廷愛惜人才凡大臣家居一經

撫按薦舉遇缺推補不忍終棄之也巍獨不知乎乍爲可
去乍爲可留非國體矣冢宰以天名官天道至大至正者
也皇上奉若天道尤至大至正者也皇上秉至公以納科
臣之論列楊巍任私意以薦已逐之邪臣過加標榜爲後
日起用之基裁抑直臣啓他日壅蔽之漸如御史丁此呂
攻訐時弊明旨所不取也而指其正大老成所見已與皇
上異矣皇上一天也所見既與天異其可稱天官之職乎
楊巍生平履歷素有才望儒紳之所敬仰但今晚節末路
一生患得患失之心不免固寵附權遂有徇私滅公之舉
且如堂考選官此祖制也一徇囑託至以曳白得官雖選
即爭之而不聽裁革頂首此新例也一徇吏請頂首盡復
其舊雖明旨在前而不忌此其用心似非純臣之道所宜
罷斥以警官邪者也參照吏部尙書楊巍謹始怠終色厲
內莅計在附權抗明旨而不顧意欲陷直排公議而不畏
以請託而壞堂考之嚴規徇私情而復頂首之積弊既失
鑑衡之體難總銓選之司伏乞陛下獨奮乾剛亟施夬決
將巍卽賜罷斥庶百官之表率可端朝廷之壅蔽自撤其於聖治裨益多矣

劉康祉覆邵康節錄後疏

竊惟夫子之道至宋而大明而崇儒之典至我明而大備故自夫子以下顏曾思孟以及程朱皆得垂珪結綬延及子孫非惟崇道實報功也道同而功異者何以其羽經翼傳多所發明探往聖之心源掖後起之趨步也卽造詣並深而著述稍儉者其報典亦稍嗇矣故邵雍暨周敦頤張載當時未之及此按臣攬轡中州九原興歎而爲邵氏錄後之請也蓋儒之道大暢於程朱而發端於周邵二子邵者周張之並時而二程之畏友其學由春秋而入易由理以該數而極其精微於所以皇極經世之書蓋河洛圖書之所淵源飛潛動植之所以兆應內聖外王之所以體備無不賅而存矣此其詣於諸儒爲獨精而功於諸儒爲並烈者也第其世遠年長已經三朝厯金元之兵戈懼譜牒之未確五百餘載之湮淪而一朝遽興廕叙恐國家有不次之恩而先儒受非類之祀合無行令按臣再行細核果係真正之派子孫與否據實上請徐議推恩又周敦頤張載二子其視邵雍探賾之學與齊而傳道之功亦埒諸生誦法彼此無殊今也崇道酬功此與而彼嗇則君子之澤未長而承學之意不饜合無行令陝西湖廣按臣一槪體訪真正胄裔與邵氏之後同與簪纓或徑照程朱或另爲擬議則首出大明之昌期有表章真儒之盛典似先朝若留

以待而人心益感以奮
錫極建標宸瀛鼓舞矣

周應期諫遣監臣疏

臣巡察宣大荒地回津準撫臣馮元鶚揭爲疆事敗壞已
極民情潰散可虞懇乞聖明急收監臣新命以成大美以
杜危機事內稱賊已破太原略潞安直趨固關漸逼畿輔
正宜急收人心併力固守忽奉上傳有十總監一時並進
之舉百姓皇皇駭悸至欲閉門徙業而遁賊卽未至已有
奔竄之形矣皇等因臣披讀未竟不覺椎心嘆曰誰司封疆
而令聖主焦勞一至此乎年來賊梳兵篋魚駭獸奔中外
並無足恃惟恃祖宗之深仁厚澤與皇上之惕勵憂勤耳
至山永薊遵宣大等處臣皆親歷其地市井荒涼村莊瑾
戶聞官府至輒驚而走一時而遣十監臣地方作何支持
卽諸監臣陛下選擇而使不致生事而長隨把牌磨牙吮
血嗟此殘黎能叩天閣而訴之乎津撫所謂皇皇駭悸閉
門徙業誠哉其言之也臣嘗慨國家衆建親藩欲其屏翰
王室乃闢尉怙威於外致失民心名城屢陷貪位慕祿之
臣反借護藩爲功名念之氣短今總監監視之遣其運籌
橫槊未必過於督撫鎮諸臣徒令猴冠虎翼魚肉小民粹

有不虞委而去之誰爲登陴捍敵者哉伏乞陛下俯採芻蕘立賜撤回尚以授勅責督撫以固圉責道臣以省刑寬徵收給人心責有司內地既安外寇自不能犯否則傲上坐罪亦可釋皇上宵旰之憂矣若增設監臣恐賊未至而地方習習多事未見其可也明者察未然況最顯者哉

陳堯言請靖難諸臣諡典疏

臣竊見皇朝永樂初年靖難時死事諸臣如尙書鐵鉉陳迪都御史練子靈景清侍郎卓敬黃觀侍讀方孝孺寺丞鄒瑾給事中黃鉞紀善周是修知府姚善知縣顏伯偉等未可備舉或忤旨或犯蹕或捍難櫻城或知事之不可支而從容自裁總之抱不事二君之赤心蒙禍最慘結二百餘年之碧血貞芳久埋幸逢聖作物覩之朝正際表廬封墓之會惟不靳寵褒於一字庶可振忠義於千秋說者謂事關禪代間有忌諱殊不知文皇帝靖難之師迫而後起天與人歸已昭然於天下後世若諸臣者獨懷高皇帝三十餘年培養之恩故百折不回甘死如飴富貴若晚斯不負在天之靈耳逮夫革除以後文皇帝每與臣下言曰彼食其祿自盡其心至永樂九年都御史陳瑛以屢逮建文

諸臣羅織苛刻坐奉職無狀下獄死十一年勅諭齊黃等
達親未逮者悉皆宥之時庶吉士錢習禮與練子寧有連
爲人所持學士楊榮以聞文皇帝欣然曰使練子寧尚在
族固當用之況習禮乎卽日下令禁止此其於死事諸臣
方有借忠憐才之意復何忌諱之有惟是褒崇之典若懸
之以待我皇上此舉也正所以妥靈二祖而善繼其志善
述其事以完累朝未了之局將見天地訴合神人交鬯薄
海內外瞻仰鼓舞頌大聖人之作爲超出尋常萬萬矣

張天麟劾岷藩疏

臣備員寶慶於崇禎九年內因巨寇竊發犄角臨藍荷蒙
簡命撫道相機撫剿又蒙欽差翰林臣馬世奇捧到勅諭
致書宗藩岷國主親親仁民恩義兼至正以邊方不肖有
司不能宣奉皇上綏懷德意故尊陟國主統轄一方一切
利病得與糾察無非惠此元元蓋誠重之誠念之也不意
有岷府僞官府校全不仰體皇上慈愛挑激藩王假傳令
旨擅用龍牌收罪犯以爲爪牙受民詞以恣剝削凡五屬
內有爭產報仇者借端投獻較量家產搜刮半進方免有
先赴院道控訴者被告避罪卽啟本報復非行有司註銷
卽行長史守備勾攝攫金滿志方免以致有家者破家無

財者禁斃始至害及一州隨後徧及郡縣道路以目冤抑
不伸岷國主寬洪度量但深居宴樂不察賢愚概行收用
以致奸邪得以乘機虐害民心解體前按臣所列單款千
百中一二五屬受害最烈者如違制則廣收無賴假長史
吳從哲假校尉蕭凌雲等擅受民詞借用龍牌提拿騙害
尤其尋常替襲藩王仍食全祿挾州私派每石秋米加徵
三升五合不由院司道府受封請護衛部覆不許卽私招
土兵三百餘名收養閒宅逃宗幹城等同選技百人入王
城放砲操演兵糧不許奏請強州私派廩餼四千石棍徒
黃雲試投獻男婦因加守備職銜管操佔鄉約所爲衙門
豎立旗幟扁其額曰盜威營奉令旨下鄉擅殺良民無數
搶掠民財二千金以石城妄奏土城擅派修砌因而指揮
王之陞鑽營差遣管砌堤一千五百餘丈八遞孫十四楊
益等每遞派相見銀五兩汛役八百名每日五分陞侵三
分每日點不到者罰紙一錢二分本官人役每日取供應
折銀三錢業經二載剝削不堪運石班軍民夫累死無數
如借人命捏啟害民則有如宗女王姐縊死閹宦王進忠
抄洗黃永裳之家財貢生曹夢蛟之監責如僂端打馬受
害則有如乘國妃薨逆下鄉拆毀陽宅陰墳強捉周間軒
之投入爲僕如以人命爲草菅則有如童生嚴中觀燈之

立斃國門販木商人莫大猷莫老五之四名梟首其餘細
微小事不敢妄瀆天聽似此天高法遠臣等法不能行稍
忤其意禍便不測臣職在監司專轄一方誠恐地方不安
民心變亂不但民心不得安有負皇上仁民之恩且慮親
藩不得安有辜維城之託僞官狼戾何足食耶伏乞勅
下本省撫按諸臣會同楚府將僞官狼戾校照款究贓正法
救民水火自固藩封字長
踰格仰祈聖慈鑒察施行

王瑞梅請飭吏治疏

自古有國家者靡不以收拾民心爲要務故民爲邦本本
固邦寧年來虜寇交橫骨邱血海卽此鋒鏑之遺黎無異
巢幕之燕子皇上慈仁天植念切痾瘼恨不卽起溝中而
奠之祗席然君門邃密堂廉之外疇能令呻吟入耳而瘡
痍觸目乎則宣播皇上之德意而所在撫綏者無如守令
嚴課守令之殿最而所在激揚者無如撫按與監司乃風
會漸降吏治日非上習焉而不察下飲痛其如何卽一錢
糧也正供足矣而此外有火耗羨餘滴珠幫貼等名色一
詞訟也重則戍配輕則杖笞足矣而此外有罰穀罰米罰
修梵宮修公廨等名色斯不亦額外徵求科條之所不載

者乎而未已也餉兵最急有一兵卽有一兵之餉乃兵額
日減餉無存留給發動愆七八月兵鼓譟矣卽以兵譟恐
喝士民富者貸千金數百金下亦數十萬之初猶以借爲名
後則以借而不返爲得計矣此民閒千萬之借數又皆官
府千萬之溢數也竟銷歸何處乎不可解也猶未已也
一詞而府廳州縣同時而差提四出者矣有一事而上下
鍛鍊一日而筭楚備嘗者矣瘡百孔痛甚矣總在民閒民亦
暮金何畏笑罵從他合來千瘡百孔痛甚矣總在民閒民亦
何辜而堪此乎紕繆相沿未易殫述夫今日土宇強半已
染腥羶卽幸脫刀鋒寤寐總成驚悸司民牧者寬徭薄罰
煦育千方猶恐無能起白骨而肉之若之何以貪暴令也
况時勢窮迫至今已極而道路光景亦大不同蓋以寇虜
之毒燄既然兵將之助虐又然震懼惴惴疑威感靡購故初
聞賊虜之淫劫猶咸切齒而腐心今則聊相慰藉藉曰總不
免耳初見賊虜之髡鉗猶共吞聲而飲泣今則姑自沈吟
曰計無復之耳嗟乎民心而豈甘有此也我亦何至使民
心不得不如也臣謂皇上之恥虜怒虜不如公孤百姓執
事之恥虜怒虜公孤百執事之恥虜怒虜又不如公孤百姓之
恥虜怒虜何也皇上一人耳百執事之恥虜怒虜又不如公孤百姓之
國之髮指眦裂者以爲怒而後敵愾之勇鼎鑊不能禦必

合通國之痛心疾首者以爲恥而後愧憤之激湯火不敢
辭誰謂民心而可仇后無常南胡北粵者乎蓋愚民蚩蚩
何知仁義嚮其利爲有德故報國之念常不如其保家而
禍福之心較倍明於禮義我 cannot 使之知有生之樂又安
能驅之有死鬪之心往者兩都秦晉之間金湯重襲而開
門迎揖者民心解也雉堞如故盤詰戒嚴而開謀暗藏嚮
導恐後者民倒戈而樂爲之用也可不大爲寒心哉伏祈
皇上勅下部院慎重銓選嚴飭吏治非實能父母斯民者
弗濫守令非實能表正寮屬者弗濫監司催科雖急盜以
有餘不盡者留之民間律例雖懸聊以借一警百者仁行
法外其火耗羨餘罰贖差提等弊嚴行禁革撫按諸臣卽
以此察有司之有無奉行月稽季報功罪隨之庶循良奏
而百姓安則衆志成城吾圉可回矣衝煩郡邑車馬駢翩
一應交際宴飲之儀無非民閒之膏血不思皇上布袍素
膳何等焦勞今日何日羌笳迭奏豈是徵歌設席之時胡
馬狂嘶斷非留髡送客之會所當并爲禁止者也伏乞聖
明鑒照施行

綏出關急安民疏

臣前閱邸報見皇上有巡關之旨隨於本月十七日具欲
張撻伐之威先審制勝之具等事奉聖旨云云不勝欣躍
今復傳皇上仍移蹕邵汀前進南顧又不勝駭愕也夫今
日三關告警賊虜之困我者非止一路此即多方綢繆注
以全副之精神猶恐以蟻穴成尋丈之潰而奈何其注
虜遂不憚倉卒出關也猛虎在前誰不思搏之爲快然必
先固我門戶集鎗戟手若而人弓弩手若而人而後羣起
而搏之虎乃就斃虎之斃困於我衆力之能制非困於我
有制之之心也此亦事理之較著者也然而皇上之急於
出關者蓋以恢復要圖須大雪恥豈僅偏安亦安能鬱鬱
久居此況從汀邵出南顧有萬元吉楊廷麟之兵矣進三
楚有何騰蛟之兵矣而滇旅之勤王粵餉之輸輓又將鱗
集於闕下乘勢待時亦惟今日此聖主大有爲之志氣車
書一統之規模豈待局促書生所能窺其梗概然臣竊意皇
上所謂兵與餉者不過僅據章奏之報聞耳亦何嘗實稽
其兵已在營可即惟我之驅使餉已在官可即給我之度
支乎借果有之而道路盤桓動輒數千百里皇上能使之
如鳥集鳥飛兔興馬逝靡然止於庭乎如其不然皇上一
出無可中止之地既不能須遲而待將趣駕而前亦如在
閩之不能安於閩也而勢又不能一蹶至時而從陸時而

舍陸荆棘風濤之間能保無驚蹕而觸舟者卽幸道路無虞矣而江右楚豫久罹寇躪能保無極目灌莽炊烟不接之虞乎則侍衛之衆必有嘆一飽之無時者淳沲麥飯蕪羹豆粥誰爲皇上馮異者乎此固道路之變事也而以言於今日則亦其常也以此而思出關於計便乎不便乎臣謂八閩土厚民豐爲皇上擁戴之始亦皇上發祥地也且聯閩者浙也浙東諸郡其稽首臣服者不必言矣卽江上方國安等之勁兵鄭遵謙等之義旅皆爲皇上矢報仇之力者今第轉餉以濟其匱乏皆吾臂指之使也且江右兩粵與閩繡錯而雲貴諸省脈絡相聯閩亦豈孤懸海畔四方呼應絕不相闕者臣願皇上弗以天下眇八閩於彈丸卽從閩中算天下之全局大家豎起精神延攬英材慎嚴賞罰司計者議餉司兵者議兵議將務使選一將成一將之功練一兵得一兵之用毋令循名有將而對壘無將餉有兵而荷戈無兵則簡而漸精積而愈足進一處樹一處之威聲至一郡復一郡之城邑勝算在我奚患犬羊不驅除土宇不全復乎蓋國勢至今日已是旣顛之大厦須鳩工庀材日計之不足者積以月月計之不足者積以歲經營量度漸次撐持庶獲寧宇若不審工師物力一意速成則塗飾徒勞根基何處不至傾圯不止者圖未獲而喪

已成竊爲皇上痛惜之矣臣亦何知國事而義激於衷語
無倫次伏祈俯鑒愚戇從長計議八閩幸甚天下幸甚

論著

宋

蔣元中經不可使易知論

聖人未生六經未作道安在乎曰斯道也不以無經而亡
聖人既生六經既作道安在乎曰斯道也不以有經而存
是知聖人之作經也蓋非專爲道設爲求道者設也後世
之人所以深究聖人之經者非以其經之難知也聖人之
難知也非聖人之難知也道之難知也蓋聖人之道在我
而與天下共之故發揮所蘊著爲六經至於說天也說事
也說體也說理也說志也燦然靡所不載丁寧詳復彌數
萬言而聖人之心幾無蘊矣嗚呼聖人之心待後世之人
知之也然而後世之人每以爲不易知者何哉抑經真不
可使易知耶抑道統於聖人而衆人未易知耶抑使天下
後世必深思而後得耶抑故爲淵源闊略之辭以俾後世
之人使常若不可知耶曰非也言出於道至深至遠非聖

人故爲難知也豈如間巷俚語聞聲而知意也聖人之異
於衆人也智愚相半也宜乎聖人昭昭愚者昧昧是則人
以爲難知者非聖人有以使之不可使知之則揚子之言是耶
非耶孔子嘗曰民可使由之不可使知之似聖人任術以
治天下愚曰不然聖人之心豈不欲人知哉直以民之愚
不可使知之耳推是說以驗雄之說不爲過也或者問曰
必若斯言則是聖人之道欲與天下共之不可得六經何
濟於世而斯民何望於聖人哉若雄之論非以經爲不可
知也特不可餓而知耳後世如有知者觀之則思過半矣
如有因而學者聞得其師治得其要業精於勤而亦未始
有不知者也其有終身不與知者是皆自暴自棄也非聖
人待知者未盡也然則明經之道其要安在曰經載道也
道在心也我之心與聖人之心類也以心明經者逸而有
獲以經明經者勞而無得學者不可不知也三代以上士
以心明經故經明而爲君子三代以下士以經明經故經
明而爲書生事業未足以副之也是非真知經者也何則
閒道雖寓於意言而非卽此可知也止求於意言之閒則
解頤折角之士皆可升堂入室矣則漢儒之陋也譬如說
譜者不善琴視勢者不善奕工律呂者未深於樂讀兵書

者未嫻於武業底於成識造於精不可以迹學也百工小伎皆以心得而況於經乎必有以心通不可以言喻者矣或曰道非言喻六經何爲曰將使學者由其所言逆其所不言者也而明於身反其身而求之無得也是以古之明經觀其言而明於身反其身而復於心及夫身久而安矣心定而明矣苟於一經之中有一言之悟則六經之義粲然明矣漢儒不然明於此而不明於彼徇於末而不知其本皓髮箋註之間以求聖人之道是猶觀後人之影而不知識其面也噫讀易而知爻象誦詩而知風雅漢儒之所能也至於觀易而忘象善詩而不說漢儒之所不能也故學者以爲難知也嗚呼道之不明久矣士之溺於書生之學亦久矣然出於吾心者固常在也苟惟反身而求之得於意言之表者經之明其庶乎

陳謙治體論

爲大者不屑於其細而事之非甚迫者君子不枉己以從之也今夫千金之家必不肯爲負販之所爲詩書之後雖甚窶終不敢鬻先世之圖籍何者所傷者大也夫位者姦之窺也名者孽之招也揭二者而制於上巍焉而尊確焉

而公主芒崖府閔焉而不露是以無所於窺而無所於爭
如操其柄而襲用之齟齬焉與民相貸於尋常彼習其勢
之輕也則誰不欲如上下之所爲欲而不得則不肖之心誰
憚而不發嗚呼計天下者豈不顧區區之小利而深防乎
廉隅之際者以此昔晁錯之爲漢謀也募民入粟以授爵
免罪夫上之獲利以佐國也下之脫禍而去刑也一舉而
二利從至便也而識者每曰不可長愆而壞法也儒之論
大抵迂闊而不切時變然使稍知禮者觀之逆指其弊則
盜不食而死無盜貿貿然以自感也今天下無遠慮狗一
切而忘大體也淫涵者先生所禁今反勸焉崇釜鬻之養
盛醪醴之設白晝大都之中列娼優具幄繡耀市人而招
誘焉門巷之子僧賈商俠輕剽以逐什一之利輩流所不
齒國家捐告身而委之曰吾官爾爾吾祿爾此甚可惜也問
其然曰利之也豈惟是哉牒數萬以髡天下絲粟之入耳
與異端耗生齒不恤也楮數寸以權有無歲月之智耳長
奸民驅桎梏不顧也夫伐冰之家不與民爭利而說遇以
獲禽善御者所羞爲至於朝廷獨安爲之翫其細而忘其
大愚恐天下之窺且爭也一二年僅有寢者以今用度而
欲盡革是甚難也然今之言治者動皆欲堯舜其君至反

革其所爲中才以下有不敢刮目焉然則去其太甚亦當柄者之所宜講者也蘇子曰使管仲而愚人也則可管子而少知體豈不爲之寒心哉

葉適兵總論一

今事之最大而當極論之論之得其要而當先施行者一財也二兵也雖然財之所以爲大事者繇兵之爲大事而已其舉措爲廢興之決無先於此世之言兵者充塞爛漫可聞而不可聽可聽而不可行者無他焉言古者簡易徑省無兵之患而有兵之利然而接乎今之異勢異宜而不可用也則古雖善而何益言今者繁密重滯有兵之患而無兵之利然而習乎今之旣安旣成而不可改也則今雖不善而何損雖然此非真擇利害以定取舍者也誠使真擇利害以定取舍則雖不必簡易徑省以募古人之名而今日之兵其有患而無利曉然庸人皆能言之豈可不亟圖而亟變乎蓋嘗慮之三代之兵乘兩漢之郡國管仲之內政隋唐之府衛此古人之美名也自府衛變爲招募召募之法壞而邊兵始重於是藩鎮之亂起收藩鎮之重勢而人主聚兵以自將爲名竭天下之力以養之及人主不

能自用而柄任已不專於諸將矣則四顧茫然無所統一
於是內則當憂其自爲變而外不足以制患至於有莫大
之兵而受夷狄無窮之侮此非今世之所謂實患者乎美
名不必慕是各度其時之所當變此不可以言智矣實患不
能制是又不知其時之所當變此不可以言智也姑試言
屯兵有常制以合今日之事有四有邊兵有宿衛兵有大將
食而固徵塞也宿衛兵者因都邑所近之民教成而番上
與募士雜國廩其半而不全其養也大將屯兵者悉用募
士而教其精銳全養之而已州郡守兵者以州郡之人守
之而不以州郡之力養之也故兵制各行而兵力不聚然
後有百萬之兵而不困於財矣故進則能戰退則能守而
不受侮於夷狄今也一之邊兵募也宿衛募也大將屯兵
昔有舊人而今募其人名之曰禁兵也四者皆募而竭國
力以消盡而今募其人名之曰禁兵也四者皆募而竭國
力以養之是徒知募而供其衣食耳此所以竭國力而不可
養百萬之兵也力則已困用則不可故進不可戰退不可
守百人跳梁而一方震動而夷狄之侵侮無時而可禁也
臣願陛下審慮定計以分四者之兵而變今之法
不過二年法行制定財不足爲大憂而兵可用矣

兵論二

自唐至德以後節度專地以抗上令喜怒叛服在於晷刻而藩鎮之禍當時以爲大論矣然國擅於將猶可言也未久而將擅於兵將之所爲唯兵之聽遂以大厯貞元之間節擅於將人皆知之將擅於兵則不知也大厯貞元之初人度固已爲士卒所立唐末尤甚而出五代接於本朝之初人主之興廢皆羣卒爲之推戴一藩鎮豈不疎哉太祖旣稍收較而論者特以爲憂在於藩鎮豈不疎哉太祖旣稍收節度兵柄故汰兵使極少治兵使極嚴所以爲固者也羣臣服海內者太祖統紀綱御之力非恃兵以爲固者也羣臣不考本末不察事勢忘昔日士卒奮呼專上無禮之患而反以爲太祖之所以立國者其要在兵都於大梁無形勢之險其險以兵夫都於大梁因周漢之舊而非太祖擇而都之也使果恃兵以爲固則連營百萬身自增之不待後世也其數乃不滿二十萬何哉不以兵強前世帝王之常道也况太祖之兵不滿二十萬其非恃兵以爲固也決矣召募之日廣供餽之日增蓋端拱淳熙以後契丹橫不可制而然耳康定慶厯謀國日誤恃兵爲國之說大熾不禁而後天下始有百萬之兵弱天下以奉兵而其治無可爲

者矣而上下方揚揚然以爲得計爲之治文書治財賦盡
用衰世哀刻之術取於民以啗之而猶不足及其不可用
也則又說之俛首以事驕虜而使之自安於營伍之中也
故王安石欲爲神宗講所以銷兵之術知兵之不勝養而
猶不悟籍兵之不必多教諸路保甲至四五萬陰欲以
代之正兵正兵不可代而保甲化天下之民皆爲兵於是
耗之形見而天下之勢愈弱矣元祐廢罷保甲史臣以爲
太祖設階級之法什伍壯士以銷姦雄之心兵制最多而
百餘年無禍亂王安石不足知此者實錄所載蓋當時
議論之本原也雖然王安石則信不足以及知此而不爲王
安石者豈能知之哉至於紹聖以後則又甚矣保甲復治
正兵自苦內外俱耗本末並弱大觀政和中保甲之數至
六十七萬二法皆弊名具實亡故事制大壞而士卒不能
被甲荷戈平民相挺化爲盜賊幹離不始挾兵纔萬餘長
驅而至莫有敵者倉卒遣人召白徒以勤王京師失守則
勤王之入寇掠遍天下矣嗚呼痛哉養兵以自困多兵以
自禍不用兵以自敗未有甚於本朝者也而議者猶曰恃
兵之固制兵之善可因而不可改可增而不可損是厚誣
太祖而重誤國家也加以四屯駐之兵又昔所未有以數
倍祖宗之財用於四總領之巨壑而州郡又各以廂禁兵

白因侵削民力至於空盡問其外禦則曰請和不暇問其
內備則曰倉卒可慮統制統領總轄路鈴將兵之官充滿
天下坐糜厚祿而兵未嘗有一日之用方今國未見有難
治之弊敵未見有難破之驗徒以自困於兵浸淫重滯不
能輕利其一曰四屯駐大兵之患其二曰州郡廂禁土兵
弓手之患去一患而得一利一州之兵患去則一州利一
方之兵患去則一方利兵患去則兵強惟所用之
無不可者陛下果決於此豈有久而不革者哉

陳季雅論政權

政權不可一日不在朝廷不在朝廷則在臺閣不在臺閣
則在宮闈在朝廷則治在臺閣則亂在宮闈則亡國家之
興亡治亂皆本諸此田蚡招徠賓客薦進人才起家則至
二千石在當時固不免專權之失使武帝以蚡所用多非
其人則選擇一相委任責成亦奚不可奈何帝不能用堪欲
攬威福之權歸之一己然聰明有所不逮則耳目必有所
寄故置加官及尚書之屬自此以後薦引人物盡在左右
侍御之人衛青幸則薦主父偃嚴助幸則薦朱買臣楊得
意幸則薦司馬相如與其假借左右孰若與宰相同之也
大抵天下之事制之在始政權最不可下移一移之後所

失當愈下是故元成以後政歸闇豎而宰相之權愈輕未必不自武帝始也

論厚歛

自古爲國將厚歛以取民必以嚴刑峻法爲先所以然者蓋衣食生民之命賦歛繁多怨讟將興物論將騰若非峻法以鉗天下之口使之俛首喪氣於下則法無緣可行武帝之興外事四夷內興工役財用不繼始取文景賦歛之法一切變易增加初來未理會財賦只於刑法上加功招進張湯杜周之屬爲廷尉作見知故縱監臨部主廢格沮誹之獄上自公卿大臣下自百姓皆畏法鉗口而不敢議而後桑宏羊孔僅之徒得以行其策太史公識得此意故不與桑宏羊孔僅作傳却於食貨志言之如所謂法嚴令具張湯杜周變法之因却於食貨志言之如所謂法嚴令具興利之臣自此始則其意可知矣

戴仔郊社說

郊以祀天神社以祭地祇兆於四郊皆所以祀天而社則在國中自諸侯公卿至士庶人皆得祭祀而非天子不可

以祀天此尊天親地之義也宗廟之禮以享人鬼不當用於郊社拒鬯不當用於郊王者之先皆感太微五帝之精以生說無所稽特起於王莽光武之用議而成於康成之以讀讖夫郊爲祀天神之盛禮周則以文王配之此以稷配之禘爲享人之鬼之盛禮周則祭以文王主鬯則以文王配之此以親主疏之義也以稷主祭以文王主鬯則不可郊社之禮並祀則不可祀天於郊則可又祀於明堂則不可郊社之禮皆壇而不宮人道則有宮室祀上帝於明堂與合祭天地均爲不經蓋由後世尊孝經與衛宏之詩序故承其僞而弗察也

天說辨

易傳曰一陰一陽之謂道道不出乎一陰一陽而已在天者謂之陰陽在地者謂之柔剛在人者謂之仁義剛柔仁義乃陰陽之殊名天以氣覆故謂之陰陽地以形載故謂之柔剛人以心運故謂之仁義氣有盛衰形有消息陽進則生君子陰用則生小人或爲鋤耨以播以藝或爲斧斤以斲以伐然後天地之道日新而無窮焉故有君子而禍干其時也有小人而亨得其時也然天地之道生長者其常而殺伐者其不得已陽治既極陰必伐之陽之復升乃

得其情故曰復其見天地之心乎故君子恒福小人恒禍亦維其常故曰天道福善禍淫言天理之常也三才各有職焉仲尼之徒罕言天命不敢越其職也人之職何如曰人道仁義而已矣仁義者所以使治而毋至於亂每扶陽而抑陰焉此之職也柳氏不知人職聒聒焉言陰陽雜天人之事而混言之以區區之身喻天地不知甚矣奚辨焉非國語辨

尙觀非國語之書而見宗元之寡識也夫孔子不語怪力亂神不語之則是矣謂其盡無則固不可也上古之世風氣初開天地尙闢民神之道雜糅弗章自顓帝分命重黎秩叙天地然後幽明不相侵黷書所謂絕地天通周有降格者也不但古爲然也今深山大數之中人迹鮮至之地往往產異見怪民人益繁而後聽聞邈焉故近古之書多言怪神不足異也不特國語言之也書六十篇往往有是焉盤庚告其羣臣諄諄乎乃祖乃父告我高后之說周公說於三王金縢之冊至今存焉故記曰夏道尊命殷人尊神率民以事神先鬼而後禮彼誠去之未遠也周官宗伯有巫祝禱祠之人掌詛盟禱禱禱之事攻說及乎毒蠱厭禳施於天鳥牡棹以殺淵神枉矢以射怪物世之讀者往往

懷子厚之見遂以爲非周公之書夫國語之書皆先王之
遠訓周公之書乃先聖之典禮其大經大法章明較著者
與日月俱懸其小未能明者存之以俟其通爾故孔子曰
多聞闕疑慎言其餘則寡尤多見闕始慎行其餘則寡悔
觀子厚與吳武陵以化書知不免乎後來之悔尤矣夫古
之爲享祀朝聘以觀威儀省禍福也故古之觀人也受玉
而情受賔而不敬或視遠而步高或視下而言徐與夫言
之偷情手之高下容之俯仰皆有以見其禍福何者其民
氣素治故其亂者可得而察也子厚見夫今人之亟有是
而未嘗死亡也則以訾古此朝菌蟪蛄之知也夫知人而
後可以知天子厚不知民則焉知天道伯陽父仲山甫太
子晉單穆公單襄公伶州鳩史伯衛彪傒觀射父九人語
言皆不可訾訾之其爲不知大矣叔孫僑如之貪邪卻至
之法侈矜伐不可獎獎之其爲同德明矣子貢曰文武之
道未墜於地在人賢者識其大者不賢者識其小者吾讀
國語之書益知此編之中一語一言皆文武之道也而其
辭閑深雅奧讀之味尤雋永然則不獨其書不可訾其文
辭亦未易貶也故予尙爲之說曰嗜古者好古書便今者
喜俗論嗜古者多迂誕便俗者多疏快予迂誕之徒也亦因以自道云

明

王欽豫三教辨

三教之沿傳久矣必欲以臆見苦排之予哂也顧異流倡之而世之自立丈夫血性男子亦從而和之予更哂也和之而弗察則亦已矣夫而乃更有非君子之崇正者則安得不破其說以藥之且夫所謂教者何義哉原天之謂教完人之謂教又必其孤行無耦而後可以爲教教者一而已矣可以兩立焉是尙謂之教也乎彼且肆然立爲三者夫亦以有儒遂有釋有道而李耳釋迦又與孔子同時耳夫教一而已矣於何有三如有三則必孔子爲勑儒之人而後可孔子而勑儒也哉一畫肇開儒端已剖韋編之絕儒道大明以予觀之孔子殆儒中首功之臣而儒之道則偕天而聞者也若夫釋與道何助乎不聞柱下之先就何祖述與夫牟尼之始誰可憲章而第炫然用私術以煽天下其言道言德不遇傍儒以起教其哉仁賊義則又立異以勑儒縱曰操彼道而登彼岸精光亦無可撲滅然而井天之見空寂之方猶之紫色蛙聲而顧並聖道而三之吾不信也夫人亦有言學仙不成魔高千丈道之爲教固已荒

唐無當矣而況佛者夷狄之教乎聞嘗聞之儒者之道爲
布帛爲菽粟而人需之仙則山人佛則弗人今天下丈人
男子各誇自立各負血性言及釋道輒降氣弭心若見爲
當然而無所怪此無他皆由沿三教之名而不窮三教之
本未無惑乎其比非類而不知也雖然使儒自孔子初也
將遂可夷而等其於二氏乎哉吾意大聖建宏猷卽以一身
原天而完人應無不可孤行矧夫未有孔子而儒已偕天
而開奈何貶儒於戎貉以滓太虛之天奈何弭異於門牆
以愚直道之人誠不可識李耳釋迦忽比高於庖犧諸聖
人能無顏甲否也然則三教之稱也孰始之曰非古也殆
魏晉以後佞佛者之爲之也何以明之馬記九流班志十
索有漢史何所諱而不言乎此其爲後起明也且始焉託
之雁行以攀附終焉據鼎足而相持首儒而次釋姑讓以空
名先釋而後道固居其上位又非釋流之私智而何獨怪
夫學者於傳不徵於古無驗猥以後來妄立之名強誣生
民未有之聖不知其何所信而執之乎由是觀之誠不可
謂老氏釋迦之罪也然則以今之羣而好之羣而尊之也
曷不可并儒而抹之僅以二教誇炫天下哉顧何以力不
能勢不可其心神喪却瞻顧而不敢爲則曰理之不容沒

也人試窮三教之根源而并求三教之稱之所自起當必
煥然霧釋夫將自哂不暇又何暇爲異之翼乎此古今羽
翼道真者涕泣道之而不醒而
吾不得已以談笑道之者與

周旋梅花賦

互古互今之世運一闔一闢之乾坤朕兆罔極塊比無垠
四時迭轉厥始惟春爲四德之元首體造化之至仁少昊
司令勾萌取辰於是羣卉甲拆發舒寅津敷榮苗秀鬪美
呈新釋綠葱龍而可悅冶紅穠麗以豐勻雖萬千之品彙
咸承恩於化鈞舞而玩賞九衢羅綺以續紛是玩物而縱逸
之塵一國如狂而玩賞九衢羅綺以續紛是玩物而縱逸
皆逐妄而迷真倏忽顧景祝融耀輝南薰爽塏萬類華滋
時則有梅榴萱草蘭蕙荷葵粲錦雲之郁麗含金萼之葳
蕤廉溪美香遠益清之可愛太液誇豈如解語之尤奇
陰隙過兔走鳥飛青黃稅駕流火西馳光景瞬息蓐收屆
期商金用事玉露凝珠蟬動歐陽之賦情關宋玉之悲羣
芳搖落衆木離披時則有木蓮錦綻甘菊金舒艷錦官之
百雉擅邱林之一枝雖暫榮風霜之際詎能耐久而待時
若乃權歸顓頊令屬元英天地閉塞冰雪嚴凝舞六花之

王屑堅三尺之凌冰萬物改觀山骨峻嶒魚潛不躍鳥焚
無聲藍關之馬不進灞橋之詩未成金帳殘斟今酒懷放
浪玉堂淪茗兮詩骨伶俜迴視嚮日之妖豔罔不浩然而
喪情時有廣文先生博通物理目視榮枯感歎不已浩然
太息曰草木無情有若是乎越乃信步林垞從容杖履陟
勝窮幽究其所以訪徂徠之大夫叩淇澳之君子莫不偃
蹇輪囷樵悴委靡於足摩挲詩眼聚精會神徘徊野橋之
曲睥睨清溪之濱忽覺寒萬玉炫目幽馨襲人芳姿挺乎冰
雪勁氣超乎松筠秉歲寒之節操鄙埃壘之囂塵一枝破
臘萬卉讓春晴吳繁華推少陵之豪邁暗香疎影仰和靖
之清新滕六爲侶霜娥作隣翠禽偷眼而欲下粉蝶斷魂
而莫親出則金馬玉堂以大用處則竹籬茅舍以棲身倩
良工而摹寫惟光華而逼真此則特見其隱之晦而未覩
其用之伸至若笳鳴玉塞笛弄江城奏吟鳴之二調卽飄
墜而滿庭舞蝶起而無力嗅魚鱗兮不腥風韻暫輟佳實
告成屏浦雨肥兮曹軍因之而止渴傳巖叶夢兮商鼎藉
之以調羹說由之而大用操從此而聿興夫如是得非斌
媚於一時者不可以並而凌寒獨秀於嚴凝之景者宜使
予品評者乎先生感歎旣已旋卽草堂假寐而息眇焉若
有一人玉骨冰肌鳴瓊瑤之佩披五銖之衣香氣旖旎趨

走坐隅揖而言曰僕乃羅浮隱逸庚嶺清癯立高標而自適厲素志而不移惟貞惟白不磷不緇自水曹之既往幸和靖之見知寂寂千古賞音甚稀何今日之邂逅蒙眷念而不遺極情品詠光賁林扉於茲序謝願致一辭先生胸盤錦繡款唾珠璣請為之品藻成一畝之瑰琦繼廣平之賦續六橋之詩罔俾唐宋之英傑徒擅厥美於前時言既飄飄而往杳然無聞惟覺風露颯爽異香郁芬嗟此平生之奇遇焉可自托為不文遂操觚執翰勉為效顰

書簡

宋

周行己權樂清上韓守書

浮沚集

竊惟人子莫不欲孝於其父人臣莫不願忠於其君而其勢有得行有不得行欲者何哉蓋子之於父親也近也故其為孝也莫行不得其所欲臣之於君尊也遠也故其為忠也莫必獲其所願是以古之君子在畎畝而不忘居江湖而有懷誠以樂其道不若親見其君之為堯舜著空言不若行事之深切著明此所以伊尹幡然仲尼遑遑馬遷留

滯而嘆息也某生五十一年而秩未離乎九品仕二十七載而官僅書乎四考其於賢能可謂至卑矣其去堂陛可謂至遠矣然而願忠之心豈不欲與夫朝夕左右侍從之臣同効其尺寸哉獨以其分有所局而其勢不得通雖有吾身親見之志與夫著於行事之實將何所施乎所以踴躍涼涼徒竊嘆於周南而長興懷於魏闕孰吾知者今乃幸以攝事小邑獲預應奉因得效其尺寸之勤乃若高官大職顧豈敢望哉年衰志闕無所可爲獨欲終老海濱卒其區區之願鵲鷦之巢一枝而足偃鼠之腹勺水已盈自度智能不過一邑一曹得與役屬以勤享上官卑而志同職小而忠一左右侍從之臣承命於上趨走服役之臣效力於下上下相濟小大不渝此事所以成而分所以定也某昔者薦名嘗出先德之門而筮仕之初於今太守爲同僚之分以足夤緣因得自列伏覲高明憐其故家之舊物而采其願忠之誠心不憚一舉手之勤以置於一枝棲息之地他日補報未必在衆人之後也

林季仲答林英伯書

竹軒
禱著

某悚息俗狀中人憤憤如醉發所惠書得廢井之語曠然復醒井德之地易以喻性改邑不改井言自古以固存不

可遷也學佛者多云百骸俱破壞此物鎮長靈豈有見於
是乎古人之學用心至到蚤夜浚治必有甘冽之泉可爲
人食而後已浚治而不及泉猶爲棄井耳英伯試思今日
之學浚治之功若何自僕觀之初未下一鐮也退之秋懷
詩汲古恨短綆古人歲月不虛度也時惟秋矣我方葺敝
廬兀兀坐木札中與匠者較短量長朝以求井蓋督如也故
日就枯竭且乏朋友麗澤之利反以求井蓋督如也故人
亦憐而教之否知非久入城跂足以埃更願慎餘暑自愛

薛季宣答葉適書

浪語集

某聞之務博學者必自約樂教人者必自修執事通百氏
諸子之書可以爲博矣爲人師而學不厭又知所謂約矣
聽於塗說不以某之不肖惠然肯顧投以尺書望我以急
難扣我以學問以某之不善武鄉之英特謂我聞風而慕之
王梅谿鄭著作一鄉之善士許以雁行而肩隨某雖至愚
自知甚悉未能爲己何以爲人未克自明於何明物若武
鄉則吾豈敢王梅谿之方正鄭著作之冲養是皆吾黨之
望願學焉而未能力者其又何可擬耶讀誦觀顏不知何自
而得此也范文正公鎮陝右孫泰山張橫渠初以遊客干
之公能資以讀書告之名教之樂二先生賴以有立卒爲

天下大儒范公得位時任大非吾事也名教之樂願與執
事同之執事秀發妙齡多聞多識通於古明於文行不自
賢不恥下問一日千里吾知方發軔焉及於八陳爲邦將
無著鞭之太蚤而某庸敢當也約文以禮顏氏所以立於
仲尼之門執事方以教人敢請從事於此若夫夏時商輅
周冕韶樂四代損益孔子非亞聖弗之告先王寓兵邛井
建之邦國舞之行綴教民後戰不以軍容入國有本有末
蠲等之學難矣乎言志而賢舞雩問陳而稱俎豆爲學自
有次第仲尼豈欺我哉故欲執事先之軍旅爲邦願執事
之姑舍是也抑某又嘗聞之子夏曰君子敬而不失夫不容
恭而有禮四海之內皆兄弟也士患敬恭之不立夫不容
奚病焉脩道教人執事其從容於是矣執事有親之奉日
虞甘旨之弗給不抵人而抵我其所望於我者甚厚且深
某方空腹而遊獨行踽踽不足相爲軒輊以孤之來之意
甚恐姑誦所聞於博約之說者復之
將命執事之不我棄庶幾能諒之乎

葉適與戴少望書

水心文集

奉別忽已三改月詹望詹望日來伏惟起居佳勝十日前
及陳傅良遇於黃巖說足下決以此月初三日行天下求

世外之道欲抵書已無及徒益悵悵昨日里人來知尙因循未果行始在韓丈時屢聞少望此言心謂戲耳不識誠有之少望天下奇才於今世不過數人造物者所底惜奈何以少得喪一不當意遂爲此等絕世自好蒼莽不可知之事驚驚怪怪切計諸公已有爲少望留行者若猶未也則願進其愚往時陸惟忠學內外丹法東坡先生謂之曰子神清而骨寒其神可以仙其寒亦可以死惟忠學之每幾乎成物輒有以害之則嘆曰吾真坐寒而死矣今爲足下言不可出之故不但寒耳古之至人未有聞也未有行也必疲筋骨極精神甘賤役甚至侮蛟龍冒鋒鏑竟其死而不知倦然猶有不聞間之而不行者吾料足下是數者皆不能盡平時揀求美便斥棄酸醜尊夫人賢兄佳愛故曲徇其所欲耳步行至十里外足弱不能前而反非舟車不能越鄉將遂舍之而去道里甚遠荆襄江淮土俗嗜好不同東浙卽不幸一日有饑寒勞苦之閒風雨霧露之氣從而乘之疾病且作旁無親黨藥物不至則爲之奈何無乃賊其所愛之身失天生賢之意廢於賢母兄之望乎想少望一讀至此可以遂釋前念也列仙者必用心於寂寞篤學於無爲已而道充其中大發乎外是以旦暮於吳越之區飛翔乎秦漢之郊縱意所如無留焉者足下猶未能

充也遂肆然發之擄取其名而不思其難恐力窮氣盡則
必有俟之者焉故為少望計當杜門端居危坐深念時用
參同契九倫之書老氏道德言以增益其所未定道引關
節屏閑思慮以遠去少年之習高人長者當襲武而至矣
僕舊讀柳子厚文獨愛其序送婁圖南極有理使世之君
子畔其道以從異學勞而無成者可以自鏡正惟不勞而
成固與龜蛇木石無以異耳願足下深思惟忠之事而反
復子厚之意救世俗之失正諸子之非明聖人之經是所
明於少望者鄙言可聽不可忽歲行盡矣寒苦惟厚自愛

項喬五上張羅峯閣老錄東

喬薄命自貽疏遠瞻戀山斗不任懸懸日讀辭歸兩疏出
於尋常意見之外眾皆駭而疑之喬謂老先生不以寵利
居成功之意懷之久矣嗣以大同之變遲留至今耳若得
請焉固老先生素志也眾莫不嘆老先生高見謂近世名
公所未有也然竟不俞允焉天下幸甚喬輩幸甚矣竊惟
老先生得君之專義同休戚惟純心用賢終始無閒如昔

者救張鶴齡救郭宗皋馮恩等事多方行之使伊傳周召
之心日達於天下天下方恐老先生不白首立朝翊贊天
子區區進退之節又不足道矣侍
愛輒布狂悃伏惟採納朝野幸甚

與張甌江司丞

書云世祿之家鮮克由禮又云位不期驕祿不期侈吾弟
獨能幡然以學問爲事此於國爲忠臣於家爲孝子至難
得也耶歆服歆服然學問須先識頭腦用功方有得效處
學問之道無他求其放心而已矣心者人之神明所以具
衆理而應萬事者爲心之不可放也故學文以求之凡一
時一念少違乎天理卽是放非必般樂怠傲之謂也必無
時無念不在乎天理方是學非止讀書一端也然其下手
功用卻在喜怒哀樂之中節中庸所以發道學之傳而首
示之的好也大學自誠意以至修身齊家治國平天下亦倦
倦於好惡之不辟皆自古聖賢大學問也能如此是謂致
中和天地可位萬物可育而學問有全功矣此至簡至易
似易而實難者生自入官以來頗知以此爲事學而未
也孟子曰人皆可以爲堯舜豈敢以爲未能而遂已乎幸

吾弟有志於此願相與共勉之其毋怠

王瑞梅上戴治院書

八賊求撫自去年麻黃之間已持此議嗣後說屢變而計
屢遷閃爍不可方物舊臘渡河而南賊已攻下穀城復藉
口闖賊甘言以愚穀之士若民罪歸人而功歸已八賊真
狡賊矣滇將許名臣捧憲檄招撫其述賊乞撫之詞不曰
解散歸農而曰願帶馬兵七千步兵三千合萬衆以剿賊
自贖噫古來有釋戈解甲面縛投降降者矣而此更欲厲兵
秣馬意欲何不爲豈真在剿賊哉無非欲捐此大營壘使進
可以攻退不失守勿致困我戎索耳是則口言降也而心
未肯降且先樹一不可降之勢矣况萬人之安插何地向
以爲賊猶得拒之而城郭之外而亦猶畏我兵之與爲仇若
撫矣將誰拒之而又誰仇之恐稍有不知意肘腋之閒紛
紛脊脊禍有不可知者矣以愚計之今惟有剿撫並行之
策姑且未卽交鋒而先盛陳鎧甲亦既奮揚威武而始徐
議生全相地受敵之處兵以護之相敵盤據之處兵以威
之以滇兵之一千守光化以一千守樊城此防河以北者
也而以滇兵之一千五百合郭繼裕之五百爲二千分守

西南兩關固襄城之門戶此外滇旅三千七百餘人台臺
遴選轅門中軍旗鼓之官能而嫻於戰者賜以令箭督令
躍馬揚戈直薄穀城之五六里外與賊營相望赤羽日白
羽月炮石劍戟如雷如電似霜似雪而後下之令曰爾賊
誠有侮禍之心我姑待以不死爾急解渙黨與凡擄掠之
難民不問男女少壯給以照身盡歸并牧甲楯輸吾庫馬
匹輸吾廩爾賊祇留士馬少許約以十百極多不過三百
其置諸曠野而耕鑿惟命其執鞭弭屬橐韃以禦奸暴亦
唯命三日為期悉囚首軍門撫不撫兩言決耳若猶是量多
較少今日請地明日請官是不過誘我以避旦夕之誅愚
我以恣焚掠之計又或重賂以餌我之叛兵愚民獻餽陳
芻需飽而國焉耳我則奮大兵一鼓而殲之以薄穀城之
兵為主軍搗巢拔幟而南漳有賈一選之兵光化有周士
鳳之兵台臺標下之火器手弓箭手亦桓桓如林併四面
分防之兵視賊所向皆可整槩歸併環遠合擊何憂賊之
不為釜魚阱獸哉蓋示之以必殺而彼乃怖死而貪生予
所以殺中之生而彼乃心折而不貳是言剿者專言撫即不
令人疑亦令人玩此在滇將不自知人盡知之矣故願台
臺急嚴軍令以剿為撫勿以撫廢剿用命賞於祖不用命

戮於社令嚴則將肅將肅則兵強兵強則我制賊不爲賊所制是今日之第一義也

上理按兩院書

張獻忠乞撫一事已入閱月蒙各臺所以安撫之者亦真知盡能索不遺餘力矣而獻忠心事似有不可測者蓋獻忠奉明旨赦罪立功赴理臺檄調其兵四千而進止未決猶曰無自贖之路矣始理臺檄調其兵四千而進止未決猶曰初撫之寇安集未定也則隨爲之度地以居之量田以授之白沙界山湖地處處皆可聚廬而丈出穀地荒田幾五萬畝處處皆可播種而獻忠不任受也閒取民閒有主之腴田而耕斯其志固不在農矣遂巡至五六月忽十闖天七八股盡奔唐鄧閒距襄不二百里遙當時奉治按兩院勉獻忠提兵征剿給以資糧督以監軍道斯固獻忠報效之日矣乃口然而心未必然今日然而明日未必然終不肯出門半步也而且淹沒四功之說且有欽降關防之請殊駭聽聞近七月初九日獻忠復投一揭卽欲連請七八九三月之糧以養其一萬一千之兵如無糧則於湖廣所屬每府量給銀二萬以贍衆口職閱之不覺口咋而心驚也不知獻忠果何心而發此言乎大兵之食糧爲從征

也調之不赴曾是裹甲偃戈之衆可空糜朝廷數十萬之金錢乎若云不願爲兵則爲農爲商耳而日出不作日中不市動輒數萬嗷嗷以爲要挾之藉今且差馬兵手持張副總票肆出於光穀襄棗之間迫分秋糧嗟此兵寇之遺黎蝗蝻之剝稼安有天雨地湧之粟以養此狼吞虎噬之衆乎應之則勢必不能給卽能給亦無此法不應則彼不能安恐不安更有他心職滋懼矣夫獻忠以從死得生之罪人荷朝廷不殺之恩各臺生成之德調遣則許之糧歸農則予之地是宜驕氣日斂而降欲心日汰而滅精神盡奮以捐軀圖報爲我用而不自爲用則撫局聿觀厥成而察其舉動似猶驕蹇恣睢負嵎以逞此職之所不解也職身在地方肘腋之間患此大癰非不請之治臺商之監軍道晝夜思維亟圖善後第撫心至此已極撫法至此更窮惟仰侍台臺卓識遠猷揆情度勢何以使之革面易心使議撫者不受撫之恩而地方亦不受撫之累善爲消弭無滋潰決則職所不勝延頸跂踵而望之者也

張孚敬妻潘氏與李斗江督學論從祀書

張氏錄本

伏聞督學公釐正鄉賢之祀議者窺其意旨似屬少師未亡之人悲惶震悚莫知所以惟督學公賢者也受命以來

凡所建置率先風化乃其痛誅少師宜有指摘妄反覆思
維生平之過誠或有之然未見可爲名教所絕仰惟左右
之權實在名公而公素負正氣不隨俗上下輒敢憑其孤
憤以請春秋而下中庸之行亦或寡矣史冊所書或以道
德或以文章或以勲烈其有所長類不能無所短故曰尺
有不足寸有所餘必以其短蔽其所長則後世之士難乎
其爲名矣藐然儒者進而享諸聖人之廟使冠裳之吏月
朔時望拜跪贊謁於前後世之人顧其名而求其素咨嗟
而嘆慕信非有出於人者四子而已其學聖人而不失其
豆者幾人其庶幾聖人者四子而已其學聖人而不失其
正閔冉數人而已餘七十之徒皆已不絕乎道降此後世
之賢庶幾乎四子者濂洛數公而已其學聖人而不失其
其正者又不知其何如也而左邱明胡安國毛萇鄭康成
王通韓愈者流至於今皆列之祀典不廢豈非以一言之
中乎道者是亦聖人之徒歟况夫羣一鄉之賢而祀之者
其初本於古鄉先生沒而祭於祖之義蓋曰若人也雖不
祀於天下猶可祀於一鄉庶幾一鄉之士不以無聞爲懼
其所以示勸於後世者非曰小補而已使責以中庸之全
而挾其纖微之隱則廟庭之祀足矣而奚有於兩廡庶祀
之列過矣而奚有於斯祀其望人也亦已甚矣少師可祀

之行在人耳目者不可勝紀姑撮其章章言之國家之立莫大於禮禮莫大於父子之親先皇帝初自藩封入正大統言禮之臣或於定陶濮園故事或謂當考孝宗而少師釋褐之初卽能訟言是非可謂有超世之見上而宰執下而臺諫司部附和一談牢不可破而少師一人植說衆怒如焚刑戮在前略不顧忌可謂有蓋世之勇遂使典禮大明彝倫攸叙先皇帝得父其父今皇帝得祖其祖者誰爲之也微少師則名不正言不順三綱淪而九法斁矣可謂有震世之功雖使師丹司馬光復生無所復容其喙今若以此爲少師罪則睿皇號諡止當興國先帝之廟不稱世宗今一代之禮定於一人蓋棺之餘論定已久而嘵嘵者猶復不已吾不知其何心也方其建白之初軀命莫保徒以綱常所繫奮然而興此豈有特進少師之念賴先帝明聖用其言而顯其身遜避再三始不得已受之耳而議者訾其干進自爲秀才卽以天下爲己任幸蒙簡拔知無不爲裁抑貪漁總核名實而議者訾其擅權性素嫉惡見人之過不能姑容小者面斥大者屏絕兼任直率不肯偃俛卑抑以從時好而議者訾其怙勢所謂欲加之罪何患無辭必如此言則全身避害爲賢持危任險者否矣素餐伴食爲得而肩勞冒怨者失矣柔首曲躬爲上而挺身直行

者下矣此非所以風天下者也况夫先師之祀古今之所謂承訛而襲陋者也自少師而始正之其有功於斯道甚大鎮守之設天下之所謂疾首而痛心者也自少師而始除之其有功於生民甚深繩抑宦官勿與朝政未嘗少借辭色故其時莫不慄慄畏懼無敢踰越審如此則前此振直之禍無由生矣大同之變朝議俱主撫安少師獨以國體爲急必嚴擯殺之誅審如是則後此南畿之禍無自作矣他如革威曉之封清入仕之路正內閣之權絕請託之徑若此之績難以枚舉且本朝名相莫盛於楊公文貞其次莫如李公文達二公猶不免順時俯仰多將順而寡犯顏少師雖以言禮得君未嘗少爲婢媵之態諠有不然必持己見百折不回楊公八十之年子爲顯戮不能引身李公奪情起復爲羅倫所覈猶不去位而少師一聞人言輒自引避可謂難進易退明哲保身二公祿位既優累貲亦盛或者不能無議少師峻潔自持一介不取三黜而歸行李蕭然身歿未幾子孫不免稱貸在位九年大小百司競兢奉法吏安其職民樂其生四夷不侵盜賊屏息此固先帝勵精之效而少師輔相之功亦豈可少哉南海霍公獨立一時無所許可獨推少師以爲貞忠狗國無纖芥之私方其同朝未嘗不爭爭之未嘗不力至少師之歿卹其遺

孤紀其後事續悉備至卽此可以爲公論之赤幟矣獨以
言禮之臣多罹憲罟不幸遭值大獄或貶或斥至數十人
皆當少師之時人見其影未察其形似不爲無過自今言
之言禮者旣以不明天性之親及其理屈辭窮不自引罪
欲恃匹夫之衆鼓脇其君使之從己故聖怒不測議獄者
徇己之私至陷無辜十餘而不恤其得罪也又豈獨先帝
之過哉今若以春秋之義責備少師有君若此不能死爭
以寬雷霆之怒可也若以此歸罪少師則豈可哉况鄒公
守益呂公枬豐公熙徐公寬十有餘人或宥或復皆藉論
解御史馬錄宥死謫戍亦出少師載在奏章可覆視也則
少師亦豈坐視而不救者耶議者徒見聖政更新因逆其
意以爲先朝所用概宜得罪而不知廟堂諸公方奉遺詔
行事休之政故與天寶不同後之論者皆不當以楊李之
而開元之政故與天寶不同後之論者皆不當以楊李之
奸并沒姚宋由此言之少師之祀未見可議也昔司馬光
沒蓋嘗追削位諡至列其黨爲奸榜之天下然終不能掩
其是非之實至今小夫孺子皆知公之爲盛德也則少師
之祀雖或暫廢於今終必有能復之者顧督學公賢者也
豈不足以及此意者公生也晚未足以知少師而今之世
又未必無爲誣善之辭者故不免投杼而起嗟夫特未有

以少師之終始語公者耳誠有以語之安知其艱然而怒者不翻然而喜耶是以不諒孤陋冒爲是言執事治平之績方今第一其作而任天下之重有日矣國是所在固將明之識者願以此占公之他日惟公其垂意焉萬厯丙午日月

贈序

宋

葉適贈薛子長

集水心

讀書不知接統緒雖多無益也爲文不能關教事雖工無益也篤行而不合於大義雖高無益也立志而不存於憂世雖仁無益也今世之士曰知學矣夫知學未也知學之難可也知學之難猶未也知學之所蔽可也薛子長往蕪湖將行出此紙請書

於余媿無以答之

明

黃淮送孔審理還永嘉迎母就養詩序

永嘉三年秋八月既望伊府審理正孔君光霽得告還永嘉迎其母安人就養於京師造余言別余賀之曰世之人孰不欲竭力以養其親然弗克遂其志者蓋多有之貧賤而無外患幸得以朝夕承顏其於衣服飲食或不能給亦不足以為養貴而且富承顏其於衣服飲食或不能給亦壯念王事靡盬北山嘆從事獨賢心雖無窮而力有所弗逮也光霽王門可謂富貴尤幸聖天子在上五緯順度天下擢曳裾王門可謂富貴尤幸聖天子在上五緯順度天下和平宗正承休仰德崇尚禮教以令其下而審理之職恬然無所事由是得請於朝以伸其孝情樂莫大焉孔君聞余言慨然喜動於色既而復撫然而嘆曰公廷受賜於上固為侈矣奈何先人蚤世祿弗逮養風木之悲曷其有極余又釋之曰父母俱存人子至情然脩短係乎分定非人力所能為也雖然祿以奉其口體孝之小者也立身行道以延其令譽孝之大者也光霽迎母而來益思勵厥志慎厥躬俾業日以廣位日以崇移其孝以為忠將見推恩之命頒自九重不惟榮慈親於桑榆之景亦足以慰先人於九泉之中矣尙何歉焉孔君拜余言而去余與交游之士

追餞於都門離觴既舉各賦詩以送之謂余有同
邵之舊授以首簡遂次第其說僭序於羣玉之右

送翰林庶吉士王道歸省詩序

永樂七年春二月朔翰林庶吉士王道謁告歸省其父母
凡與游者咸賦詩以餞屬余爲序道自少穎悟賢父母憐
其有受教之資遣入邑庠爲弟子員道亦自知砥礪窮日
夜讀書未嘗厭倦以故學業茂長蚤有令聞歲癸未發解
爲多士冠及對策大廷登名甲科會皇上大興文教思得
全才以恢宏治道黼黻太平乃選拔進士之穎脫者得二
十有八人以象周天列宿俾居館閣盡閱祕藏之書以充
其德器道獲在選列蒙恩朝廷可謂厚矣茲復得告還歸
故里升堂獻壽舞斑斕之衣展承顏之樂鄉里故舊走賀
盈門其榮幸又何如哉諸君子錢別之作辭多頌美固其
宜也或曰道際文明之運遭非常之遇月給廩祿日食大
官而簿書期會之勞不煩乎志慮敲扑喧囂之事不涉於
耳目是宜日就月將增益其所未至以副皇上遠大之期
何乃汲汲然以鄉井爲念乎余曰不然士之所學忠與孝
而已孝者百行之原忠之所由立也昔何蕃爲太學生歲
率一歸韓愈爲之著傳亟稱其賢道之二親年耄垂白迎

養不可得苟不時歸觀省以慰其懷不惟於蕃有所愧誠
非聖天子以孝治天下之意也問者唯唯而退遂書以爲
送行詩序

送徐中行還永嘉分教郡學詩序

余故友之子徐參中行力學績文謹言慎行芳聲茂著人
無閒言郡學教授前檢討潘先生以訓導席久虛薦中行
謁選天官近制試訓導於奉天門丹墀內勅大臣及翰林
風憲給事中莅之期得真才以淑後進中行試在優等既
銓授鄉之搢紳張席爲賀有執爵而言曰中行以逢掖之
士奉朝命戎冠束帶歸鄉邦分舉比侍郡文學坐明倫堂
橫經講道亦榮矣哉或曰中行起自鄉之齊民一旦處師
席之崇諸生有年相若分相等平者亦有與訂交者使之
俯心罄折以就班列執弟子之職容或有艱跪而不率者
乎又有年少而分卑率多親故子弟狎恩恃愛以自逞者
庸材之所不免也中行新任之初縱之則廢法急之則召
怨不其難乎余曰不然前之說近於驕後之說近於隘驕
固不可隘尤不可也夫天下之人高下大小萬有不同然
各有分存焉故曰禮達而分定易於上天下澤履則曰君

子以辨上下定民志况師者尤禮之所重師嚴然後道尊
道尊然後民知敬學中行所受之職朝廷之所授也中行
以尊嚴自處先王之教也燕朋逆其師燕辟廢其學名教
之所深斥吾郡諸生長乎文獻之邦習聞道德之訓豈肯
以燕朋燕辟自居而不安夫上下之分者乎况夫舉中行
以補久虛之席教授潘先生也潘非私於中行者也請之
太守何公協諸輿論而舉之也太守公賢而且明政教兼
舉而不遺其於學規綱紀必有以振之也孔子不逆詐不
億不信又豈可以區區監量預料於意外者乎雖然中行
亦當善於自處以立其本焉本者何誠而已至誠可以貫
金石可以孚豚魚故曰至誠而不動者未之有也中行爵
酒跪而進曰先生至教參也敢不夙夜祇承在席者亦皆
以吾言爲然遂卒爵盡歡於其行也謁秘閣諸
名公賦詩以張之鄉之善賦者序列於後云

周旋送王廷賢先生致仕序

永嘉五經之學起於元豐九先生盛於慶元六君子而其
始則本諸皇祐賢良王儒志先生儒志奮其默契之學講
道於濂洛之前粹然一出於正至其後進紹而傳之其燭
理之明訓義之精卒不悖於程朱之說而合乎聖人之心

故當時人物之盛道術之懿取先天下淑其淵源蓋有所
自綿延至於國朝尙私淑而與有聞者往往時編修劉公現
獨善易學究極精蘊蓋能得先儒之遺意而無愧乎潔淨
精微之學者也王先生以穎悟之資謹厚之行宗劉公之
學往往深造自得永樂中乙榜分教鄆陵從遊者雲集
先生以是爲指引凡爲王氏之徒者莫不明其學也豈惟
明之其彬彬乎假科目出而行之者亦不少矣旣而先生
以病在告十餘年鄆陵學者之慕先生甚於饑渴之慕飲
食則先生之教人豈易及哉正統戊午先生以名久矣聞
官改職中牟中牟爲鄆陵隣封其人知先生之名久矣聞
先生來預相欣喜爲得師賀比至莫不委心聽焉先生雖
數年處岑寂未嘗廢溫習約其理於心者不啻昔日故其
所造就視鄆陵爲滋盛今年夏先生以九載秩滿書最將
有超遷之榮乃以年滿七十援例請致仕許之將南還鄉
之大夫士咸作詩以贈謂予宜序惟我聖天子敬老尊賢
爲仕而得優老於家者於今爲盛而尤盛於吾鄉吾鄉致
仕十餘人而少保公以三達尊爲之表率歲時燕集深衣
幅巾衰然羣聚桑梓閒談經講學明仕止之義以不悖聖
人之道鄉之後進得指引爲依歸雖庸夫愚婦莫不瞻仰
敬信焉先生此歸有足與焉而無忝者將見元豐慶元諸

老不得專美於前
矣先生其行哉

王激敦義卷序

余友兄曰山潘君亨甫少遊學校有聲負意氣結髮試場
屋謂功名可以攫取籠罩踰藉不能在人下勇於赴義有
悲歌感慨之風既累舉不售乃憮然曰吾生不能為治擬
人君子強學耳東流富貴何為哉遂棄去携貲浮江淮至
燕趙京師結交天下之英施予不倦見落魄男子皆濟之
久之耀穎京師有指紳之譽嘉靖癸未余舉進士與君旅
食相望分少絕甘瑜時弗怠怡然桑輿之歡也同年友豐
君存禮見且異之因余撫其平生余曰潘君繩趨尺步拘
拘守扶寸之節無以踰人然吾與同庠序赴省試必共載
知其於人無貳誠素易知重然諾可緩急其居家父母安
以順昆弟樂以和里之貧者德其施惟埋飛走之惡少欽
且涕肆故笑傲嘲哂不可前却稱雋越於吾鄉者而夫也
而厭苦不咸於衆有負俗之累者亦而夫也惟吾子擇焉
存禮曰亨甫其丈夫哉篤親而敦義子揚君子也褒善而
有本父母順孝也昆弟和友也恤貧為惠疾惡為勇具此
四德鬼神臨之守貞弗渝動有慶也夫何迷方沈誤之足

云吾嘗聞之善無不達之理士有制命之權大造大君實
主民物窮通用舍其誰能常之惟壯夫志士不二三其德
成令名以求多福在我而已雖天地君相又何能陶鑄我
爲閱人多矣潘之志節衰然在吾目中也亭途在前行將
蹈之攸往必利科第不暇論矣亭甫曰謹拜
君命遂請余叙其事而存禮乃爲之作傳云

芙蓉亭後序

嘉靖丙申冬十一月既望王子偉立以其先公少宗伯
濱先生芙蓉亭卷示予予受而讀之既先生仕宦顛末與
其瑞應之詳大都具備無所事予言也獨念往昔先生所
以處予予之詳大都具備無所事予言也獨念往昔先生所
生下世矣若復隱而弗言則先後進之以道相遇者誰復
傳之而信於後耶先生富文學敦行誼雅量容物恥言人
過方其脫穎郡庠時予輒從諸生後然亦頗能自信不隨
時前却先生知余非卒乾沒無聞者心獨許然勿輕語人
及先生爲史官余方偕計至京師其所以遇余者猶其在
郡庠也嗣是余淪落江湖者十餘載先生由祭酒遷少宗
伯余始以甲第爲郎令吉水先生饒余別墅語以吏事之
難而令職之不易稱余奉以周旋勉共朝夕幸勿得罪於

百姓余補天官屬累遷納言改師國學先生皆不及見矣
余與先生同里閨所居僅違一牛鳴耳獨以受命狷隘恥
爲援上不能早暮請益緣是贊毀交至先生視余不遠遠
亦不加親至推賢當世人物則不遂余棄蓋疏而不遠遠
而不貳簡而成章者矣故曰有關於世風而人莫之知也
大抵古先進於後學之士心欲相成而不明於優借或微
抑之使其奮而自達後生之於先進則過望其推挽而急
欲取名是以先進或虛受忌才之名而後進多無韜晦之
行雖荆公東坡亦未能免至形之於詩章文字相相知之難
有如此余與先生殆無是矣先生之二子某某皆彬彬有文
學豪邁修謹各自成章或游於貴顯而籠罩殆藉畏避不
阿之迹未嘗不著於人人謂先生有後而芙蓉瑞應遠而
未涯也

王健送少川朱先生之任鳳陽序

昔在壬辰之歲少川子偕健遊白下暇日少川子聞友人
稱中都之勝訊之曰東連三吳南引荆汝通江淮接中原
則歛衽而嘆曰斯真鍾山川之靈萃天地之和蓋所謂真
龍之地也我祖之攸興其茲也哉周岐漢沛不足前稱矣

嘗欲渡大江循天長得一縱觀而未果也乃今歲戊戌領
選王曹竟往往令其地云於是少川子行健從卿大夫士祖
於郊因述以告則僉謂之曰先生尚憶向者之懷乎夫以
遂償其夙願斯謂之為人擇地非耶少川子避席而起曰
謂吾為才吾未能也謂吾為償願吾未暇及也且吾聞鳳
陽之地多動戚之族其人舞文遊食日聚於官諸凡若此
閭閻敵訟獄蠅興胥吏舞文遊食日聚於官諸凡若此
懼夫地之或妨夫人而人且負於地也夫彼此異時羈散
殊勢故願諸君子幸而教我俾無辱執事乃若所云豈吾
心哉時雪坡葉子齒最長乃首言曰鄭重學校勤待士之典
禮則人亦罔或不報春巖高子曰奢崇儉薄其征歛則民財豐
則眾將向風思軒侯子曰黜奢崇儉破觚而斲雕則民訟
疊巖趙子曰惟明惟斷所得已者盜破觚而斲雕則民訟
簡東華王子曰左右有犯一正以法毋惑浮言則吏罔敢
為非芳洲袁子仁山曾子曰奪其所利散之於農則遊民
遠矣言既健進曰夫葉子之言本也高子之言機也侯子
之言經也趙子之言德也王子之言威也袁子之言子之言
法也故化莫大於敦本風莫速於運機治莫切於反經教
莫先於感德糾莫密於立威懲莫要於布法之六言者出

治之良模而蒞官之正軌也先生率而行之主上之以誠
而無怠焉將中都日治而譽命日達矣簿書既理琴音載
希登萬歲之山覽潼沱之水所以酬靈山川托情杖履宜
必有以復我也何謂無暇哉少川喜曰敬聞教矣舉手稱
謝升車而去

項喬送夏生洪夫序

國東子曰昔人有言曰受人恩而不忍負者其爲子必孝
爲臣必忠夫君親之恩至大矣而忠孝之道或未盡者受
之而不知所報也能不負於其小而顧負於其大者耶信
斯言也予茲有取於鶴軒夏子矣鶴軒名松字洪夫永嘉
城中人初與予邂逅於眞州一飯一舉手之德而已其後
視予父子兄弟姻婭有通家之好焉丁酉秋予守廬予子
文煥應試往潮閣而夏子以盤石衛從事適來愛深而厚
於期待直欲一箭而穿楊也未第則悵然不忍別文煥曰
可援例赴京師偕吾父入觀而行乎曰有老母在未敢以
遽行也文煥固請乃以母氏託之長兄而偕之至廬至則
予方病喘見而戚之曰是行固不可辭也爲予戒行李論
行事往還水陸萬餘里無不愜予衷者予益稔知其平生

能以忠信篤敬爲行己之要而長於料理又其才能也方
朝儀稍就次予曰爾可以從事矣輒憮然曰初意適云爾
母氏將古稀矣春寒秋熱老健何所於賴得終養焉雖不
偕一命無離憂也予嘉樂其志因啟之曰盤江險惡亦孝
子所不忍涉也改納府從事以事府之賢大夫可乎曰非
初意也予謂丈夫當壯歲貴有樹立而已夫何意必之有
況出則奉公入而奉母其奚辭焉夏子遂勉從予言以行
是蓋不負故知而篤信之者由是而事府之賢大夫其肯
不仰德懷刑失其身而辱其親乎由是而登一命於仕籍
其又肯受直怠事不思邁迹以竭涓埃乎然則雖謂夏子
爲孝子忠臣亦可也近世搢紳士大夫戀官爵如卽且甘
帶若不知其母有倚問之望也享寵利如后王君公若不
知其身有政理之寄也使其素有一飯必酬之心豈其不
念此身匪出於空桑而薄功厚享以失君臣之義必不然
矣夏子其庶幾夙夜以永終斯譽也已

別林汝懋秀才

林生德芳從予游有年矣絕口不談貧困二字蓋嘗用力
於自守者可以爲難矣然聖賢以位爲大寶以富貴爲得

志非固樂乎貧也。要之樂不改於貧焉耳。林生之父雪崖兄鄉之善人也。其祖母孀居五十年。將藉之以榮壽而竟弗祿。今林生之母孀居又十餘年矣。立身揚名以光顯存沒豈異人任耶。林生之妻鄭氏不忘乃父貧賤之交而必歸林生。真賢女也。荆釵布庭無怨言者若干年。真賢婦也。然所望以終身者。豈一儒巾耶。嗚呼。男兒須讀五車書。非爲富貴謀也。然富貴必從勤苦得之。不得雖曰有命而勤與不勤。則在林生而已。林生其能不苦心讀書以修身亢宗也哉。

序跋

宋

周行已跋薛唐卿秦璽文

李斯篆世傳爲第一學者。莫不愛之。吾每見其書。幾至疾唾而卻走者。何哉。謂夫人善成其君之過也。夫秦之君其資亦未若桀紂之惡之甚也。而二三臣釀其君於不善則又有甚焉者乎。是嘗去詩書以愚百姓者乎。是嘗聽趙高

永嘉縣志

卷三十二

五

以立綱亥者乎是嘗教其君嚴督責而賞恣睢者乎使其
壘不得傳者斯人也而其刻畫吾曷觀之哉顧唐卿猶區
區珍藏之者豈不以監傳百世
以為監歟吁是何以監也

陳謙蘭亭跋

桑世昌

近世論蘭亭敘感事興懷太悲蕭統所不敢與斜川詩縱
情忘憂相去遠甚此似未識二人面目斜川詩與風雅同
趣固當別論若逸少論議於晉人最為根據觀其與商深
源謝安石會稽王書可見舉世元學方盛誰不能為一死
生齊彭殤之言顧獨以陳迹為感慨死生為可痛何也詩
三百篇感思憂傷聖人不廢約之止乎禮義以不失性情
之正此先王立人紀之大防也若夫遺情於事外忘趣於
情表晉以之淪胥矣向忍聞之哉東坡反蘭亭意為赤壁
賦其詞飄飄高遠終近蒙莊之氣象與
元學不相似逸少此文必有能辨之者

張叔椿沈忠敏公龜溪集序

張金吾愛日
精廬藏書志

叔椿少時聞龜溪先生以文鳴當世及長從搢紳賢士遊
又聞以直道結主知以盛名諸人望由是歷霜臺冠常伯

兼翰苑兩總天官進參機務再秉事樞崇論宏議鴻文大
冊天下傳而誦之謂盧楊燕許復出矣叔椿每得一篇寄
而藏之如獲至寶每以不及全見斯文為恨宿熙紀號之
三禩參政姚公以天子大臣來守泉越數月政清訟簡出
龜溪所為文十二卷命叔椿為之叙竊喜附名不朽有榮耀焉
月餘始克歸其書又俾為之叙竊喜附名不朽有榮耀焉
乃不辭而承公命嘗觀皇朝晏元獻公被遇仁宗而富文
忠公繼登揆路冰清玉潤勲業宏茂載在史冊後世歆艷
龜溪公丈人行也其名德相望前後輝映又能集其文而
流布之益昭述作之懿顧不遑歟先生諱與求字必先仕
至知樞密院事紹興七年六月薨於位若平生出處之大
方則有給事劉公一止狀其行事為詳茲不復列四年三
月一

陳元粹錢文子補漢兵志序

李氏校刊補漢兵志

漢兵志永嘉白石先生往為大都授時所著予少小執經
從師曾備討閱因獲聞纂集之大旨初藝祖開基次第刻
削五代僭偽收其精兵聚於京師天下既平而已聚之兵
不可復散遂定都汴京以便漕運始倚兵以固國而不及

天下之形勢嘗自嘆曰不出百年天下民力殫矣固已逆知後世以兵爲病也然當時徒見兵聚而精不知其後兵聚而不可復用蓋自太宗既平太原欲遂取幽燕而不克自是歲有契丹之擾擅淵之役僅能罷兵爲和而西夏之叛終莫得其要領尋至永樂之變極爲中原之變所在戰卒望風奔潰訖未聞一戰之獲渡江以來稍自振刷和議既成尋復廢弛數十年來天下無事衣糧稿賞不可少殺生息長養而貧將黠吏得以浸容其奸故老弱者難汰虛籍者難覈安坐無事則驕驕則難用久聚而法弛則悍悍則難制生息繁而衣給有限則貧貧則思亂征行調發之日稀不嫻臨陣決戰之術則怯怯則棄甲曳兵而走今自京師禁衛江上諸屯諸州廂禁邊上戍守往往以百萬爲額而未嘗可用也夫以天下不及承平之半而養百萬無用之卒凡今天下嗷嗷行一切之術網羅天下之遺利以竭生民之力而楮幣茶鹽之法日益敝壞皆爲此也抑可久而不知變乎於虐此先生所以拳拳有意於漢家之遺制也謹按漢制調民有限無常役之歲則與今日老弱虛籍者異有事檄召事已罷歸無聚食之費則與今日竭民力以養兵者異衣齎自備無供億之勞則與今日春秋衣賜不時邀賞者異近地調發無遠征之勞不立素將無擁

兵專制之虞都試課殿最無驕蹇難用之患故自漢文以來與民休息經常不耗則減田租弛山澤尋至太倉之粟陳陳相因都內之錢貫朽而不可校皆不養兵之効也誠使稍取漢制斟酌劑量參而行之於今日以救其極敝而不為嗟夫先生乃老矣方力疾其效猶指諸掌夫亦何憚而年閒國力可紓民力可裕其效猶指諸掌夫亦何憚而久警策蘊與粗可娛將終身焉此志邈矣顧每以予講肄滋亦偃蹇半世安於靜退未嘗出位而思豈敢輒言兵事而先生憂國之心與所著書要不可不與有志成順致利不駭民之也雖然其事大體重關繫宏遠要在成順致利不駭民聽其條目次第固非一端初先生更欲編次漢調兵弛役尺籍伍符金鼓旗幟及凡兵閒調度別爲一書未果蓋漢兵最近古其規模尤精密而史闕其文姑採撫羣書先誌其大節而其纖悉未能盡載此書也先生名文子字文季世居樂邑白石山下因自號曰白石山人云嘉定甲戌

葉適世友堂詩跋後

孫應時燭湖集

雪齋孫不朋居餘姚燭湖上安貧樂道終身不願仕有古人之節三子應求應符應時皆以文學知名兄弟相愛并

衣草食薄厚必均應時官止邵武軍通判應符之子祖祐
敬踐祖德崇緝先志嘉定甲戌爲新室名曰世友合饌同
室相承不替將請余記
之然此詩已略具矣

許及之節孝先生語錄跋

徐節孝集

右節孝先生語一卷得之番陽洪公紫微手鈔舊以東坡
先生志林語冠於首因以呂氏童蒙訓語附於後宋之臨
汝郡庠嘉禾已杲先生文集茲錄雖燕閒咳唾餘一話一
言足爲後學警策如云治身以誠爲本先生所得於安定
胡公者蓋終其身而無愧至極論諸葛武侯之平生與汲
直之素立又先生所忻慕而自處者用否雖異君子謂其
志則同其因讀貨殖傳而悟爲文之法若有異者考
其說以簡易渾成爲主學者毋以異之乾道己丑

元

薛元德玉海後序

王應麟玉海

鴻蒙既判六經載道歷代諸儒著述辨析至宋而道復大
明事類之書亦至宋而益廣廣其述者厚齋先生爲最焉

先生由詞科擢登秘府讀天下之書而識於一心以一心之所識而著述玉海之一書極天地萬物與夫古今禮樂制度咸備於此秘藏於家迨今百有餘載至元丁丑歲制東宣閫都元帥資德公知是書而發其秘俾鉉梓以廣其傳是時經歷賈君亨都事耿君朶羅歹來贊賓幕俱篤意斯文以是書爲己任盡心協力克成厥功而元德實奉檄董其事閱二載而刊始完嗟夫是書也昔爲王氏家藏之書今則爲天下之書矣以先生一心之微博覽天下之書而著於一書今復以是書而行於天下其惠後學也豈小補哉若夫論著書之旨要已見於序文愚不復贅姑記刊書歲月之始末於卷後庶使後學之士知是書之幸傳於世不易也至元六年四月

李世安伊洛淵源後敘

元至正本伊洛淵源錄

昔孔子續述羣聖之道至孟子而愈明孟子之後至二程夫子始克紹其緒程子之學得於周子而益闡之當時師友之盛可追洙泗諸子非漢儒之所敢望及考亭朱子出又能集厥大成而折衷之蓋伊洛淵源一書凡周程張邵及其門人之言行政事無不備載而聖賢相傳之道炳然見於其中如五緯之麗天百川之有源委其有功於世教

大矣大參蘇公伯脩頃在鄂省錢梓武昌郡庠及蒞浙省
又命刊於吳學會郡守蕭侯仁甫幙長獲獨步丁成之克
相其成所以惠後學益廣矣公之自敘有曰能本於聖賢
脩己之學而不溺於詞章記誦之習能明於聖賢治人之
方則不誅於權謀功利之說至哉言乎夫脩己者道之立
治人者道之行堯舜禹湯文武之所以為君者此道也孔
子與後世諸君子之所以為師者亦此道也外此而詞章
記誦權謀功利其於道也遠矣公之是書必欲求聖賢脩
己治人之實而不為虛文其於國家培植基本敦厚風俗
之意又切矣學者讀是書而進之其可不知公之用心者
哉世安忝教於茲故不揆而僭
附於序末云至正九年己丑

明

黃淮書學箴後

許謙白雲先生集

元史取學術足以輔教傳後者著儒學傳而金華許謙居
其一焉謙字益之世稱白雲先生受學於同郡金履祥履
祥學於何基基學於黃幹幹則朱子入室弟子也傳授之
正厥有源委故當時登門者以為榮幸東平王君麟踰齊

魯涉江淮遠來從先生遊及暮謁告歸省先生懼其荒而
業也手書所著學箴以勉之而大要以存心爲本吁先生
之教人者如此史之所稱信不誣矣既而王君以鄉貢進
士典教昌平其所以淑諸人者又豈出乎先生規矩之外
哉惜余不及見之嗣子延齡與余同官翰林出此卷求題
輒疏其授受所自識諸左方以致景仰之私云耳永樂辛
卯三月望日右春坊大學士
兼翰林侍讀永嘉黃淮書

恭題宣廟賜謝環詩後

集介庵

宣宗皇帝御極十年海宇奠安戎夷賓服內外臣僚各脩
厥職機務有程居多暇豫時游心於篇翰雲章奎畫冠絕
古今廷臣受賜光華烜赫歡動班行錦衣千戶臣廷循起
自儒流兼習繪事入侍燕閒忠慎誠篤簡在聖心宣德癸
丑重陽日御筵之次親展翰墨賦詩頒賜昭異數也又明
年宮車上賓廷循披閱綸章血淚滂流以臣准備員先期
且有同里之好出以見示竊惟臣之事君獲展犬馬之力
斯乃職分之當然先皇心同天地細大不遺遇有片善褒
嘉獎諭至於再三重則甄拔振舉俾遂顯揚體念羣情巨
古莫倫廷循身逢盛世得拜殊恩衣被雲漢之昭回餘輝

覃及於子孫其榮幸可謂至矣尙其益擴忠藎盡致力圖報
於今日庶幾祿位之隆永永無替也嗚呼鼎湖日遠弓劍
莫從臣淮幸獲拜觀宸翰恍若仰瞻龍馭陟降於三光之
表追思感激泣然流涕熏沐濡毫識於末簡不勝兢惕屏
營之至

李階張慕本輓詩序

張氏譜

張爲邑之鉅族也有曰慕本先生者又爲張門中鉅人也
弘治甲子秋以疾卒訃聞無遠近無疎戚無貴賤大小凡
與先生接者莫不嘯吁灑泣至有聲而爲詩者可千百計
子珊輩采錄成帙以階爲先生愛甥屬階序之於乎生前
之愛憎死後之欣戚也階嘗博觀一世之人矣有聞其無
立隨波上下於世無所重輕於人無所損益者其死則爲
人所玩視之若草枯木僵漠然而不加意焉有勢焰薰人
漁獵自殖不恤多人之怨仇者其死則爲人所幸視之若
豺虎之在陷阱羣笑而稱快焉又有內行不飭傷風敗俗
者其死則爲人所厭視之若禽蟲臭腐道傍過者掩鼻而
唾焉求其若先生爲諸士夫哀輓者幾何人也於乎死生
亦大矣彼有玩而輕幸而笑厭而唾者豈人情耶蓋有以

致之者矣先生器局峻整多才善幹擴先業裕後謀足爲時輩矩度者不可縷舉與世之無所輕重損益者相十百矣輸粟濟人繕理河梁井路雖重費不惜與世之瀟獵取怨者相千萬矣重倫理篤恩義處父子兄弟宗族各有可稱者在人耳目與世之傷敗風俗者相億兆矣故其沒也宜諸士夫之哀輓若見明珠之沈良玉之毀惻然痛心而浩嘆焉昔秦之三良將臨穴詩人願百身以贖之發於秉彝好德之良心也是則今日諸士夫之詩不容已而階之序亦不容辭

王應辰張歐江哀輓小序

昔者魯哀公嘗誄尼父柳下惠之卒門人欲誄之其妻曰將誄夫子之德二三子不如妾知之也乃誄而壹其節曰惠此誄之所自始而後世輓章之作其昉諸誄之意乎賢之斯哀之而誄之而不輓之弗能已也符丞歐江張先生相國文忠公仲子也不幸賢而蚤世年三十有六嗚呼哀哉其嗣汝紀迺哀諸名公哀輓謁予請序予素善歐江君知其莫如予尙忍言之尙忍言之曩予聞君之訃哭之慟有詩二章權予上京師距君之沒既餘一載升其堂履其陳

爲之泣下而霑襟聞會稽紳諸鉅公及四方名士則莫不
咨嗟稱道願江君之賢而痛惜之類有同於予者此哀輓
之所繇集也嗟乎嗟乎古今世祿鮮克由禮卽有讀書問
學稍能不恃門第降下驕盈足■賢矣而況識大義植氣
節慷慨欲有爲當世顧佗僚弗伸又時弗少埃遂嚼然不
滓終其身此其人幾希乎守道而不貳者其賢又何如也
是則張君已矣九原可作舍斯人吾誰與歸故自蓋棺之
後世之公論曰定人無問識不識其詠而思之者日益衆
夫是編也其諸所謂長歌之哀非歟記曰朋友之墓有宿
草而不哭焉斯言殆未盡然願江君就真宅又三載矣墓
木則云拱矣予嘗從羅山道上行引領而望思之但見素
月生深林中離離布彩若弄延陵劍影俄而悲風蕭颯有
聲又若雍門子之鼓琴聽之不覺其粲粲而淒傷也嗚呼
願江君余若之何能無爾思耶繼此而永言者吾知其弗
能已矣

王叔果三檜堂卷跋

我王氏三傳爲樂善翁翁子樵雲公性至孝嘗購三檜爲
翁壽因以名堂少保黃文簡公訪樵雲公之子自足公爲

詩倡咏諸指紳各有作容直劉君叙述詳矣時哀次成卷
歲又遺失頃族子進士繼明得之黃田林氏家屬族子元
衮藏焉果展讀終卷先哲翰藝斐然擅工爲之歛容而吾
列祖雅尚文行取重名流亦所謂美而彰也讀已令兒輩
錄之藏於家塾二百年故
物其尚寶愛於弗替云

彭江皋遺稿序

半山藏稿

江皋彭先生歿且三紀乃嗣茂林君珍輯其所遺詩文閒
出以示予讀之憮然曰先生蚤歲以文學擅場而所撰著
乃僅僅止此豈散逸邪抑志在經濟不欲以藝名耶載稽
先生明經起家授倅永平甫數月卽引疾乞歸如太阿出
匣未試割善鞘而藏之其於經濟又何適邪予侍先生內
也晚嘗仰風猷參士論而知其爲金玉君子也蓋先生內
宣朗而外檢飭惟恐一置其身於玷闕故見幾勇退不俟
終日其深衷殆未易測者然則經綸文采雖不盡著而本
質既茂卽枝葉又何算焉夫閱錦尺幅知爲美繒嘗鼎一
脔識爲珍味先生篇什不多遺而藻思概見矧雅馴有矩
矱與其行符美而傳可必也茂才君能世其家論者
謂先生有子則志業所未竟維其聲之庶其述之矣

王叔呆書陽湖三記後

王介園存稿

蓋嘉靖壬寅歲予方為諸生愛陽湖山水之勝旋購得之
稍芟榛蕪樹花竹建亭榭浚陂塘而勝漸增後出仕中
外垂十五年每憶故山景物形之夢寐輒丐弇山王公鹿
門茅公並為予記之大記畧備而丁丑歲予獲謝吳兵政
以歸湖山如昨而手植已拱矣是時已絕意世路念河清
之難期撫榆景之可惜益大治之陋者旁斥闕者旋補頽
者第復故者聿新之或位置弗當則徙作他所或品題未
則易以別名比之疇昔為勝大倍復請於弇山公得後記
而始詳矣顧眼前二記中多不合然不合者人工商綴而
湖山大槪未嘗少異矧二公文章大家片言足使園林增
勝予故併存之大司馬崑崙公行部海上過而樂之為雜
詠十首嗣索和於弇山公公以不廉戲我要乳柑三百顆
為報後海內同聲題詠者漸多積以成帙予盡梓之以紀
茲墅一時之遇云

國朝

劉士焜李益侯因名集序

李象坤
菊菴集

觀人詩者觀其所感而已荒臺弔古馬首懷人謂之一無
所感可也吾黨砥礪所在以借聰明惜歲月惜交遊爲急
務粹爾倡酬之作亦當如誥如誓如箴如銘益爲勞歌毋
爲齊還以此不媿風雅其可耳不然騷壇之客多於澤蒲
豈少此數行墨瀟哉發吾覆者益侯兄
也壬午閏月十日識於因名集之左方

周天錫李益侯祭花齋集序

天下之得抒吾胃臆者惟文章而已世人動稱摹古於文
則漢於詩則唐毋論摹必不以卽摹而似亦豈得爲吾之
文吾之詩乎哉予友益侯博學工文章而品隲今古與予
同一日出詩文若干卷俾予序予爲著論曰益侯詩不必
摹唐而興端托緒落紙皆警賦物懷人注情獨妙何在非
唐文不盡摹漢而矯顧怒步徑欲已開琢冰跨虹色非外
設何在非漢若夫倫理所伸無歡不聚山水所值無險不
酬此又益侯發筆墨於性情吐煙雲於意氣未可以文章
繁也或曰益侯古詩逾律五言古逾歌行古文詞碑傳誄
序記大篇誦小品予不復辨夫銖而較寸而合是未知益
侯者也卽區區以詩文知益侯又豈真知益侯者哉予知
之故序之以見益侯所重在彼不在此也已亥洛佛日

傳狀

宋

薛嘉言通議大夫劉公行狀

劉給諫集

公諱安上字元禮姓劉氏系出彭城世爲永嘉人曾祖延貴祖瑩父去非以公貴累贈正議大夫公少端重有成人風祖父持所鍾愛曰異時必大吾門與從兄舍人安節同硯席相友愛尤專勤嗜學講習忘寢食既長俱以文行稱公踰冠首鄉薦復聯名游太學並爲上舍生迭預魁選聲稱籍甚號二劉一時賢士向慕爭與之交赴省闈別試第稱人登紹聖四年進士第丙科解褐調杭州錢塘尉公操履清峙輝映湖山人謂真仙尉謹身律下每被檄所部雖庖厨必自辦以行秋毫不以市於民所憩惟亭傳僧寺否則芟舍露坐食息自如見者咨美之受代畱圭租縣廩爲後人冒請暨還過之雖久客竇甚勿問也公以名流陸沈下僚怡然無忤色究心職事有捕獲功未嘗自列曰幸人之死而已取賞吾弗忍爲雖同列以是被遷不以介意卒用薦者升處州縉雲縣令除登州州學教授時三舍法初

行擇師儒國學尤極其選遷博士學行德器尤爲後進所
尊仰差考試貢士舉院故事考官各進策問取進止上皇
雅重公文親筆選用以車駕幸學恩循儒林郎後改宣德
郎大觀元年除提舉浙西學事陞辭進對風度詳雅論事
合旨既退上皇顧近弼稱某蘊藉有推鞠多以屬公公持法
深薦之留爲監察御史朝廷有所推鞠允多所屬公公持法
尤審而更根於誠恕吏不忍欺讞議明允多所屬公公持法
服無恨意十一月遷殿中侍御史常曰偷安患失尤非言
官所宜故居處薪芻服用之物取具朝夕十二月磨勘轉
奉議郎明年因入寶恩轉承議郎三月遷侍御史賜五品
服公沈厚謹密凡風聞事皆反覆詢究或遣親人參驗得
實乃始論列舉無不當一日奏事上皇目送之曰劉某言
事可謂詳審矣屬時相擅政竊弄威福凶焰滔天意所趨
向海內風靡黨與蟠結根據朝廷無敢撓其鋒者公獨挺
然不肯阿附極言其罪抗章不報乃與石公弼率同列廷
論之詞旨愷切時論偉之在言路三年凡所彈射皆汗穢
不法敗政亂俗之尤者其不畏強禦如此平居恂恂若不
能言至辯論人主前安詳不撓無所畏避以故眷注愈渥
三年八月遷諫議大夫逾月丁太碩人憂公性純孝未冠
正議公卽世掩泣腐袂奉事太碩人色養尤篤自筮仕以

至禁從榮侍版輿與溫清奉甘毳供笑樂始終如一日
至是毀瘠幾滅性卜葬盡禮極哀榮之奉廬於墓側手蒔
松檟蔬食終喪徘徊不忍去公生於里之西洲及夫人既
亡宦游往來經行其處必凝望泣下人以爲有終身之憂
慕焉政和元年冬服闋以中書舍人召先是兄舍人由察
官登對王音宣問公安否及寓止何地既朝見入對上皇
面諭以曩日詢訪及簡記識擢之意二年用元圭恩轉朝
奉郎踰年除給事中其所欲納論駁有補時政者甚多俄
請外甚力九月除徽猷閣待制知壽州四年以上舍試所
差官撰號差互罷提舉亳州明道宮復以磨勘轉朝散郎
封文安縣開國男食邑三百戶五年除知婺州七年磨勘
轉朝請郎進封開國子加食邑二百戶時六尚書降造花
羅額數頗衆督程甚嚴公以抑配多民困論乞蠲減弗克
則奏以非土貢願不爲例又部使者往往專事花石以市
恩寵州縣希旨幸賞或遣使臣檄州計置督以支錢應副
舟車事公初不與之辨但按法移文回報往復閱時淹久
使臣苦之遂巡引去自是無來者遂免無名之費調發之
撓民陰受其賜焉尤不喜笞辱人少年或坐法公察知其
家子資可教則命其父夏楚於庭責使就傳其務教化厚
風俗蓋有古循吏風治婺州凡三年鎮撫惠養百姓德之

里人過其境詢及遺愛則人人以手加額至今稱頌八年
移知邢州時祖母徐氏無恙年逾九十奉之甚謹初遇恩
妻張氏當封以祖母未命遜避不敢當奏乞回授徐上皇
嘉其意優詔從之封仁壽縣太君念諸父蚤世而徐氏年
彌高邢去親庭益遠遂丐官祠侍養宣和元年六月得請
提舉建州武夷山冲佑觀九月丁太孺人徐氏憂公以介
孫承重遂終恩禮有加鄉閭榮之三年服闋除知壽春府
累表辭免不克四年磨勘轉朝奉大夫進封開國伯加食
邑二百戶壽公舊治民懷恩弗忘比再至老穉欣迎扶攜
遠近者屬路府於淮西爲大藩屯兵萬餘密邇京師每歲
上供十二萬石應付畿內軍糧賦亦稱是雖遇凶歉租賦
放免殆盡而稅額不少減前此官吏復加槩量及羨餘以
幸苟免民重困流移者衆公至嘆曰奈何剝下以逃責耶
凡諸司額外泛拋一切不應以撫綏寬緩爲事漕臣預調
專餉奏乞較定一路上供及支移之數課殿最行賞罰以
風屬郡是歲壽春官吏遂以數劣被劾降官復以椿發軍
糧虧欠再被削秩以去終不自辨也六年除知舒州踰年
請宮祠從之提舉南京鴻慶宮靖康元年覃恩再轉朝請
郎加食邑二百戶尋復朝奉大夫朝散大夫以疾乞致仕
轉朝請大夫建炎二年正月終於正寢享年六十詔贈通

議大夫命有司量助喪事卜以十一月壬寅葬於永嘉縣
建牙鄉玉清觀後山公識度粹凝宗工鉅儒見者莫不許
以遠器自爲尉以學官薦者十餘人守帥豐公稷皆譽推
獎禮譙集則分韻賦詩講論文義延留彌日不以僚屬待
也大觀初令侍從各薦所知右丞徐公處仁以公應詔其
爲當路知遇如此素堅正靜退未嘗苟進取却使者或欲
縻公致門下寄聲知舊諷使致謁公薄其爲人終不詣之
尤不喜竿牘爲教官登州或勸貽書時貴丐東南便親者
公謝不顧也暨閒居里間當軸皆其知舊或請致賀答曰
吾平時不通書今遽賀之得無疑我有求耶於時俗持祿
養交率顧望迎合以規進取公深鄙之爲御史多所彈劾
務存大體振綱紀不爲許直取名凡論列章疏退輒削橐
雖家人子弟無得見之故其奏議人少知者嘗語人曰在
言路久仇怨殆滿目矣然吾職風憲獨安所避顧在我本
無心耳出典三郡凡所設施不務表暴示以好惡而人自
化御下寬簡不苛吏卒服役之餘咸許自便然嚴重叵測
莫敢慢也或乃爲投合以求當公意終不可入殆所謂易
事難悅者動準繩檢進止有常度而遇事裁決咸中理解
所至有惠政在婺市田以給浮橋費民便之刻石紀德其
守壽春屬比郡歲饑流民強屬公爲區處舍止什器資養

畢具至者如歸屢丐常平賑濟勿許則倒廩散之曰民困
且死奈何坐視不恤倘獲罪吾當之其有病者以私財爲
致醫藥爲糜以食之不幸死則給棺槨卜爽塏收葬之民
賴以全活不勝計恩及境外矣蓋其志在爲民凡所興爲
必欲其利及久而所濟廣者蓋如此與人言如恐傷之待
僚屬未嘗失色然剛正不可以犯尤嫉賊吏壽春屬令有
貪墨聞者既廉問審實一夕追逮証佐盡得姦贓令窘急
賂當塗致書營救公不答卒使引疾解印綬去諸邑爲之
竦動始公先達爲侍從前少宰吳公敏故右丞許公景衡
未顯公識其遠到舉以自代二公繼登宰輔時論隱然服
公知人胸中恢廓而謙恭執禮一於純誠不爲繼芥矯節
遇人無遺小大貴賤至胥徒臧獲語必拱手自名雖晏處
私室家人不見情容和裕有體至於臨事則斷之以義於
嗜好淡然略無珍玩財物視猶糞土雖身處富貴自奉簡
薄殆有布衣所難者慈孝友弟蓋其天性宗族內外四百
口服公之化閨門雍睦無閒言溫良謙遜有萬石君家風
位侍從二十年所得恩澤以先弟姪季弟安仁以太碩人
所鍾愛遇之尤厚憐其困躓場屋首以大禮恩奏補其後
早卒諸孤幼穉撫養加意不異己子既長爲畢婚嫁躬與
日者往來山谷閒卜地營葬訖事喜甚曰吾今而後無復

他念矣既疾無甚苦謂家人曰吾其止此乎臨終之夕猶
誦西漢且命區處爲翌日親朋燕遊之會既就枕覺風眩
起坐命藥繼至而亡其好學達理高明令終死生之際不
惑也如此嗚呼母宋氏累贈太碩人娶張氏朝奉大夫親
賢宅博士時敏之女封碩人生子男二人長曰謙承務郎
前蔡州監稅克有家次曰誥女一人歸修職郎林待問孫
男三人尙幼公早與兄舍人從當世先生長者遊深得中
庸大學指歸故能以其所學發爲政事致身侍從當巨姦
朋邪傾亂朝政持一介孤忠力排抵之僅以獲免後雖歷
位禁閤俄值斯人復進用事勢焰赫然度不能抗因懇丐
外補自是十有六年終老於外雖仇怨銜之刻骨欲搜抉
瘋孽冀以中傷而卒不能避回宮祠優游卒歲處之泰然
亦無慍色卷懷豁晦不肯爲赫赫名真若畏人知者故其
進退始終大節而逆推夫所以用心殆未易以闕其際也
蓋其蘊蓄浩浩淵淵用之誠有未盡彼暴露銜鬻者抑公
之所哂也耶公爲文典重有法尤工五言晚更平淡渾然
天成無斧斤跡有詩五百篇制誥雜文三十卷藏於家卜
居南郭治第築園盡湖山勝槩益喜賓客至則觴咏延款
無斁暇日杜門觀書味道養性或攜杖課園丁畦蔬蒔果
以自娛嬉當其心閒意適雖田夫野老亦欲與之對非所

豈雖位顯爵尊扣關弗見也故識者論公平生出處以方
唐退傅白至其夷曠淡泊無聲色之娛詩文雅正不爲纖
豔浮華之語則又未可以優劣論也公於嘉言爲父執行
世中表姍舊且同里知公爲詳然公潛德隱行所不能窺
者蓋多姑實錄所聞
少備採擇之萬一

薛右史行狀

浪語集

君諱徽言字德老世爲永嘉人曾祖元禮祖庠皆不仕父
強立少登科禮部侍郎鄒浩嘗以學官薦厯州縣所至有
聲清正怡退終金陵幕官君其季也少孤警穎先令人卽
世時方在襁褓比成童先中奉捐館舍獨與諸兄講學識
慮已過人既長能自立力學刻苦窮晝夜弗懈遂博通經
再舉登建炎二年進士第解褐授南劍州司法會車駕幸
永嘉君以書謁中司趙公詆一時用事者趙公大稱賞以
國士期之俄移蹕會稽趙遷樞相力薦君蒙召對以強志
勤政及君子小人爲言頗合旨改左承奉郎充樞密院計
議官踰年前用事者復當國君一以誠正待之雖銜恨次
骨欲中傷之終弗能也紹興二年議遣使君以選權監察
御史宣諭湖南性明爽雖筮仕未久而疏通若素宦飽於

更練者既臨遣敷奏詳明入境布宣德意揭示教條檢覆
吏姦無不契事機當人心者奏本路不便於民者十事乞
委憲司覺察違戾且請岳飛綬定湖南及鄰境給韓京營
田免全州隸廣西節制乞選岳守與潭鼎腹背制么賊論
柳道永桂陽丁米均敷見存一丁至石餘者並帶羅之弊
時田荒羅貴命州縣量城市遠鄉道里朝暮可及者自近
及遠區處賑糶由是羅價頓平濟惠甚溥咸戴上賜不以
遐遺也且請存留漕司上供錢斛賑濟柳道桂陽三州罷
營繕等費薦本路憲呂祉柳守趙不羣全倅劉延年前衡
倅趙伯牛統制官吳錫等朝廷皆召用初抵茶陵縣慮囚
有以平人為劫盜者片言折之審知官吏冒賞之冤立下
吏痛治為直之人稱神明論漕臣措置州縣日納移用等
錢苛歛且縱吏門下姦賊請繩治又按發知桂陽及永邵
三守常監令等不法祁陽令等妄殺按賊吏之尤者械送
獄以論譚帥非其人又其閒發掘稍多行之且峻不無忤
權貴意既還權發遣興國軍而它使皆進擢識者為不平
亡何以比部郎官召後虜騎次淮右軍車駕幸建康扈從
以行方倉卒進發先駐蹕平江及春還臨安一時事宜人
情敵勢知無不言譽望彌著改兵部又改吏部左選遷右
司改左司檢正中書門下諸房文字遷起居舍人首以申

嚴歐陽修王贊所請令賜對臣僚少留殿門候記注官出
面錄聖語及親奉德音事干教化禮樂刑政爲世典法者
並備錄開報記注官士論美之金使至許還徵宗梓宮及
母后河南地時無故請和且無邀索有識詢深以爲慮
朝士皆知不可而無以拒之君位螻蟻朝夕憂瘁直前面
奏及侍從同對辯論尤切因感疾時方正旦猶欲力疾侍
立家人苦諫始在告疾寢革語猶不忘國事以紹興九年
正月壬辰辛亥年四月十七日上聞爲之悼惜有旨贈帛百匹
與遺表恩澤娶胡氏累封安人賢淑和鳴侍湯藥尤謹遂
染疾後君十三日亦卒君什雖晚而早達銳意功名君相
眷注方渥人皆指日待其遷也而竟止此莫不傷惜之爲
流涕云生子男二人長季隨次季宣女四人越明年九月
十九日葬郡城西太平山之原君天性忠鯁獻替甚多今
皇帝卽昨初君以布衣上書言時事政曰國勢曰邊防曰刑
賞曰巡幸曰財用曰官吏凡六事既仕於朝首請擇賢宗
室立爲皇嗣勸大臣和協濟功乞宰相不親細務又撫陸
宣公奏議可酌取以救時者如減兵之冗食蠲法之撓人
省官之不急去物之無用罷事之非要五事紹興元年詔
以星變訪闕失乃上書言所當深憂者三曰國本未立曰
佞倖未去曰國論未定且曰憂其所不足憂而忘其所當

深憂此父大可憂者也其言皆切中時宜初聞徽宗諱主
上銜卹哀痛時議軍國事遽欲遵用以日易月除喪君建
議終制成上之美識者韙之開府岳帥方以議論不合棄
軍請終喪廬山君遺書爲陳大義勸諭岳幡然感動卽日
蒞軍其它建白彌縫有補於時多此類兄殤與君尤友善
時帥荆南方召用力丐外得請安撫虔南因以過家爲畢
窵安以盡其誼似非偶然者將葬季隨哀錄遺稟請狀
其生平行實將求立言之君子爲之表志以示不朽云

薛季宣陳益之父行狀

浪語集

公之子謙初以文章試太學聲名籍甚某主敦宗南院道
莆田過故人著作劉公夙問後生之賢某以謙對劉言謙
之賢者皆以其父夙前教授温州時謙以諸生講肄州學
夙喜其質明銳爲痛裁却以成其材退常憚然於中不使
謙覺之也其父卽知夙爲有意琢磨其子夙心知其賢於
人顧未嘗識其面某曰君得之矣君所知於陳公者教子
一事公之鄉行有足賢者某嘗聞其人矣然於鄉公之老成
雖雅知其名非身察知其賢不輕言也嘗與公會望其容
色溫然和粹聽其言語簡而誠慤意非常俗之士問之公
也始知其爲鄉里推重之有以能教其子以立門戶若天

道之報然某之迎家而歸會公將葬謙與兄某某弟某某
共哀公行將求名士而銘之屬某敘次其文某辭不得謝
爲直書其事焉公諱敦化字某其先家福唐五季亂徙橫
陽又遷永嘉鵬飛里世以輕財嗜義德施於鄉公生九年
罹方臘變鄉之平居爲不善者羣不逞嘯屠之而共莠匿
保公以全十五丁父艱二弟皆幼公奉母夫人經理家政
井井有條理夫人一食不飴公輒憂之見顏面方疾湯藥
非親嘗不進遭喪廬墓左哀慕至老不衰兄弟相友及見
二毛不忍析異公性夷曠不立城府與人接無纖芥雖龐
夫單婦三尺童子一皆詞情溫厚有以慰懌其心家累百
金益能增修先德之施伏臘之外率用振業族黨鄉閭之
急難餘以修治橋梁平夷道路無畱者凶歲人多閉糴常
發私廩平價出之賑貸單貧孜孜不倦鄉間信服其誼爭
訟多不之官府得公一言卽時解散鬪很爲是益希少公
雖蚤弃書學所爲常與理造經界行縣選公平比鄉之賦
至今稱其均一金人逼淮甸又請公治鄉兵時諸鄉繕甲
騷然公格令不下曰此但擾耳鄉民賴以無事而它部兵
亦不成部伍家園有竹萬个二古梅公常笑傲其閒陶然
自適萬事不以挂念客至無不傾倒皆歎其古君子也盡
心教子迄能有所成立莫年謙上名禮部人謂公世殖善

不顯天其或者遂將倭大其門而公不卒見之也以乾道二年五月六日卒享年五十有五鄉人於公之疾日奉雞豚祠神禱謝死之日咨嗟相顧有爲之流涕者烏乎公何以得此邪公常自言不能利澤於世遺愛一鄉足矣以匹夫而澤迨鄉里賢矣哉子男五人女一人卜以歲三月某日葬公於郡西岑之原列其行事如右

葉適宋故中散大夫提舉武夷山冲佑觀張公行狀

公姓張氏諱季樗字延卿温州府永嘉人幼入太學用忠簡公恩試吏部第一監臨安府糧料院遷勅令所刪定官司農寺丞兼權倉部郎官換工部皇子鎮明州選爲司馬上面諭曰卿輔魏王當如端明教朕也公拜謝會有異議者徙知潮州潮沐韓文公遺化俗矜厲自喜公倣古以便今用刑甚簡崇雅黜陋士民愛服提刑行部貴倨甚候迎累日不至公賦詩稱遠地井蛙尊以誚之提刑怒深文劾公公引詩自辨上笑曰守臣不應罵監司耶竟罷起知南劍猶坐前謾不行知杭州猺人屢入城邑關通博買無忌至濫惡抵負而睚眦讐劫之禍移於平民謂之準把公按舊法重禁越界來往者有至市則令都巡防監視訖事各還剽奪衰止公言都巡防與猺相持最苦請三歲一補官

以責盡力土城纔四里高十二尺如女垣爾且用板屋風
漂雨淫非所謂設險也請甃磚石備樓櫓以期永久又特
起貢院數延後進爲言科甲可喜而向於學者滋多矣於
是自總領以下皆薦公宜留本朝公自以離郎署二十年
故人無在者力請外得光州自光西南行漸遠淮流而就
岡阜其樹林巖石幽茂深阻恍惚隔塵世山如繡屏畫卷
數里一合水紺綠隨山方折流轉大聲出雷霆細聲中琴
瑟蓋江南名山水不能及而土人以爲梅林沙窩存著老
幼處也公上言異日欲遷郡沙窩久矣決遷之易守禦便
儲積人心既固可以牽制可以進攻此五利也請以城壁
事付臣既而與商延昌兩易濠州濠人占地無頃畝之限
爲後至冒耕不較也暨田成而爭訟林起州縣往往有所
左右公獨中分之官私厭服以公斷爲法初公至郡謀報
虜主祈大清宮且窺邊州人大恐定遠縣逃奔幾盡公不
爲動但遣承局趣取子舍遠近安之亡者復還就知和州
公之在光濠朝旨建廣儲倉他郡徒改椿積立號名惟公
置敖貯米如令軍校死必募善弓馬事藝補之光有司馬
公祠薤草爲庭除歲時率官屬拜其下其能實事不具文
而名義兼舉多此類至和首開三河復胡昉故跡剗車蒺
藜火藥傳鏃右轅左蓐嗅地望塵廢關遺隘之要無不預

講然時論既將遠計而疑公爲平世守邊者故秩公以沖
佑觀使自請而去公亦倦游不復求仕凡續祿再三焉嘉
泰四年閏二月二十二日卒旦盥洗索常食食既視瞻炯
然家人抃叫曰起疾矣其日卒年七十八自文林郎積官
中散大夫開國永嘉縣男九月二十四日葬瑞鹿西岡夫
人潘氏封令人男五人曰燧通直郎福建船司幹官先卒
曰煒儒林郎新監行在點檢贍軍激賞酒庫所羅場曰炳
從事郎廩監縣丞曰耀迪郎新建德知縣潘櫓迪功郎泉州
郎女二人其壻曰宣教郎新德均曰堪曰壙方以公致仕
錄參葉春孫男曰坦將仕郎曰均曰堪曰壙方以公致仕
宮之曰堦曰堦曰堦曰堦曰堦曰堦曰堦曰堦曰堦曰堦
坡曰增曰堦曰堦曰堦曰堦曰堦曰堦曰堦曰堦曰堦
營次許嫁進士周保之餘幼也公志慮精密前嫁將仕郎鮑
十上事小大皆有成畫深而不迂切而易從言州縣受納
盤量常欲今歲出剩多去歲商稅增額必以役而一年最高比
較彼安從得皆出於民耳又言民納錢免役而役不得免
今姑令見役保正長免當界役錢可也此可謂知憂民矣
又請內外官奏對須長免當界役錢不許泛引閑慢人已言者
盜復言之期於必行而巳此固知治體之論也至言陛下
無恃江爲險必守淮而後能守江修城增戍所以守淮也

或曰增戍難在錢糧移江置諸淮爾何難且州郡不敢合
教甚無謂虜今日打獵明日巡綽率用千餘騎豈慮警動
我耶此又壯論異於人者也始忠簡拒秦丞相斥之晚翊
孝宗終不肯取報政公耳目陶染故雖列省寺無顧戀意
連擠於外視後出捷起騰上無悵望心惟以家門素業爲
事二子既登第誨諸孫尤切書室縱橫與同臥起休沐不
使踰戶限余每從公見其動止有常節得言語之
味樂而無荒未嘗不敬下風也嘉定四年九月

明

黃淮陳母汪氏傳

介菴集

陳母汪氏者永嘉沙城名家女也幼習姆訓貞順若夙成
年廿九歸同里陳庾陳望族饒於資隸役鰥場長百夫庾
二兄仲兄慶執役坐累逮者至慶他適庾以伯兄童當承
宗祀力引咎就逮法司議罪輸作卒於役所汪氏時年三
十有二聞訃殆欲無生顧子辰方三歲義不可不育乃忍
死自誓以圖無愧於九泉居亡何童慶等皆先後遂行以
死所遺者汪氏母子耳行時又盡質田產充路費然汪氏
竟莫知質之何人以故賦稅鹽筴弗聽蠲除而豪右乘隙

陵侮抑配以流亡逋負俾代庚冀奪其志汪氏仰天泣曰
未亡人何面目與人較曲直於是舉所遺服飾以輸官輸
不足加以榜掠艱苦萬狀而志操愈堅陵侮者亦未如之
何頻年繼以饑饉汪氏左支右吾暇則紡績紉維率至夜
分方息訓飭厥子俾承父志子亦知自砥礪甫十歲屹如
成人比長漸次圖復家日以裕汪氏始盜居不與外事向
者雖在顛沛中而辨益虔今齒近八旬童顏鶴髮而辰須
皆有禮法至老弗懈益虔今齒近八旬童顏鶴髮而辰須
髻亦頽白諸孫森列後先天之佑善方盛未艾也辰念母
氏勞苦創北堂以安其居時率諸子女稱觴上壽跪拜階
下母亦怡然自慶諄諄以敬慎戒厥子女鄉里有識莫不嘆
羨曰是誠無愧爲母者矣遂稱爲陳母云史氏曰易序卦
渙後受之以節陳緒渙散極矣匪藉汪氏節以振之不幾
於隕墜乎范史云端操有蹤幽閒有容汪之謂歟國朝著
令女年未及三十守節靡渝旌復以爲世勸惜乎汪氏年
與令相左弗獲光膺顯命此私著之傳所以作也庚年少
有室未久挺然代兄就死尤人之
所難節義萃於一門何其盛哉

項喬袁芳洲傳

錄
東

袁子名遷字宗喬永嘉舊族也世居黃嶼洲中及宗喬咀
華浸郁不干利勢是洲之芳日聞於外吾郡縉紳遂以芳
洲呼之一日讀范文正公傳至不得爲良相則願爲良醫
乃喟然嘆曰宰相之職能使匹夫匹婦不納之溝中醫師
之良能使疲癯殘疾不陷於天札吾業有在矣吾無以株
守衡字爲哉遂於是究心焉嘉靖己丑予舉進士宗喬應
薦而來與予同旅突數月予知之益深嗣數試禮部有學
涉二經墨步二王之譽不四三年以特旨授御醫其回疾
起瘍十不失一朝之縉紳亦皆以芳洲呼之宗喬業乃益
廣名乃益著彼固淡如也曉夕談及洲中趣味則口津津
然予常嘆今古隱者往而不返必銖視軒冕仕者溺而不
止必圖視邱壑二者皆非也嗚呼若宗喬者其人蓋可傳
矣因爲傳云贊曰謂子芳洲也子則我冠象笏出入於禁
闥間矣謂子爲非芳洲耶誦其話言蕭然物外若世網不
足嬰繫焉者然則子殆有識者耶不以江湖而忘廊廟之
志不以富貴而易草野之心者也謂子爲芳洲先生非耶

金昭張仁山丈人傳

張氏譜

嘉靖丙午仁山丈人廩食黌舍計及邵堯夫皇極所經一
世之期將以貢次上春官試八月望日實維十六是夜未

央月華麗空纖靈不翳河光搖碧秋毫坐分家爲奉親蓋
考之燕懼甚倏焉涼風徐來陰雲四起雷電皆至潦霖若
傾萬籟怒號人無寧宇既而海日昇紅颺收雨息厥明天
霽間里老稚舉疾首感類相告以丈人溘焉捐賓馳訃鄉
校自師長士下逮庖糶隸人莫不悲咽咨嗟至有掩泣涕
下余時偕桑梓之彥大比省闈辭場不浹日驚聞丈人考
終凡在比諸生與都人士昔傾蓋丈人者亦莫不悲咽咨
嗟至有掩泣涕下夫陋巷青衿飭躬砥行身不占一命澤
不下一民而存順沒寧有以感動天人若此則自古玄德
退屆至誠潛孚不尤大彰明較著矣乎丈人邱墓草宿而
木拱矣其孤仲鄰持同門友孫明德氏所手次事狀泣示
余爲傳夫明德嘉靖名御史雅志澄清嘗兩銜天憲代巡
朔方中州廣厲所加世皆循爲國是丈人可不朽矣無盜
假余增之高耶第余於丈人誼有勿之有默焉耳矣者丈
人卓有識鑒不謬爲許可始得余文諸生閒謂必爲時用
余雖無似不可謂非知己也又余卜氏學受王先生拱甫
而丈人實親以四始六義授王先生且仲鄰與余同日爲
教官弟子一解后卽以燈火筆硯相簇礪一畝之官麗澤
息遊則以周官遺模逆關雎麟趾之意藝林載質則以商
人逸響會高山流水之音雖遇合不偶無能強而同然久

要以不負所學則猶旦暮也是皆勿之有默焉耳矣者按
狀丈人諱燮字伯柔號仁山前諱鐵字伯鑑憲副五溪萬
公視學命更今名其先閩人一世祖慎菴府君諱敬者始
遷永嘉華蓋鄉携仁山陰滄湖里別號所以識也父強默
公諱增母王氏生丈人宏治庚戌十二月丁卯兒時即穎
特不凡羈貫失恃孝養厥考且耕且讀貧無儲書惟家藏
古詩文一帙誦記歲餘掩卷不註一字時太師張文忠公
未第築精廬瑤溪山中集同志究觀古今篇籍於諸從子
最愛丈人首以詩傳之大闢溫柔敦厚之旨公方註釋戴
氏禮杜工部詩輒令采釋故典還證意義多所發明公瑚
璉之蚤夜不相離去事見公所撰窮源記中年二十餘爲
郡庠弟子員又明年補廩膳生入試鄉闈六陪貢選未嘗
少萌覬覦之心郡之大姓欽慕其愷悌嚴毅爭迎爲弟子
模範盡以己所持身篤行者罕譬而諄復焉嘗曰明於己
而不明於人非所以成己也徇情欲而忘生其謂父母遺
體何見後學有趨嚮者汲引之如骨肉疑則竭己以釋之
急則殫力以周之其孤之尊賢取友樂善不倦急人難而
謀人必忠詎無所淵源乎方其得不家食也思以志養而
親不待每遇終身之喪必編素爲具號泣盡哀竟夕不預
他事太師既宅撰益歛鐫藏修不啻篋門圭竇之士故今

少師存齋徐公爲督學使者溫廉得丈人篤學亟進而
獎之曰士人析理不精鮮不盡於聲利以程門高弟猶有
蔡人彭習禮記之言子能藏器靜需不可以卜家教耶故
大司馬靜峯張公亦嘗持勅校藝不爲文辭矜獨於丈
人申之縱吏其曰崇正大戒近小在學宮浩氣有聞處名
開盈氣不露秉忠持信重義輕財誠有所試矣太師謝病
歸歲時出賜金上祀追恩昭穆之所自出下等族屬親姻
之乏困者而搞賑之丈人請曰祠始遷祖餒而合族焉考
德問業悉所疾苦冠昏喪祭期於得禮者可不煩告詔睦
嫻任恤期於展親者可不隔形骸是非曲直期於得情者
可不勞南面太師欣然是不隔形骸是非曲直期於得情者
張氏萃渙之舉永嘉巨姓由是以朝廷惠養老臣之資盡爲
友禮讓之風斌斌乎還小鄉魯者伊誰之力耶誠假丈人
以位則蘇明允族譜亭錢公輔義田記蘇子瞻之敦教化
勸親睦諸篇將不爲紙上陳言矣得觀於張氏宗祠益信
金子曰余讀子思子書言大德必得祿位名壽太史公論
著伯夷顏淵事謂天道無親常與善人及究遡二子采薇
西山屢空陋巷儻所謂道無德是耶非耶子云孝友施於有
政是亦爲政孟稱大人居仁由義體用已全是雖事功無
所效軒冕無所榮德成言立丈人可不朽矣復况天地之

道寢造物者忌多取一言之幾乎道天之所以與我者夫
豈偶然哉周人之詩曰施於孫子又曰克昌厥后丈人昌
不克身將詔孫子無蓄不通無否不喜勿恤其孚於食有
祉後之視今猶今視古奕世多口豈無以余爲知言者哉

國朝

王錫琯孝子張慎五傳

張氏譜

孝子者何蓋嘗薦於鄉而訓於庠者也然則曷不鄉貢之
司訓之而必曰孝子孝子云者從其質也從所重也孝子
名師典字公徽別號慎五其先自閩之赤岸徙於華蓋鄉
普門里六傳而少師諡文忠孚敬始大顯少師兄子曰郡
中書舍人生承明仕大理評事評事始大顯少師兄子曰
二丈夫子長曰天麒以歲貢任連江縣知縣次卽巡撫雲
南卹晉兵部侍郎天麒則孝子之父也孝子幼而明慧塾
師課之讀如三都兩京一再過卽成誦踰年試之猶十得
五也司馬公以獨子殊憐愛之就館退質所業績膝而戲
如成人舞象補弟子員弱冠餼於庠遇試輒攜孝子俱嘗
奇每入闈恒銀別而返司馬公敷厯中外輒攜孝子俱嘗
念遠離二尊人膝下繫寢食思則遣使代侍奉二尊人左

右承歡問視溫清無閒一如司馬公所爲就養者外而周旋三黨傾肝膽重然諾急人之急如呻己痛而不自功矩正規完稱法度士司馬公用是得悉心王事不敢以翮離告勤勞靡監卒終於滇計聞孝子以不獲視含舉身投地幾不欲生徒跣走三千里叩棺呼號絕而復甦行道咸爲感涕扶輿歸里獨居苦次足跡未嘗出戶外又念王父母在堂不敢以長號戚老人心每哀至擁衰掩泣淚簌簌下沾衣袂袂盡濕閱三年如一日也見司馬公片簡隻字奉若拱璧司馬公故廉於官而行裝數篋悉封真一室數載不忍啓母夫人欲厚其弱女而行裝數篋悉封真一室數載以所遺篋予之始終不忍視數喪相繼賓從盡散孝子每獨攜草笠腰芒屨與友人谷宗綱攀險血趾得兩吉壤皆鬻產以售襄事成禮至是而家益落矣性狷潔雖貧未嘗以饋授當事多司馬公門生故吏相與延致輒引嫌避諸公以此逾益重之甲申之變孝子悲憤填膺懼司馬公行業湮滅蘭足走閩京具疏聞當亡時上風知司馬公賜諭祭葬蔭一子入監仍命官孝子孝子以藉父干榮非其志再疏固辭得報可歸居久之循次貢於鄉又十五年授峨縣司訓杜門讀書課諸子以孝謹聞出從一小僮布衣儒素人罔知爲貴公子者既而陵谷遷變縉紳之家橫

邁凶閔而孝子之門晏如以中無可欲者耳烽燧方熄宗譜散佚先後相承十餘世其系次皆漫滅紊亂無以萃換而類族於是倡集宗黨之俊彥晨夕編摩而身總其成蓋以孝子之曾王父及王父皆從事於修譜而王父以司馬公計未卒業而止至是始克終之然稿未脫而孝子已疾疾且革猶前諸子諄諄以卹睦宗族之事爲勛其尊祖敬宗雖易簣不忘有如此孝子卒於己未之二月春秋六十有九晚年好吟詠祕不示人獨與老友趙紹鼎翁肩春相酬和有詩集若干卷藏於家雅善臨池書法逼真司馬公子六人廣建雲鷺瀚生漢生黥生皆以詩書世其業云

祭文

宋

劉安節祭王正翁

左史文集

嗟嗟正翁而遽然耶其一去而終不復返也耶昔公之赴官臨川也予往江心孤嶼餞之曰公仕矣且去鄉里其亦私事未集者乎予不敏願實力焉公曰吾仕矣又何求然吾他日歸顧未有廬可居者公愛我盡爲我營之予曰

唯唯公既就道余惟命匠治公室是勤室且成公亦代有
日予固蚤夜望公之歸以盜其居也而乃沒於中道也耶
其託我以以居居成而不得寢處之也嗚呼哀哉是月也公
之子將以公之柩葬於西岑之原故悼公之不復見也敬
侍母親往以薄奠祭公於新居之正寢惟公有知其聽斯文以審我哀

劉安上謁先考正議墓

給諫文集

賴祖考休庇竊祿京師達遠松楸迨今年七年天禍我家先
妣傾喪日月不居奄今卒哭號天叩地哀痛罔極苟延殘
息扶護歸葬未卽死滅不
敢不祗見墓下嗚呼哀哉

林季仲祭察和弟文

東軒雜著

嗚呼吾弟其信然耶其不然耶其信然耶旬日以來書問
連綿取而視之墨猶未乾其不然耶何潮得遠來必非謬
以傳也嗚呼吾弟何幸於天何豐其才而嗇其年忠氣陵
厲橫驚孤鶩瞬息千里不俟著鞭磨以歲月之悠久資以
師友之淵源置諸古人中未知孰後而孰先也嗚呼已矣
吾復何言八十之親華髮垂顛汝爲季子尤所受憐赴官

江左期此承顏日夕望汝來至膝前那知禍變起於轉首
之閒耶嗚呼凡今之人誰無弟昆惟成與汝自幼多艱險
阻萬狀辛勤一官僅立門戶少免饑寒方飛折翼半涉失
船誰慰庭闈之哀晚誰救原隰之急難誰受子姪之付託
誰同文藝之討論誰陪杖履於歲晚誰對燈火於夜闌嗚
呼吞聲飲泣含悲茹酸詭音訊以苟日月強笑語以奉晨
昏吾親之寬亦汝之安也吾已慝懇於朝言旋故園謀爾
嗣於宗族歸爾骨於山樊至於弱婦幼女責我當專縱濫
先於朝露有仲兄之尙存汝可以無恨
於九泉也嗚呼痛哉嗚呼冤哉尙饗

薛季宣堂祭四二叔母文集

浪語

嗚呼古之至人蓋有坐脫而立亡者吾聞其語矣豈若吾
身親見之哉惟靈稟德之和清揚有婉相而夫氏幾大吾
門鞠育遺孤母儀可則宗姻嫺睦人無閒言方爲女宗以
式諸婦胡爲不淑弃之如遺抑且晝夜死生天數冥合將
行留自在與造物俱邪吾不能知有見其臨終者矣近世
男子盡心於性命道德之說始終一是不爲物閔者誰與
茲靈之亡固有常儀
在陳哀一奠家有常儀

薛高祭士龍弟

浪語集附錄

嗚呼士龍克配天地人謂伊何存誠之至嗚呼士龍克紹周孔人謂伊何傳道之統卓然自立匪求已知貌醜言訥恬不干進博學有守遇事敢爲凡此四語廷臣薦辭一遇君相草木知名吾家之瑞天下之英規模宏遠粗見一二文章事業乃其餘事一歲三遷驟至五馬殊不驕人姁姁儒者德修於己翕然不應有遠復密受以正神鍼一砭致釋我至疑分雖吾弟道實我師慘別游宦寤寐心馳閒致安問真情寓詩尚覲顯用行其所學爲世指南覺所未覺乞歸待次雖慰拳拳應酬百日未暇盤旋如何輕信不慙於天比喪兄母復悼惠連罹此劇禍我心傷悲一動一靜如將見之生平行事宛類叔父有子可託以光宗祖嗚呼士龍衆方仰德溢然朝露孰不嘆惜嗚呼士龍我病方瘳來告斯文慟哭流雨

葉適祭鄭景望龍圖文

水心集

嗚呼鄭公官雖不爲賤而未得要地以建明年雖不爲天而遽委慈親以先卒在物理而不然抱此疑兮安詰一人

為善福及彝倫至其大者國命攸存豈善人之猥多致神
祐之靡專自死自生或壽或夭惟其所遭莫適控告嗚呼
哀哉歷觀近歲賢者之志各出其力以救斯世然而質有
厚薄意有同異疎者受侮剛者見忌上下之交不合君臣
之心罔契嗟寶王之誤斥難復登於衮佩而猶淪謝滅沒
不存一二匪摧棟以折軸將喪朋而亡類惟公順正靜密
夷曠粹冲不違其心不爆其躬出處進退潛涵顯融謗譽
不及庶幾中庸此愚不肖謂如公者可以繫天下之望而
待萬物之會通區區之心冀其德業之愈懋年壽之日隆
宜百齡而未已曾一病以殂終嗚呼哀哉某之於公長幼
分殊登門晚矣承教則疎自聞公喪晝喟夜
吁茫茫長空慟不可呼死生一訣公其享歟

戴栩仙都祭薛瓜廬文集浣川

嗚呼笑睨浮雲宇宙物蛻哭視潛壤師友道替水心往矣
我師者誰子又繼之我友日稀凡我友朋散而仕游念子
塊處條春蒂秋側聞杖屨赤城之麓題句巾山任蕃赧縮
示我新集逸響琅球我念子敏世莫與儔語與留聽書無
停瞠千載之精盡遺其龜繩尺彌修芒鏐匪礪期子皓首
復返卒歲人日子疾我省則非丹顏戟髯蔚其有輝歟驚

饑客甚哲而臞飯不餉合飲水滿壺嗚呼子竟僂去豈以疾逝詩傳雞林字照四裔家有令兒競爽齊芳華締未完克紹其堂煙散火釀子盍肯歆愴悅陳辭式鑒此心

明

黃淮祭叔舅良齋先生文集

介菴

猗歟吾舅尚友古人德崇行確學富識真振宏綱以啓迪手後進揚茂實以敷暢乎詩文其緝麗也爛若蜀機之錦其變化也澹兮春空之雲謂宜薦郊廟而宣金石聞皇猷而贊經綸乃憂深而思遠盍窘步而遂巡姑小試於芹泮邁退處於衡門寬衣緩帶泰然以自樂疏食水飲不知其爲貧勢利輕兮鴻毛氣誼重兮千鈞猥愚蒙之弱質辱善誘之循循致有寸進獲厠朝紳感徒銘於肺腑恩莫報於涓塵自擬仁者之必壽載瞻晚節之松筠詎意天不憖遺遂使鄉邦儒彥咸慨嘆而悲辛公喪未久賢配繼絕沒踰一紀二子沈淪彼福善之理茫乎不可測愚亦莫究其所因憶在詞林公計來聞尋以非才累歲遭屯以常切於追慕徒南望而傷神幸蒙思以昭雪荷寵眷之維新茲以疾

而賜還展宿好於宗姻仰慈顏之莫覩兮痛五內之崩裂
感渭陽之遼邈兮洒涕淚而沾巾依松楸兮奠尊聊薄致
兮殷勤靈彷彿兮如
在願垂鑒兮斯文

王健祭陳翁文鶴泉

嗚呼陳翁若翁者豈非占稱一鄉善士者哉往里居每從
士友談故鄉長老之德則僉曰陳翁訊之曰翁和敬以處
人無少乖慙之色自束髮迄今種種人窮乏輒隨所有亟
翁行必如其言言無妄發曰每每見人窮乏輒隨所有亟
濟之無問多寡健聞嘗私竊羨嘆以爲翁誠有如是操履
也使出而稍干仕籍者則庶幾哉翩翩與名卿大夫匹流
矣乃益蓬華終身不肯苟祿徇世此其所見殆未易以輕
議也且夫天道無親惟善是親不於厥身於其子孫乃吾
觀翁子伯揆氏起家從王之事奉翁訓以周旋凡夫顯官
達人見必愛而任之方駸駸用未艾則翁之善亦不爲
不顯見矣而天道之說不可徵哉蓋聞之曰植善如植樹
樹有根儲善如儲水水有源陳爲吾鄉望族先世類有隱
操至於翁旣培之固而濬之深矣無惑乎翁子者若將放
而赴海引而干霄也嗚呼翁胡不少留以觀厥大成者而

遽溘焉逝耶夫人生厥有終始大化忽以推移矧數雖有
限善則無窮翁又何憾哉於是伯揆聞訃卽日血泣南奔
健與諸親友者明祭潔醴相率而哭奠於
郊嗚呼陳翁惟翁有靈幸乘風惠享之

項喬祭羅山張文忠公文錄

歐東

惟公勲業滿朝廷聲名滿華夏某不待贅也然嘗推本而
論之有赤心報國之忠有龍咆虎嘯之威有風過霆馳之捷
剛有一介不取之節有龍咆虎嘯之威有風過霆馳之捷
君子待之以無恐小人憚之而魄奪嗚呼某何幸與公累
世通家得侍公門下也耶方某之計偕而筮仕也公於力
學而取其志於舉業而取其文於淡薄無求而取其節故
藉底出身而公獨鍾愛焉初欲選爲吉士次欲舉爲吏部
次欲改爲御史某皆以不能其官而辭謝不就其後改官
於翰林也則以某作蔡醫官送行文觸冒時忌乃不與然
而必波及之而不知公所以保全之者實有在也是故某也
忘公薰赫之勢而時効芹曝之棕公之初召也某進開誠
布公人自不忍操戈之說公之既召而還鄉也某進無地
起樓臺下猶戒傲虐之說公之既召而還鄉也某進無地
起樓臺下

堂拜縣令油油然當齒於宗黨之說公之三召也某又進
包荒用賢始終無間之說中人以上讀之或爲吐舌公相
見輒謝所言皆中予病皆爽予衷毫髮不芥蒂也公之於
某可謂有殊遇矣嗚呼人或疑公不待士以某例之公何
嘗不待士哉人或疑公不聽言以某例之公何嘗不聽言
哉若公四召之後已在疾病之中緣是居鄉一節雖或不
能盡合於古然而微瑕何足以掩連城之璧功業在朝廷
者天下想之如渴饑恨不能復起公於九泉也公可謂不
負此生者矣公子遜業痛先志之未繼慨然知講學好修
而惟日不足是公之明神實教之亦天報忠良之後而陰
燭其衷也某受公之恩若此其厚近公之居若此其甚也
敢不弔死事孤夙夜獎掖同歸於善以慰公於幽也耶公
蓋棺論已定茲將就墓可以瞑目無憾矣尙饗

王叔杲祭給諫東華弟

王介園存稿

往余丁未歲在京師聞滑中治盜事蓋凜凜爲弟危已而
真盜既得滑人戴弟爲建生祠余曾讀其碑文及魏人往
往道其事今越二十餘年而余來守大名得躬覩弟廟貌
追念疇昔不能不泣然流涕也余與弟生同庚髮未燥同

與嬉游同習句讀同在庠序弟志氣超邁甫弱冠舉進士
爲東昌理又理茲郡召入省中未幾爲時相所嫉出之嶺
表竟以忤當路棄歸卽起兵捍寇卒以戰死余言之猶
心裂也其生前之不偶非特親知骨肉痛惜之固海內之
士所共惜也今在東昌則列在名宦在滑則有專祠在故
鄉則有敕建祠宇贈官錄蔭長子舉於鄉次子以錦衣世
襲文武並茂其身後之所享權貴固已灰滅無影而弟之英
爽奕奕如在乃知天之報施未盡爽而善之未始不可爲
也余守是邦當不負弟素所屬望弟靈有知尙冀翊我於
有終也

祭伯兄西華翁

嗚呼吾伯兄年踰稀壽完福考終誠可以無遺恨矣弟追
念疇昔觸目傷心益能不肝摧而腸裂耶惟吾考妣早歲
艱嗣晚連得我兄弟自離襁褓靡刻不與兄追隨也稍長
就學弟情兄勤藉以督課先公攜宦母夫人棄捐京邸莞
焚朝夕抱泣扶輿歸葬依棲墓廬相向悲辛惕勵茹苦迨
夫成室姜被猶同世情兄弟孰有如吾弟與兄者哉已而

相繼登科屢同計偕北路馳驅南雍肄業又無日不與兄相追隨也庚戌之春先公望耄弟侍兄行爰登甲第得差榮歸先公棄養除服之後猶躊躇山四五年勉弟脩舊緒以圖載奮而弟則絕意進取矣兄起官夏省入典春科校文寄弟謂桑榆可收強弟就試弟感兄言出叨一第時兄移鎮荆西持憲嶺表翻然卷懷自此睽違者十餘年然而書札頻仍未嘗不以名行相砥礪世情兄弟孰有如弟與兄者哉幸而履歷有聲出處無愧既並奮乎青雲復同歸於白首金緋早謝林壑預營與三四昆季冠蓋翺翔壺觴登眺鄉里侈談以爲盛事而兄則病矣然而歲時之蒸嘗族黨之宴會同勤鄉族之誼共脩敦睦之風兄固不緣病而稍廢也弟雖虞兄飲食之漸減然猶幸精神之未衰謂服餌靜攝猶可久延詎期淹忽而化耶痛忍言哉痛忍言哉兄純德懿行上擬古人弟難殫述顧鄉邦失其典型後生失其楷範弟欲質疑難如往時侍笑言於暮景何可再得哉追念疇昔能不肝裂而心摧耶嗚呼百年有盡五福無虧諸子嚮往未涯孫曾昌熾可待蓋棺事畢卜兆允臧兄九泉可以瞑目弟藉以無遺憾矣薄奠告哀惟靈鑒只

王叔果祭季父寺丞公藏稿

半山

嗚呼叔父智足以料事揆變而禍蹈於不測義足以保鄉
底族而身隕於非命仁足以恤窮獨匱而不獲毫耄終以
食報於天此皆理之不可信而果輩所不忍言惟我叔父
英資天植正直無偏處勢若退見義必前以具慶而躬乎
甘旨遂樂志而畢乎林泉藉燕翼之餘享安榮之福垂七
十餘年迨我先公肇建宗祠敦舉族約凡以講信而脩睦
者實賴叔父以周旋島夷肆亂毒痛海壖叔父倡義糾旅
咸武布宣壯猷義膽老而彌堅往歲夏帥戰歿黃侯陣殲
衆皆悼惜而叔父獨羨其賢謂丈夫生世能以身殉國何
必於首領之全又嘗忿官軍之畏縮致賊勢之蔓延謂使
我秉麾仗鉞必能殄滅羣醜廓清瘴烟果謂兵凶戰危未
可易語而叔父願以爲不然嗚呼豈意平昔所推論者遽
以身蹈之一逝而不可援身無民社之寄職非將帥之權
徒以義氣感奮蔽扞間里而竟厄於速遭此果之所號呼
痛憤直欲叫閭而籲冤鄉人哀慟如喪所天且將謀尸祝
請國典圖不朽於萬年嗚呼有生同盡芳譽永傳英烈之
氣炳乎貫日星而亘山川第吾宗隕此老成吾鄉失其屏
翰奚所依賴而仰瞻果情關骨肉痛切潺湲薄陳牲俎敬

薦誠蠲維英靈之有
赫恍陟降於几筵

祭中丞竹巖叔父

士君子之立於世也進則思澤天下退則思表一鄉使非
出處有道亦惡能身際其全維我叔父孝友質直純於天
性淵閑博朗邃於精研而鴻猷遠略則抒於負荷之堅起
甲科而試鉅邑晉臺憲而肅官聯代狩滇南埋輪發驕危
之釁貳司廷尉讞獄疏牽制之偏忠誠風采簡注於廊廟
者卓矣而稱賢嗣膺節鉞開府萬里牂牁西焚之屬奔咏
而爭先尋以帥臣違迂功罪未雪遂引疏而歸田率真敦
朴師表於鄉族推誠孚惠軫援夫顛連乃若山雲水月倘
徉眺咏偕賓朋以卒歲望之矯捷而如仙故詢耆舊者擬
謫公之復相卜壽履者祈衛武之齊年胡天弗憖倏爾歸
盡而元化之厚於賢哲者或未盡然要緊叔父終始之際
令名全節有聲於出處借老昌允篤慶於美傳而不朽之
論則炳史冊而光山川果科第名叨同榜而果與本仕及
同朝羣林處而周旋生平切磋訓誨仰藉於叔父者未可
以言宣感念今昔真若石火之與電烟而音容想像曷已
夫腸割而涕淚崇觴告誅敬薦几筵惟英爽之不昧瞻陟

降於
在前

國朝

張振夔祭秦觀察巴明府暨吳呂兩先生文
文介軒鈔

在昔神君風和恩結亦有通儒義高勇決是皆有功於民
一轍云何以酬崇祠表碣萬戶香花朝撤夕設豈翳貢媚
庸試宣說莊長官穀流毒最烈當其未除吏肆饕餮何爲
莊長奴隸之列維富是充士農無別官來追科曰供餉啜
里有奸盜曰聽効職吏胥謹呼莊長喫咽奉金上觴乃脫
累絕時惟呂君泣訴觀察惟我觀察明如月嗟我子民
幾何膏血驚擊狼貪民何能活痛斥有司立刻貪悖母立
莊長而激一切士還讀書農則耕墾前三十年吳君勇勃
欲除未能傷哉逝沒今者之除何其諸協若呂若吳孰巧
孰拙吁嗟觀察邦家之傑仰澤懷風銘我心骨惟我仁侯
官穀割截不放空封苛派門閥告糴四隣吏絕媒孽絹粟
既輸家無騷屑迄今追思歲月如瞥莫報長生五中蘊結
配食招提如得禪悅以佛慈悲若合符節惟官我我惟士
子子候民病利寔相頤頤矧茲乾元棲遊更迭來者千秋

期生眼纈有酒而清有罇而凸陟降在
庭神其昭哲福我壽我永永清浹尙享

雜記

宋

薛季宣克齋前記

浪語集

克齋之故名曰損損齋損私之齋也仲尼稱克己復禮
爲仁老氏謂爲道日損人雖不同言理不異今夫人之生
也涵虛而無體曰命通一而無方曰性命不易也性不遠
也物其故有也道亦其故有也耳目爲聞見奪心志爲利
欲移然後私意萌公義隱迷或失道貫習爲常其故有盡
亡於是爲小人伍往而不返則將與飛走俱日遠於人遂
不可求諸人域收心正性故聖人貴焉今人病之切身孰
不務亟其去習非害性之爲人患不切於病乎人知病而
不知非聖人於是乎不作仲尼展蹈其元顧不同邪仲尼
明一以貫之道師表乎萬世蹈也違之不悟天下號名大
愚猶之水然清明明自其本性埃塵渾之以濁本性固存定
而澄之則爲清明也於其元奚辨人能去惡以復性又何

讓於聖人哉皆知弗爲者非他私奪之也走生二十有三
年矣日聞道於聖人之書然臨事輒失其情益知勝私之
不可不務是以攷之大易取損卦以名書堂曰損齋以爲
居處期將齋心室欲反本歸仁日革非心庶乎盡於此生
也損益盛衰之
始敢卽之銘之

克齋後記

始走以損名齋記其命之意旣三祀矣友生有至自錢
湖者道其所聞曰上方作室禁省謂之損齋竊嘗睹齋記
堯文詢之於人良是也小臣矍而慨曰聖人與我同慮哉
夫人達道而行是則人所共有聖人先得我心之所同然
者誠足喜哉禮貴賤雖不嫌同名而天壤一號不可也假
名存而毋害亦不能一朝居也思有以更其名而未得已
而知所以自解曰天道人所共可以君爲道而實之哉
仍故名而不安亦辟之而已爾君臣之學自有辨又何疑
焉於是卽記以求名而口克己復禮之目仲尼告以非禮勿視
以續前志曰顏子問克己復禮之目仲尼告以非禮勿視
非禮勿聽非禮勿言非禮勿動夫仁者人也仁之道謂人
無之可哉惟以物遷是以去仁而不省聖人戒慎乎所不

睹恐懼乎所不聞動容周旋中禮不違於終食之閒物何
自遷是以仁決乎四體夫如是乃盡人之道顏子之所以
拳拳服膺而毋失自致具體而微者也學者以顏子爲準
繩於此豈可不務走細人也固不可以希聖然知人者人
之道則吾之道也吾雖失道將可自絕於人克己歸仁何
敢緩也顧走之失有不能若人者八焉聞道而未之能行一
不若人也放心而未之能制二不若人也處己而未之能
盡三不若人也多言而未之能法四不若人也樂善而未
之能擇五不若人也愛物而未之能容六不若人也居世
而未之能處七不若人也任私而未之能去八不若人也
凡所謂不若人者皆性天之所無有從欲而得反身而未
之能善有一於此不可謂仁況有其八乎弗亟去之無以
爲人矣及今能以禮自克率性而知道哉或庶幾乎可也
爲詩銘之以自警云穹弘地天灝灝無垠惟道參之粹焉
者人人安其仁則惟聖神往而不反曷爲其身循道而
行無事於勤出入惟時乃凝乎真勒之銘詩請法先民

葉適敬亭後記

水心集

初鮑商霖有星於雁池河南張思叔命曰敬亭且記之由
此名聞天下百餘年亭廢歸薛氏子舒按舊基復作亭刻

記其上程氏誨學者必以敬爲始故思叔曰敬則實實則
虛虛則無事矣以余所聞學有本始如物始生無不懋長
焉不可強立也孔子教顏子克己復禮爲仁請問其目曰
非禮勿視非禮勿聽非禮勿言非禮勿動顏子曰回雖不
敏請事斯語矣是則復禮者學之始也教曾子曰安上治
民莫善於禮禮者敬而已矣故敬其父則子悅敬其兄則
弟悅敬其君則臣悅敬一人而千萬人悅是則敬者德之
成也學必始於復禮故治其非禮者而後能復禮復而後
能敬所敬者寡而悅者衆矣則謂之無事焉可也未能復
禮而遽責以敬內則不悅於己外則不悅於人誠行之則
近愚明行之則近僞愚與僞雜則禮散而事益繁安得謂
無此教之失非孔氏本旨也然則何爲曰禮之未復是身
固非禮之聚爾耳目百體瞿瞿然擇其合乎禮者斯就之
故其視聽言動必以禮當孔子時禮尙全完禮者斯就之
有條目可見也後世雖禮闕不具然是身之非禮者固常
在爾出於己加於人小則紛錯潰亂大則爛漫充斥蓋若
白黑一二之不可掩其敢忽乎故非禮則不以視聽言動
而耳目百體瞿瞿然擇其不合乎禮者期去之晝去之夜
去之旦忘之夕忘之誠使非禮之毫髮皆盡則所存雖邱
山焉始無往而不中禮也是之謂禮復禮復而敬立矣非

強之也因以補思叔之遺爲
敬亭後記嘉定四年八月

戴栩江山勝概樓記

浣川集

謝康樂守永嘉垂七百年郡人始卽城北門爲樓以康樂
泛中川涉孤嶼歷覽倦乎江壖因取北亭敘別之詩借樓
以表之然晉之永嘉屬臨海合三郡戶不滿二萬今較以
一縣何翅倍蓰計其當時荒涼寂寞窮爲草莽之區與今
之塵肆派列闐闐隊分者迥不侔矣以故市聲傾洞徹子
夜晨鐘未歇人與鳥鵲偕起樓跨大達自南城直永盍橋
最爲穰富俗以雙門目之而罕以謝稱也獨郡有大醺會
守與賓爲別席更衣之地酒三行登車迎道殷訶回集府
治往往快里陌觀瞻而已其在斯樓也或牖扇弗啟帷帟
複張曾未覩江山之面而詎能識康樂之心哉四明史公
以奎閣月卿藩宣我邦嘗按圖牒登樓而玩之病其庫陋
不敞且頽棟落楹礎沒而瓦漂慨曰江山信美而誰與領
之乃闢舊址乃鳩新材兩廡旁翼三闔洞開周以欄楯臨
以采思白淙界其前峙羅浮接其右隈斗山四繚迭爲崔
嵬大江橫以東下勢欲去而徘徊見夫雲霞出沒景魄往
來寺塔映乎林壑艘船湊乎帆桅於是江山之勝興目力

不約而諧矣。康樂始獨受是樓之名而不專其。今同享江
屏閒然則康樂全其公與康樂神契於七八百年之上。非
山之實而得樂者歟。雖然昔人論江山之勝者以險持壯
所謂善學康樂者歟。雖然昔人論江山之勝者以險持壯
以德持險而觀眺之勝也。郡城之十而隅居其五。蓋屏蔽大
者而觀眺之勝也。郡城之十而隅居其五。蓋屏蔽大
江便於守禦。自郭山抵海壇然後達於三隅。延袤十八里
承平既久。墜圯日增。公嘗曲慮密籌。計丈尺度。土功將請
於朝。節郡費以新之。可謂得設險之政矣。雙門本唐名。後
易為望京。郡俗侈外而窺中。高車大蓋。填巷塞途。冠裳履
服。士隸忘別。故公每欲辨名分。崇禮節。而民狃於故習。未
遽革也。惟舉善而教使之見義而心服。聞過而意消。則人
和之效。又在於設險之先者。允協於古道。則江山之勝。備
內外具本末。公之為是郡也。允協於古道。則江山之勝。備
吾觀眺者。暇日從公而登之。可援筆而賦矣。

黃淮持敬齋記

介菴集

庚戌秋予疾作不出門庭逾半載里人林心靜來候袖出
持敬齋卷拜於榻下求記困憊無聊未有以復也嘉平之
旦疾少閒泛舟往省先隴經紀善金公宅艤棹進謁會履
素趙先生未嘗往也擇族山川險阻曰少時以家事當往
季父憐其未嘗往也擇族山川險阻曰少時以家事當往
涉大溪私心惴惴徐以杖測水淺深按足然後移步竟涉
無虞族人恃其習也若履坦道初不經意半涉為湍水所
激翩然殞仆藉有力者扶掖起之衣服皆沾濡予聞而喜
之曰是可以復心靜矣蓋履素之竟涉無虞者敬慎之至
也族人之半涉隕仆者怠忽之所招也敬與怠相反吉凶
亦以類應丹書曰敬勝怠者吉怠勝敬者滅丹書為治天
下之大經大法其要旨亦不過敬怠二端豈區區小事而
已哉喻之以小取其易見也心靜自童艸喪明不能事事
遂從瞽者張所清學以人之生年月日支干生克推測禍
福壽夭率多徵驗後又得解魁陳光言廨舍鄰比光言篤
燈課誦心靜從旁竊聽默識心解閒嘗聞說敬之與義躍
然喜惕然驚思曰是某之所當勉也自是刻意持循不敢
放失仍求善書者大書持敬揭於齋居以示不忘嗚呼心
靜可謂知要矣昌黎韓公所謂盲於目不盲於心靜其
殆庶幾者歟予竊惟夫世之耳聰目明悻然自以為丈夫

率於持敬漫不加省趨逐便利以濟己私往往僨事危身
若半涉殞仆者故著是記俾知所戒且以最心靜無怠厥
志云

輔仁軒記

楠溪山水之會曰嶺頭著姓潘叔軒氏世居焉吾友紀善
梅窗金公嘗館於其家叔軒閒以延賓之所請名焉梅窗
命之曰輔仁蓋取魯論之語勗其慎於交友也夫友道之
不振也久矣世之人多喜佞諛而惡箴規隨波逐流淪胥
及溺者恬然無悔聖人深爲此懼法語拳拳直指以示人
又列三益三損之目使人知所向背而相率以爲人也其
在於易陽爲君子陰爲小人復之朋來無咎以其一陽始
生同類漸進也比之匪人則吉遠君子近小人則凶此蓋聖人
應也近君子遠小人則吉遠君子近小人則凶此蓋聖人
進陽退陰之微意聖遠言湮末世滋僞至或以交友爲植
黨脅肩諂笑酣醕縱誕喜則飾詐以相樂怒則反目以相
噬非徒無益而其爲害也孰甚焉又豈止於隨波逐流而
已乎叔軒端厚敬慎承文獻之故習廣耳目於見聞而又
得梅窗與之講論其於取友信不苟合切磋之益宜其日

新而月盛又何待余言哉雖然交友誠得君子矣又必堅如金石不可乍合乍離泛泛如塗人之相視者昔晏平仲以善交久敬見稱照映編簡叔軒其勉之叔軒嗣子宗烈實梅窗之高弟其於輔仁之義盡亦知所謹歟

張孚敬奉敕撰敬一亭碑志

府志

洪惟我皇上受天眷命嗣承大統稽古帝王之學以復古之治雖堯舜何以加諸五年丙戌夏六月嘗因觀書有得御製敬一箴頒示臣工序之有曰敬者存其心而不忽之謂也一者純乎理而無雜之謂也又曰惟敬是持惟一是協所以盡爲天之職庶不忝厥祖厥親由是九族親之黎民懷之爲箴凡二百八十八言大哉皇言一哉皇心真得堯舜傳心之要法者也明年丁亥冬十二月又因講大學衍義有及宋儒范浚心箴乃并程子視聽言動四箴復親爲註釋以人心惟敬爲主衆欲之攻多自視聽言動入而人君一身所關爲尤重焉聖訓諄復皆義理精微之極所以發明敬之一道益大備矣書曰天降下民作之君作之師仰惟皇上天作君師茲訓也匪徒言之實允蹈之所謂爲法於天下可傳於後世者也輔導諸臣請建亭勒碑於翰林院并兩京國子監南北直隸十三省府州縣學

咸令摹刻俾天下士服膺聖訓有所興起制曰可敕名敬
一亭工部乃拓院後地建亭勒碑於中五箴并節奉聖諭
共六碑分勒左右勢極崇麗實一代盛制也御製有詩以
紀其事亭肇工於戊子春三月訖工於八月輔導與侍從
諸臣咸樂教育宴會以落成之臣等敬載歌聖德伏承御
製詩重示訓戒且大資在宴諸臣并程工官屬有差恩至
渥也九年庚寅秋七月掌院事學士顧鼎臣請勅輔臣撰
文刻記載臣等敬奏言大聖人制作如天地高厚日月昭
明非臣下所能贊一辭者上命內閣首臣撰文臣復自揣
卑陋謬承寵命具臣而已又惡乎敢伏惟君者長人者也
師者教人者也記曰能為師然後能為長能為長然後能
為君三代以來克盡君師之責者臣仰惟皇上見之矣對
揚光訓紀載歲月實臣子所宜自幸敢固以卑陋辭昔孔
子贊堯曰大哉堯之為君也巍巍乎其有成功也煥乎其有文章
蕩蕩乎民無能名焉巍巍乎其有成功也煥乎其有文章
臣敢以是頌焉雖然古之君臣有交相戒飭之道皇上祖
述堯舜傳心敬一性之德也臣子實有愛莫助之者也惟
久於其道則天下化成也詩曰周王壽考遐不作人又曰
臣子孫勿替引之
臣又敢以是禱焉

奉勅書無逸殿右壁府志

惟十祀春三月帝社帝稷成皇帝率卿士肇禋爰命治地播穀樹桑於是作無逸殿書周書無逸作豳風亭書七月詩臣孚敬謹拜稽首請曰惟茲盛典宜有聖製上謙光至再請乃曰朕皇考嘗作農家忙律宜大奉書於殿朕題豳風亭有詩其書之亭仍令輔臣各著言附焉臣愚庸辭勿勝命上重令臣進解先皇帝睿製臣伏讀見敬天勤民焉見對時育物焉嗚呼先皇帝雖處藩服實憂以天下樂以天下者也臣又伏讀皇上誦農家忙記述取七月無逸之旨著明先皇帝睿製精微極致憂樂之大皆繼述至孝所發也孟軻氏曰憂以天下樂以天下然而不王者未之有也先皇帝施於孫子皇上祈天永命信有徵矣臣謹竊詳無逸之旨不出於嚴恭寅畏之一言呂祖謙曰嚴則謹重恭則隆下寅則肅莊畏則兢業合而言之則敬而已矣昔武王銘於囂曰隨天之時以地之財敬祀皇天敬以天時皇上取無逸之義以銘茲殿也奉書先皇帝睿製愛敬之至也夫愛之斯弗忘敬之斯盡其道焉耳嗚呼休哉

奉敕書豳風亭右壁

幽風亭成皇上取御題幽風圖詩命書之臣李敬謹拜稽
首颺言曰嗚呼惟皇存心天下憂思孔艱匪徒言之實允
蹈之者也臣竊惟七月之詩周公以成王未知稼穡之艱
難故述其先公風化之所由以教之也臣仰惟我聖祖嘗
命工畫古孝行及身所經歷艱難起家戰伐之事爲圖以
示謂侍臣曰朕本業農祖父皆長者世承忠厚積善餘慶
以及於朕今圖此者使後世觀之知王業艱也又曰富貴
易驕艱難易忽久遠易忘後世子孫生長深宮惟見富貴
習於奢侈不知祖宗積累之難故示之以此使朝夕覽觀
庶有警也臣稽首莊誦皇上題幽風圖詩真得聖祖傳心
之要而又多出周公言外之意誠所謂不諫亦入聖之德
也宋儒有言曰仰觀星日霜露之變俯察昆蟲草木之化
以知天時以授民事子女服事乎內男服事乎外上以誠愛
下下以忠事上父父子子夫夫婦婦養老而慈幼食力而
助弱其祭祀也時其燕饗也節此七月之義也臣竊惟幽
乃西陲小邦也其風俗之厚如此卒基成周大一統之盛
爲有道之長我皇上嗣此丕基而尤深體祖考艱難之思
神功聖化萬世無疆矣詩曰嗚呼皇王繼序思不忘又曰
休矣皇考以保明其身臣
仰於皇上曰切願望焉

王激游巽山記

鶴山集

出城南五里許爲巽山按國土在巽吉之地故山以巽名
羣峯峻削巋然具瞻草叢林薄未嘗有游觀之具也正德
丁丑爲郡守陸公浚治之三年官無殷政民端物軌廢興
墜舉無所事事百姓奉期出租稅而已春三月公因諸生
之請修平茭別構屋數楹政暇則觴其上而國人多一游
地矣仲秋望日羣載酒以修勝會激亦濫厠几杖之後芒
屨布襪涉冷然獨登石徑逶迤下俯枯澗稚松種種緣壑不
絕履豐涉虛綦荆齧足由旁麓四五繞始達峯頂既而羣
公酒酣縱觀寥廓亂山怪石喬木奇嶼如駛如湧如立如
拱如奮而怒如畏而恭江遠帆沒村暝鳥歸落霞滿川波
光如絳牧唱漁歌杳然空濛激灑之外薄暮雲收烟滅明
月在杯脩然雅懷似出塵劫因思游觀雖一時假聚暫合
之樂然亦有數存焉我朝御宇百餘年來皇天示警以固
盈成之運中外多事四方頗驚政冗官煩民憂吏垢唯國
之民霑洒守臣之澤田不蕪林不伐黍禾雞豚可以伏臘
食飽則澡手而嬉無所畏懼斗城九山之靈亦得與羣公
相忘於形骸之外乃知游觀亭榭之修廢焉見之雖然茲
峯在天下之治亂常於游觀亭榭之修廢焉見之雖然茲

既土不知幾千百載矣藤梢棘刺之所沒狐狸鼠兔之所
嗥樵兒牧豎亦未嘗憩息嘯歌於其上今而陟然得接冠
劍儀衛之榮而復有義冠長佩山衣道服不可物色之人
周旋尊俎以助高致是知山林邱壑無干於世亦侯數遇
而後顯然則天下之英雄豪傑困伏於草莽山澤之間者
其遇不遇未可遠爲前却也激重有感於茲焉作遊巽山
記

來雨亭記

正德丙子少府孫公以進士試政東甌清望世家協於人
士登用未艾而山林邱壑之懷時出塵表因舍外多竹遂
謀構亭隙地以逞遐賞於時踰月不雨矣公懷利器而新
發於矧劖水吹毛無所用刃第念時屈而有僅雨之憂於
亭若無所有事者既竣功甘雨大潤亭遂以來雨名秋入
月望羞羣公戴守司駕以落其成門遠囂遠巷永竹曜清
影參差夕陽澄地微風動而環珮鳴明月來而金玉碎舉
酒相屬形釋氣融激不肖昔嘗讀書郡齋羣公有昌歎羊
裘不可致詰之好故亦得與宴斯亭且併以記辱醉歸就
寢夢一羽士古貌長珮氣爽神清長揖而言曰上客知余

乎余先世居嶺谷黃帝時因伶倫薦理八風而天下大治
厥後族類散處瀟湘淇園而江南尤盛凡天下之清修孤
潔虛心獨操砥志行礪廉隅者比德焉少府神氣清遠年
力英妙余故早暮斯亭以求臭味風露月雲雨暘霜雪之
時余爲斯亭作清事者多矣今不屬余而以兩名無乃謬
迷於名實乎言方竟有一神人憑虛而下頽然長黜然黑
儻有儻無如來如往掀髯奮怒曰咄咄此君何所言之妄
也堯時十日並出湯時大旱七載余友豐隆使君萍號大
士邀余以蘇民病自是山林川澤之利非余不饒少府作
亭之時余偶訪玄冥君信宿太初宮未返甌民遂不堪命
此君亦顛顛枯槁不能爲斯亭生顏色余於斯時苟有爭
名之意則將赤此君之族也今不余德而且爲名較咄咄
此君何所言之妄也况少府以千里駿足暫羈甌土他日
大拜參朝政余將冥助之以潤天下功成賜第京師而此
君之子孫徵矣羽士默然良久曰謹拜昌言余真一節之
士也願丐餘澤以終其天年旁有一士自稱王虛太史公
大判曰昔田文論相吳起說相如回車廉頗屈今人功不
相當而不相讓者久矣然則此君之能屈而不爭其復可
少也耶少府之亭不可無是客也
既寤以告少府遂記其事於亭云

王健瑞峯先生祠堂記

鶴泉文集

昔在嘉靖壬辰瑞峯先生卒之二年泮校諸生以先生學
行請於督學退齋林公大參蘇原吳公蓋以祀鄉賢祠云
後十五年丁未林公復來掌兩浙藩事而林公者先生校
於南宮時首薦士也閒獨深念曰嗟乎古鄉先生沒而祭
於社禮也若瑞峯先生者則海內之望非一鄉之賢也豈
不可以義而專祠之乎乃捐俸金以委郡守竹墩吳君吳
君曰此吾守郡之責也何敢不勉以煩執事卜地得郡之
東南隅既鳩工聚材矣而以原金上還林公林公不可則
加崇增飾蓋經營僅數月而祠堂告成堂凡三楹前爲門
如堂之數兩序傍翼繚以周垣而堂之正位則先生之像
設具焉脩髯秀頰袍笏儼然於是卿大夫士以及諸氓老
弱咸奔走瞻謁欣焉若起先生於九泉而復接其警歆
也吳守以祠成不可無記乃遣使告鶴泉生王健曰子其
記之有供麗牲之石將刻以示來者此固藩伯林公之意
而某奉之以周旋者也健曰往健爲童時先文定公稱鄉
後進之賢必亟曰葉生葉生嘖嘖不絕口先生亦亟語人
曰吾取法於吾鄉其惟甌濱公乎一時愛慕之勤者莫加
焉而健之稍有知識也先生以世義故又辱與獎進故健

於先生之沒愧欲一効其區區之忱而未能也乃今得以
執筆爲役顧豈非大幸歟蓋健嘗竊聞我朝儒者之學皇
祖芟培列聖崇積在宣正間公卿大夫器局節行卓爾不
羣皆斲雕爲樸斂歆還真無忝乎夏商之忠質西漢之醇
厚也而摛文析理董不多得至孝武朝賢才輩出制作擅
詞宗談理者證印靈識妙解斯亦極一代之盛已及其流
之弊也靡麗勝而情實或鮮精微究而躬行弗協君子不
無恨焉先生於諸公之後思欲挽淳風變末習直以身任
而不辭也惜其遭時忌斥無崇位安秩足以感鼓又無長
錄以究其志故迄今有世道之慮者爲之嘻吁太息而不
能已然以健觀於先生文必法乎六一而不爲險怪無益
之詞論不詭於考亭而不爲師心自用之學至於進立朝
堂退處族里則取諸范文正之廣大至參以趙清獻之精
嚴卽其所樹上信能繼體先哲垂範後人矣若是而謂先
生之道未光於世豈其然哉豈其然哉夫務名勝者久之
疑務實勝者久之思今天下如河東薛文清潁水章文懿
及吾郡章恭毅公專祠者亦未或多見也而先生揪梓且
拱茲祠乃與此雖若天相其會可以見實行之孚人心之
良矣而健則曰繼國家理學名臣之後者先生也倦倦焉
崇德尙賢以敦化者退齋公也竹墩公夙考鄉評勇於從

義其得治平之先務者乎是則可書也先生名某字某瑞
峯其別號世為永嘉儒族以書經魁禮闈選翰林庶吉士
為編修撰以思出補廣東按察副使其言行政事多可
傳法其載銘誌家傳茲以仰先生於世世復系之送迎神
時展祀之餘人共覽焉以仰先生於世世復系之送迎神
辭三章列於左辭曰華蓋峯兮岌其千尋象浦水兮復清
以沈標正氣兮寫道心羌靈審兮姤節永余懷兮高深濫
吾登此山顛兮下周流於江潯公何為兮不我以臨日渺
渺兮愁望鼓墳填兮繁音右一公之來兮何方擁奎壁
兮煥天章先清風兮驅路後雲錦兮低昂華采衣兮既潔
溪毛薦兮芬芳紛彷徨兮進拜靈虵兮未央右二回風
發兮吹參差望星光兮爛九達靈保樂兮送將歸焱遠舉
兮雲際載文旆兮委蛇倏而至兮忽而
馳覽山川兮延佇心慙慙兮勞思右三

王叔杲玉介園記畧

玉介園存稿

先大夫厓翁自鄉徙居郡城之墨池坊南環清渠東包華
蓋山山之麓有太玉洞天迺晉容成子脩真所予購隙地
為園介在太玉之西因名玉介園廣十畝許故多植橘嘉
靖乙未予即園剪闢榛莽改葺垣除築軒面華蓋峯署曰

挹華軒後逼委巷市舍囂雜復漸購益園之左隅友人東
園程君雅嗜花卉尤善種菊予因以園屬之於園垣之西
周徧植松竹槐柳預除營布明年辛酉予偕計北去入仕
途丁卯以使事過家復理舊業稍稍就緒隨復北去嗣守
魏博備兵三吳先後凡八載丁丑幸謝政歸觀前所植竹
松花卉蓊然成陰矣滋培則藉程君力也乃亟命工肆力
營葺起自敝廬之門前夾叢槐引道未向於垣西闢門以
入贅石爲曲徑徑長數十丈旁結花籬蒼翠交加日中常如
暝蔽名園雲徑徑側列海巖又設石列坐覆以蒲團由徑
折而東過半編竹爲小門入橘園署曰最景園取蘇長公
桤黃橘綠句也門內結雙槽爲亭通小徑兩旁引雜卉爲
籬夾以枯松林如蓋振步而上爲爽然臺後有方池山
泉登湛畜金鯉魚數百尾登臺以望則海上遠山四出而
附郭海壇諸山擁翠屏列於園之後橘柚松桂秀色相接
憑闌視爽然如御風矣出最景園而東爲小門墻四週之
中多植斤竹數百竿雜以嘉樹芳蔭交覆而編竹闌其四
旁森娟幽雅炎暑不到亭中曰蒼雪塢亭後復闢小門入
叢蘭館館中置幽蘭數十盤脩茂殊甚而衆卉閒焉館後
有靜室檻臨小池畜花色魚百餘尾室四壁多置古今名
家書畫器玩由館折而西有亭北當海壇山左右松竹交

蔭署曰華麓山房庭前結山茶爲屏屏後橫列石塢植各色牡丹數十本稍西旋入小門多編寶珠茶夾徑爲籬中植古檜蟠結三星亭面之挹華軒則直其中也茲軒東向去華蓋峰二百步許而舉目可挹嵐光靄翠常侵几席閒蓋園中之最勝也軒側有兩古槐夾立夏時垂蔭蔽壇軒後爲石塢廣數丈置太湖英德錦川諸奇石覆以枯松又植奇花若玉蘭海棠謝豹川娟紫薇石榴山茶丁香諸種百餘樹四時花不歇由軒右側徑爲門東望華峰雲陰飄襲署曰翠雲扉折而南爲堂堂前歲種菊數百本森秀盈除花時雲錦爛然集賓朋宴賞署曰餐英館北爲樓樓東面橘園松徑紆青遠山浮翠引眺華山紺字我松露閒至是盡收園中之勝而初陽從海東升光炯翠叢中朝景尤麗因署曰青旭樓下爲室中置古書圖畫爲偃息所樓側有池爲晉王右軍墨池蓋守郡時嘗臨池作書故址猶存志所稱墨池坊以此也今重闢而軒其上環以珠欄題爲右軍洗硯處池軒之後有曲房十餘楹爲庖湫及賓從信宿所左側有小門仍入團雲徑達蒼雪塢塢東重門而出有徑百餘步夾植桂柏循此登華蓋山曰通華徑折而南有門翼然榜曰太玉洞天由門陟嶺有泉出石罅聞亭其上曰蒙泉亭嶺折而東數十步又折而北有泉涓涓出

石龍口甚甘冽足供一方之汲雖旱不竭志一清泉郡
倅馬公亭其前曰清泉亭其下為東甌王廟宏偉壯麗與
帝居埒又為王謝祠以右軍康樂二賢治郡流聲合祀焉
嶺又折而南百武望東躡級而上為資福寺宋林靈素脩
真故址也華蓋為郡主山屹立屏展寺門正據其勝俯視
城中官廨民居萬井鱗次街渠紘布左帶長江右環諸溪
四山列繞數十重登眺閒令入應接不暇真一方偉觀也
榜曰江山勝覽寺久廢予既葺東園藉茲山為勝因命僧
重構頗增壯左小堂有隙地為灌莽所翳余芟夷之得平
址數畝許而東南諸景榜曰華陽淨宇寺之右故逼
塔盡收郡城十餘文闢其址為樓五楹俯臨江流如在
嶺予移嶺稍十餘文闢其址為樓五楹俯臨江流如在
足下江心寺湖而松竹交翠擁匝與區不見闌闔榜
其勝不減中僧舍舊址稍夷之結上方菴九楹可為
曰凌翠樓終不僧舍舊址稍夷之結上方菴九楹可為
禪定所出樓達沙門折而北有徑繞樓外垣之下古木叢
覆其蔭茂甚徑穿蔭而上凡數折陟華蓋山顛為亭曰冠
華郭外之江山川原望中可盡盤旋而下指視玉介園綠
陰環接林麓則若跬步閒矣昔謝安石家居有東山所至築
卬象之予居鄰華山志稱東山山人自家食至入仕寢寢

於茲園之培植布置率預於數十年之前乃今亭臺池館次第幸成而華蓋上下諸景亦爛然易觀其惠於茲山者豈一旦夕一手足力哉園密邇居室望華蓋山如家山朝昏風雨予嘗憩其中偕昆弟朋友譙笑卒歲是娛晚景而樂天倫咸屬於茲園也非得命世作者告於草堂之靈何以託於不朽謹述梗略以請云

國朝

周天錫重建狀元坊記

花萼樓集

正統改元之年天子親策士於廷而次之其第一人則吾家畏庵公也公居松之東於宅里相望地樹之棹黃公養正爲書狀元坊蓋名筆云時既久傾仄顛實不可復治家大夫倡議將新之已卯之春忽拜山左之命王事孔亟議遂不果時錫下第歸自武林家大夫於括蒼道中告錫曰余此行別無所私唯先太史之坊業有成議不可以止其傳余語石室公俾首事小子毋辭勞毋避怨毋傷和勉矣余且行錫踧踖受命越三宿歸不抵舍趨告叔祖石室公公慨然曰唯然余責也隨商之諸叔祖伯叔兄弟議僉同傳單醵金庀材鳩工筮吉興事式如舊制而更宏敞約

費白金五十兩有奇以己卯十月始事庚辰十月落成里中黃白爭望而譁咸慶坊之復新而太史後人不寂寂也是役也捐金以倡不欲以義舉自予者家大夫也協成決計者石室公及諸長老也昕夕董役者仲父明也贊末議効奔走始終恪事者錫與仲弟鏡從弟鍾也抑竊有聞焉畏菴公值英廟北狩力主迎駕之議繼繼數千言具關國體雖言不見用而氣節表表空僅以文章見哉乃公之生平不著於史即煌煌諫草亦埋沒於寒煙碧霧中家大夫每以後亡達人先猷寂滅為恨何里閨燁燁為也錫侍家大夫側讀公之書誦公之詩懼公之故蹟且廢為瓦礫是用敬承嚴命隨諸長老後勉效拮据安知後之視今不猶今之視昔乎然計斯費不過數十金家大夫非吝於財者而必合衆力成之要以家大夫而不欲專斯舉即後之不必家大夫也者而並得與斯舉也亦為其可繼云耳竣事敬書以報家大夫命并以告後之同志者崇禎十三年十一月四日

先中丞公墓碑記

萬厯庚申先公卜葬先淑人於瞿溪之西與而虛其左俟埋碧者嗣而宦游二十載於墓石槩未遑也甲申之變歸

永嘉縣志

卷三十一

墓志

三

臥一室十九年不出戶嘗曰吾亡國之臣異日勿用石獸
諸物但立一石書舊官階足矣康熙甲辰夏先公棄養維
時拮据襄事淚枯力匱於茲石猶未遑也及今壬戌去甲
辰又十九年矣時序不停宰木且拱矣恐一旦先湊朝露
負罪逾深於是與諸子濬等經始之離墓次百武許遵治
命鑿碑文焉先公清節偉績彪炳朝野固無藉此區區而
菁林叢密道里紆遠不有表識卽無以肅觀瞻而垂久遠
况羹墻陟降又後人所斯朝斯夕者哉碑不甚厚硃亦猶
厲而磨琢未工者先公忠厚立訓戒勿用前人壘上物故
也斯役也樵牧過而流連衿佩行而景仰往烈先猷藉是
益顯而不孝孤得以草土餘生事成厥事幸矣幸矣凡我
子孫瞻先德之崇高冀後人之啟佑謹身節用敦本務實
能無貽羞於祖父則茲碑之立盍止山水增華直與天壤
同久矣詩曰無念爾祖聿修厥德其敬戒於茲哉碑高七
尺九寸闊三尺六寸跌高二尺四寸立於是歲
冬十一月十五日記於癸亥春二月十九日

雜文

宋

周行己代郭守修城隍廟文集

浮止

神無不在爲物之宗在無不報示必有本城隍之神人民
於斯倉廩於斯帑藏於斯甲兵於斯刑獄於斯冒亦大矣
報亦厚矣故祀典有載德音所及祠宇之敝咎將誰執因
民之暇卜日之吉易壞以完增陋而嚴以舍神止神之臨
矣歲時祀之民之福矣
惟吏之職以是來告

劉安上耘齋銘

地不在廣方寸實同惟情爲田耕獲乃功昔者效官耘人
之苗今也退休自耘其疇曰耘伊何芟夷蘊崇稂莠不生
嘉穀乃豐固我靈根存我夜氣太和保合蒸爲美瑞不然
戕賊荆棘之地非天爾殊爾則自棄銘之座隅免蹈之戾
弗克念茲
小人之歸

溉堂銘

凡物之生雨露是資彼生者天人則相之曰歲大旱一溉
何益溉而不輟豈不爲力後枯之理夙夜斯得伊予早衰

永嘉縣志

卷三十一

卷

外嗇中乾豈無靈液自涸其源哲人葆真吐納為最譬如
植物雨則茂遂亦曰天醴飲其醇和暢乎四肢靡顏之醅
我銘斯堂訂子之迷
欲戒厥功戒之在廢
明

劉觀郡學新建靈星門頌

學有廟廟有靈星門舊矣按靈星者東方龍星左角也二
星為天關其開天門其內天庭故王者之門曰靈星也温
郡學廟建於元延祐甲寅迨今歷歲既久棟宇雖頽而廟
貌尙可瞻仰靈星門在風日之下隨建隨毀今朽腐而將
圯者亦有年矣永樂丙戌秋七月之望郡判歐陽公偕僚
屬來謁慨然以爲廟門如是非所以通神靈而瞻示四方
也爰命匠氏以舊廢三星廟閒石柱六昇置於南越二十
六日癸丑乃鳩工樹焉永嘉黃尹率其民雲集奮力不浹
辰而三門儼然屹立矣學校人士莫不鼓舞忻忭咸謂數
百年不刊之功一旦建立若易易然者謂非聖人左右之
靈郡縣作興之力不可也吾黨出入是門其敢忘上所自哉
因拜手而作頌曰於昭聖王有嚴廟像靈星之門上應天

象神靈往來。君子出入數仞。宮牆。焉可拾級。惟聖有執動
由規矩。大開。儒關。來者。不拒。六經。道遠。異論。喧。聖。聖。猶。砥
柱。鎮。彼。奔。競。高。明。位。列。足。以。擎。天。來。瞻。瞻。來。仰。希。聖。希。賢。昔
焉。朽。木。不。可。以。雕。今。易。六。石。桓。桓。翹。翹。育。材。諸。英。上。佐。天
子。柱。石。棟。梁。斯。爾。多。士。伊。誰。之。功。郡。縣。是。力。僉。讓。不。居。
曰。惟。聖。德。聖。德。所。被。豈。惟。是。門。於。千。萬。年。有。赫。斯。文。

周旋四戒族譜

有序 父畏庵書四戒寄回黏諸堂屋中壁以
戒男冕景泰三年四月二十日書於北京寓齋
第一戒汝慎勿苟利官府公門毋或輕至凡百親朋惟篤
情義禮尚往來冠婚喪祭若有他煩切莫干預豈保汝身
亦全吾美 第二戒汝閉門守己勤儉治家戍眠寅起外
肅內嚴婦聽夫義潔掃祠堂敬奉時祭慈愛僮奴和睦鄉
里涵養日新庶成大器 第三戒汝毋甘自棄靜坐小齋
讀書寫字節此沈酣遠彼博戲待客留賓隨宜措置勿尚
奢華天物過廢毋近小人必親君子 第四戒汝租債之
事恒平汝心勿驕汝志恃勢貪多劫奪何異稅糧早輸守
法循禮小忿必懲大吉自
至庶稱人名俯仰無愧

王瓚國子監東壁銘

維時國師疇曰曷爲皇有成命朝有成規天下產才資於善教早夜從事孰爲之要學曰成均堂曰明倫允知以復性真波知彌繁匪止講訟彼蹈彌邇祇在日用厥理果明厥文自王懸科校拔特占其中斯豈首務旣明則悟指我迷途登我大路我思古人學必有師傳道授業解釋羣疑鄒魯之後伊闕獨盛萬古之準萬物之鏡世變寢下師不知求忘本趨末失源徇流買買碌碌率昧攸往理義日蝕利欲日長咨爾諸生悉志時用游歌橋門旣廣旣衆齋舍以居簞廩以食謂汝爲賢歲時有錫濫爲爾長兢惕靡盜達材成德其曷克勝豪傑之士無待自奮况茲展采雖愚必盡朝廷育女欲以祿女條約督女欲以淑女懋哉懋哉務體諸身上優格君下優澤民毋懈以弛毋荒以逸執敏執勤分陰是惜講習精到識局自開言行飭修官祿自來臨幸之地治化攸出詎曰彌文漸致其實人極斯立古風斯還京輦百司孰儷賢關模範或缺訓切載備肫肫我心體之爲貴

西壁銘

唐虞迄周既重師道春秋之世洙泗有造文章易見性命
難聞循循善誘各惟其人載諸六經形諸言論道術淵微
靡復餘蘊後賢迭興是嗣是程充拓光大如有考亭日誦
其書必玩其意凡厥所言罔非吾事澄神端慮寢食勿忘
時復繹習其進无疆維賢可希維聖可學一之爲要豈必
該博博則勿精奚博之貴既精既博亦恐非易百工衆藝
僭師是崇矧茲儒道配天同工忝主國教得賢則重今斯
涵養刻期登用勉爾諸生慎勿自卑體立用著功深效隨
嗟予何長遵古從事邇主考亭上溯洙泗聖朝右文彌極
表章皇勅在楣賜書在堂屹屹正道煌煌成矩探討服行
惟吾與女有肅璧雍有濟章縫門外夕雪座上
春風自虛則益自信則至學無止法雖仕靡廢

項喬瞻雲祝壽圖請文狀

錄

歐東

家父敕封南膳部主事諡封職方員外郎鶴山先生壯心
直行酷類古人九歲失祖父事祖母以孝聞不善拓產而
忘形物外雖無隔夕儲浩歌朗誦達旦遇知己不醉不休
於經典子史天文卜筮星命等書悉能涉獵而尤曉於素
問難經之義起仆同生不責報訓喬業舉子二十七舉於
鄉三十七舉進士入宦兩京出守三郡持憲閩楚竊祿已

二十年未嘗冷眼屑越鄉人或族黨以官事求平者不暇
察其情僞一屈膝鳴號即匍匐不能忍然非利而爲之也
嘗謂喬曰聖賢所存惟天理所行惟義勢利不足道也爾
祖門帖有曰聖賢傳須加勉天理人心不可無凡事直
須求理順所爲不可道天高此義理之言也爾祖母王氏
爾母誥封太宜人婁氏雖婦人而廓然大公絕無妬忌我
母守節無閒言爾母嘗病血彌留聞猪聲猶力止祈禱此
非暗合理義者耶爾其夙夜勉之以毋愧先生之德若三
事不修而五過是逞雖極品祇爲不才吾不爾願也喬用
是略知所嚮往云前此四三年屢求休致以終養焉父曰
用之則行待舍而藏可也其不當馳恩於爾祖耶今歲仲
春二日壽躋八旬矣初擬入賀聖壽順途歸省又以兵備
漳南不得行茲將瓜及矣回首故園咫尺千里真不可頃
刻解於心者敬繪瞻雲祝壽圖求諸大人先生華袞之作
就歸以當蟠桃之獻以布斑斕之情庶吾父展玩可以永
日子孫傳之其聲容藉以不朽也冒賣台嚴敬賜提筆惟
序惟記惟賦惟傳惟頌惟詩歌惟所欲
爲悉爲珠玉喬不勝仰望感激之至

張純五誠

越有女桑氏年十六而寡誓不改節高垣隔別內外童子
不得見室旁有美男子聲音相悅掘地而通焉詰旦蓬髻
垢面哭泣不絕皆曰楚之貞姬也邑令上其事未報女桑
氏則姪矣且曰余思苦而腹疾也求醫診之曰男女不濟
死固吾所也何生求為鄉人益賢之數月呱呱生噫鐘聲
自宮鶴聞於天令名可以伴取哉誠一余讀書瑤山下或
曰是巔有白人洞焉怠於祀則未不登樵牧必墜死每聞
訶斥聲余曰有是哉五月五日夜半風凄雨黑流星散
而一止而什百也俄上餓下復合為一舍人不敢指曰虎
豹棲止暮夜何之洞君遊也余曰有是哉旦閱其所聚人
跡焉益舉族而求其亡羊也詩人曰人之為言苟亦無然
易曰見豕負塗載鬼一車誠二吳人客於楚八年而歸道
宿於山舍見一美女為作飲食設衾簞悅之結為夫婦未
曙負而逃焉其友曰是必有奇禍蓋為爾卜卜曰狐也不
聽其妻泣不止曰是恐割吾愛也妬婦也出之暮歲則體
羸弱語說亂召巫燃鹿角而照之斃於牀下果狐矣矍然
謝其友而歸其妻焉滄江子曰妖也而祥之親也而仇之
人盡妄耳誠三余行枯之深山中也見一翁石室中顏如童
余異而問之曰皇都北徙老夫居此余曰何術而壽也曰
余兄業商北走胡南窮百粵珠翠逼楹手足不停先余而

死九十年二弟侯不能辨奸不能眩雅好文辭日事筆硯
利害是非瑣瑣不倦先余而死百有十年余長而愚妻子
曰咨遂不室廬風雨霧雪言蔽其樗朝陽明月抱犢于
起臥無常黃精為糧曰春與夏花明草叢落葉飛鴻乃知
秋冬憂不至我樂不知終言訖而去嘯於長松翁蓋有道
者也余也結髮記誦逶迤盛年窮通好醜其中乃遷元鬻
種種顏色不妍攬鏡自照為之茫然自今而後須命於天
如木如石謹識斯言該四鄉有學究陰為不善妻子詬之
如瞽巧出而訓小兒則我而冠衣裳楚楚顏色如神小子
唯命唯唯不敢慢也有給其弟子者曰爾師如是如是汝
效之無責也兒輩信之聲音舉止悉夫人所云矣學究覺
焉愧而去噫色厲而內荏譬之小人其猶穿窬之盜也與
故曰善治人者能自治者也
善為人者能自為者也 誠五

王叔果左箴府志

維皇降衷昭哉有赫罔念為狂彼昏斯忒心逸日休日惟
作德爾爾懈於修眾作以則勉茲身心夙夜警惻毋為講張
毋事矯飾毋惑後言毋行胸臆犯無怒藏施無德色語無
夸毗行無伎刻慎之渺微起居食息大雅溫溫小心抑抑

卓彼先民
允矣我式

右箴

物與无妄帝命罔私中孚起信聖訓昭垂為詭為譎民慝
日茲高明鬼瞰屋漏爾知隱衷宥密疇曰可欺一言失實
人謂無稽一行詐偽人蓄羣疑寸心不檢生平以虧人訾
爾貳汝亦悔之相維君子信以自持幽無神責明無人訾
肫肫慥慥
賢聖是師

四戒箴

荒耽沈湎昔戒濫觴晏安祚席耽毒靡常崇賄賈怨構忿
貽殃孰孰羸孰孰縮孰孰懦孰孰強析較毫忽如鼎沸揚終以胥溺
如決斯防哲人炯鑒敬畏靡忘珍陽葆粹齊聖自將屏彼
銖算泯爾低昂維貞維靜知微知彰淵兮止水澹兮元霜
操之兢惕
迪我平康

四維箴

禮義廉恥稟於天彝紀綱百行是爲四維立身行己權衡以之爵可塵視志不可溜生可蹤棄操不可墮進退辭受憂悔罔知安常蹈變檢鏡靡渝相彼污澤穢濁所遺淵澄嶽峻高潔攸推人靈百物名節是支正誼明道釋之我思庶以修慝無忝男兒

通政溪橋翁像贊

牛山藏稿

於乎此我先大父之遺容也昔也侍於燕喜今也瞻於陟降而愴慕切於吾衷愉色表其慈煦粹容符其謙冲生膺備福榮哀侈於錫典沒升廟食美報昭夫元功卓哉明德之遠哉矣慶澤之隆其惠我嗣續無窮

張遜業釋誣

嘉靖己未予承欽命市馬大梁爰憩茲署見輪奐甫新已燕穢弗治竊訝之或對以既落多崇繼者之臨日將就圯予曰有是哉人之好爲誣也始於自誣而卒誣人誣人不已至於誣鬼何居凡我有位受命於天實神之主民之望也神弗禦災捍患則變置之鬼神何狀也敢恣胸臆妄禍福耶陰不侵陽邪不奸正妖不勝德古之經也鬼將休我

如之何怵之夫木必先腐也而後蟲生上必自鬼也而下
斯鬼無乃位上者或黷於貨慾於刑內自疚曰我有鬼責
矣冥報曷逭夫心疚則氣餒氣餒則神怖天君失宇寐寐
皇皇月影松聲眩無於有是心鬼也其下緣舊習心厭鎮
驚愕亦怵於冥報同聲訝曰誠鬼也矧胥徒乘之為奸佯
齟齬磔磔張煽訛羣喧吠聲上下益怵莫知其由噫始而
上眩於心以誣其下終而下誣於心以誣其上上下交誣
牢不可解易有之見豕負塗載鬼一車信夫嗚呼鬼誠有
知耶不禍守道之人無知耶馮佞為幻禳而祛之一夫力
耳奚崇之為始予聞誣言嘗醉於司土曰果有無辜銜冤
而莫雪者乎有厭畏非命而無知者乎有則託諸寐言以
告我竟挾句無聞退適公餘吟弄風月觸處佳景乃喟然
嘆曰人何好誣至此也茲地非值予不幾為廢署乎左右
亦予信起闕於庭相告曰月影松聲依然如故崇曷乎來
是誠誣也已昔狄梁公毀淫詞至今頌之久矣正足勝邪
也適觀憲臺藩臬諸公論議慷慨哀然正人因談及之僉
曰是可以釋誣矣願貞珉以信諸後余曰惡乎敢是在風
教者責也夫聞寂生幻蕪穢易傾萬金之字是珍是惜又
非良有司責乎力惡其不出於身不必為已奚避好事嫌
復誓於庭曰天地之道有明有幽維明維幽正直是由果

能為崇創速予仇毋贅
惑冥頑以作明神之羞

周應期畫像自贊周氏族譜

爾貌何癯爾衷何愚爾志何迂爾行何拘爾官三十年既
不能樹勲名以施光於竹帛又不能藉升斗以分潤於鄉
間詢擁腫之無當於用奚子子焉一編之與俱而一瓢之
是娛嗚呼世與爾而相違今蓋早哉爾影於黃壤徒留此
像然之軀使人目之曰是南冠而囚者豈不誠天壤之腐儒歟

王瑞梅諭張獻忠檄

諭西營遊擊張獻忠凡人生天地閒不論富貴貧賤都要
思想一箇結果日子爾等從前恣意妄行誤墮坑塹一旦
改絃易轍涕泣輸誠是天憫爾愚化爾暴明明討箇好結
果矣今各上臺仰體皇上好生之心委曲開諭亦既著明
今復據穀城士民所請界山湖地二處令自沙沙移營暫
行安插以候明旨真天覆地載之恩也前諭爾解散隨營
授厘三款皆議撫之要務爾宜急急遵照舉行而本道為
爾等計之三款之中應又以解散為第一義蓋爾營號稱

數萬固多驍雄亦有老稚亦有婦流在未撫之先或以此
章逐隊連羣可壯聲勢抑且隨地掠取易給養殮今爾爲
良民矣既已釋劍棄刀亦何須誇強擁衆既已不侵不暴
更安得積粟餘金人衆則心志難齊人衆則日用難給卽
爾嚴爲約束而自有約束不到之處卽爾慷慨贍給而自
多贍給不及之時倘一夫起而敗盟卽全局因而受累則
何如於近府近縣之民可徑歸者盡散歸於原里卽遠府
遠省之民虞阻隔者請給票於上臺解之又解散之又散
則營中所留之精銳當亦無多於是選其孰願隨營者拔
之行伍可戰可守孰願授廩者列之編戶可牧可耕立功
則請餉於朝廷昔爲頑民今皆熙熙耕鑿之黎也利害禍福
自食其力前雖奸宄今皆熙熙耕鑿之黎也利害禍福
白顯然急當清夜三思大家曉諭弗使兵戈逼處城池弗
使哨馬仍取糧草如此則爾等之心事行徑節節可質鬼
神而我之招納撫摩實實聯爲赤子是一撫真撫一撫承
撫之道也洗心滌慮換骨脫胎離苦海而登衽席端在此
舉勉之速
之特諭

劉士焜自誠

永嘉縣志

卷三十二

卷三十二

南

爾無師督爾爾無文規爾爾目所見爾耳所聞如入醢肆
莫為之主莫為之賓爾提提爾爾遠爾誰與居而乃今知
今是有昨非爾為古學先開荆杞而播種焉無速之以有
體有要有華有極勿曠以荒或徃而喜其有滯義如齒有
物啗之乃已惟瞻決事惟精察理非勇非知弗揚亢宗惟
學如此曷不風夜懋懋勉爾爾宗味如火弗揚亢宗惟
爾爾家如巢風雨飄搖承家惟爾爾身如魴勞則頽尾才
不足爾副志氣不足以充體微名不足取微功不足飽致
身惟爾爾敬戒爾一日為父母之子
地閒人則一日為父母之子

鴈山銘

府志

山以鳥名村以花名此八言者山開石驚石不沾水水不
沾石此八言者山搜石立八言之後八言之之前寥寥寂寂
相去千年母石我水母土
我石勒銘茲山敢告游客

永嘉縣志卷之三十二